

আমিই মিসির আলি

হুমায়ুন আহমেদ





আপনিই মিসির আলি ?

হ্যাঁ।

মেয়েটা এমনভাবে তাকাল যেন সে নিজের চোখকে ঠিক বিশ্বাস করতে পারছে না, আবার অবিশ্বাসও করতে পারছে না। বিশ্বাস-অবিশ্বাসের দোলা থেকে নিজেকে সামলে নিয়ে নরম গলায় বলল, আমি ভীষণ জরুরি একটা চিঠি নিয়ে এসেছি। চিঠিটা এই মুহূর্তে আপনাকে না দিয়ে একটু পরে দেই ? নিজেকে সামলে নেই। আমি মনে মনে আপনার চেহারা যেমন হবে ভেবেছিলাম, অবিকল সে রকম হয়েছে।

মিসির আলি মেয়েটির দিকে তাকালেন। সরল ধরনের মুখ। যে মুখ অল্পতেই বিশ্বিত হয়। বারান্দায় চড়ুই বসলে অবাক হয়ে বলে, ও মাগো কী অদ্ভুত একটা চড়ুই!

মেয়েটার সুন্দর চেহারা। মাথার চুল লালচে এবং কোঁকড়ানো না হলে আরো সুন্দর লাগত। বয়স কত হবে— পঁচিশ ছাবিশ। না-কি আরো কম ? কপালে টিপ দিয়েছে, টিপটা ঠিক মাঝখানে হয় নি। বাঁ দিকে সরে আছে। মেয়েরা সাধারণত টিপ দেয়ার ব্যাপারে খুব সাবধানী হয়। টিপ এক পাশে হলে কপালে সতীন জোটে— তাই বাড়তি সাবধানতা। এই মেয়েটা হয়তো তেমন সাবধানী নয়, কিংবা এই গ্রাম্য কুসংস্কারটা জানে না। মেয়েটা চোখে কাজল দিয়েছে। গায়ের রঙ অতিরিক্ত সাদা বলেই চোখের কাজলটা ফুটে বের হয়েছে। শ্যামলা মেয়েদের চোখেই কাজল মানায়, ফর্সা মেয়েদের মানায় না। তারপরেও এই মেয়েটিকে কেন জানি মানিয়ে গেছে।

সে পরেছে সবুজ রঙের শাড়ি। এখনকার মেয়েরা কি সবুজ রঙটা বেশি পরছে ? প্রায়ই তিনি সবুজ রঙের শাড়ি পরা তরুণীদের দেখেন। আগে শহরের মেয়েরা সবুজ শাড়ি এত পরত না। সময়ের সঙ্গে সঙ্গে মেয়েদের রঙের পছন্দ কি বদলাচ্ছে ? রঙ নিয়ে কোনো গবেষণা কি হয়েছে ? র্যানডম স্যাম্পলিং করা যেতে পারে। প্রতিদিন পঞ্চাশটা করে মেয়ের শাড়ির রঙ দেখা হবে। একেক দিন একেক জায়গায়। আজ নিউমার্কেটে, কাল গুলিস্তানে, পরশু ধানমণি। পরীক্ষাটা

একমাস ধরে করা হবে। তারপর করা হবে গসিয়ান কার্ড।

মিসির আলি ভুঁই কুঁচকালেন। পরীক্ষাটা যতটা সহজ মনে হচ্ছে তত সহজ হবে না। স্ট্যাটিস্টিক্যাল মডেল দাঁড় করানো কঠিন হবে। মূল ফণ্টের ডেতের থাকবে সাব ফ্রপ। বিবাহিত মেয়ে, অবিবাহিত মেয়ে। উনিশ বছরের কম বয়সী মেয়ে, উনিশ বছরের চেয়ে বেশি বয়সের মেয়ে, ডিভোর্সড মেয়ে, বিধবা মেয়ে।

মেয়েটি অবাক হয়ে বলল, মনে হচ্ছে কোনো একটা বিষয় নিয়ে আপনি খুব দুশ্চিন্তা করছেন? কী নিয়ে দুশ্চিন্তা করছেন?

মিসির আলি বললেন, দুশ্চিন্তা করছি না তো।

আপনি অবশ্যই দুশ্চিন্তা করছেন। দুশ্চিন্তা না করলেও চিন্তা করছেন। কেউ যখন গভীর কিছু নিয়ে চিন্তা করে— তখন বোঝা যায়।

তুমি বুঝতে পার?

হ্যাঁ পারি। ও আচ্ছা, আমি তো পরিচয়ই দেই নি। আপনি বসতে বলার আগেই বসে পড়েছি। আমার ডাক নাম লিলি। ভালো নামটা আপনাকে বলব না। ভালো নামটা খুবই পুরনো টাইপ। দাদি নানিদের সময়কার নাম। এখন বলতে লজ্জা লাগছে।

মিসির আলি বললেন, পুরনো জিনিস তো আবার ফিরে আসছে। পুরনো প্যাটার্নের গয়নাকে এখন খুব আধুনিক ভাবা হচ্ছে।

যত আধুনিকই ভাবা হোক, আমার ভালো নামটাকে কেউ কখনো আধুনিক ভাববে না। আচ্ছা আপনাকে বলেই ফেলি আপনি কিন্তু হাসতে পারবেন না।

আমি হাসব না। আমি খুব সহজে হাসতে পারি না।

আমার ভালো নাম হলো মারহাবা খাতুন। নামটার একটা ইতিহাস আছে। ইতিহাসটা আরেকদিন বলব। ইতিহাসটা শুনলে এখন নামটা আপনার কাছে যতটা খারাপ লাগছে— তত খারাপ লাগবে না। তখন মনে হবে এই নামও চলতে পারে।

এখনো যে নামটা আমার কাছে খুব খারাপ লাগছে তা না।

আপনার খারাপ লাগছে তো বটেই আপনি ভদ্রতা করে বলছেন খারাপ না। আপনাকে দেখেই মনে হচ্ছে মানুষ হিসেবে আপনি অত্যন্ত ভদ্র। কাউকে মনে আঘাত দিয়ে আপনি কথা বলতে পারেন না।

কীভাবে বুঝালে?

এই যে আমি বকবক করে যাচ্ছি, আপনি মনে মনে খুবই বিরক্ত হচ্ছেন কিন্তু কিছুতেই সেটা প্রকাশ করছেন না। আপনি নিজেকে ব্যস্ত রাখার জন্যে অন্য কিছু ভাবছেন। আচ্ছা সত্য করে বলুন তো, আপনি কি আমার বকবকানিতে বিরক্ত হচ্ছেন না?

মিসির আলি জবাব না দিয়ে চুপ করে রইলেন। তিনি যথেষ্ট বিরক্ত হচ্ছেন।

একটা বয়স পর্যন্ত হয়তো মেয়েদের অকারণ অর্থহীন কথা শুনতে ভালো লাগে, তারপর আর লাগে না। এই মেয়েটি অকারণে কথা বলেই যাচ্ছে। মেয়েটার মনে গোপন কোনো টেনশন কি আছে? টেনশনের সময় ছেলেরা কম কথা বলে, মেয়েরা বলে বেশি। একটা ভালো দিক হচ্ছে মেয়েটার গলার স্বর অস্বাভাবিক মিষ্টি। কথা শুনতে ভালো লাগে। এর গলার স্বর একঘেয়ে হলে এতক্ষণে মাথা ধরে যেত।

বেলা বারোটার মতো বাজে। মিসির আলিকে নিউমার্কেট যেতে হবে। একটা কেরোসিনের চুলা সেই সঙ্গে আরো কিছু টুকিটাকি জিনিস কিনবেন। সমুদ্রতীরে নিরিবিলিতে কিছুদিন থাকার একটা সুযোগ পাওয়া গেছে। তাঁর এক ছাত্র বিনোদ চক্ৰবৰ্তী টেকনাফে কী একটা এনজিওতে কাজ করে। সে দিন পনেরো সমুদ্রের পাড়ে থাকার ব্যবস্থা করে দিয়েছে। জায়গাটার নাম কাদাড়ঙ্গা। এমন একটা জায়গা যার আশেপাশের দু'তিন মাইলের ভেতর কোনো লোকালয় নেই। সামনে সমুদ্র, পেছনে জঙ্গল। দিনবাত সমুদ্র দেখা, নিজে রান্না করে খাওয়া। ভাবতেই অন্য রকম লাগছে। সমুদ্র দর্শন উপলক্ষে কিছু জিনিসপত্র কেনা দরকার। আজই তা শুরু করার কথা। মেয়েটির জন্যে সম্ভব হচ্ছে না। কারো মুখের উপর বলা যায় না, তুমি চলে যাও, আমার জরুরি কাজ আছে। মিসির আলির কাজটা তেমন জরুরিও না। কেরোসিনের চুলা বিকেলেও কেনা যায়। সন্ধ্যার পরেও কেনা যায়।

আপনাকে কি আমি চাচা ডাকতে পারি?

মিসির আলি ছোট নিঃশ্঵াস ফেলে বললেন, ডাকতে পার।

যেহেতু ইউনিভার্সিটিতে মাস্টারি করেছেন, সবাই বোধ হয় আপনাকে স্যার ডাকে।

সবাই ডাকে না, তবে অনেকেই ডাকে।

লিলি ঝুঁকে এসে বলল, আমি অনেকের মতো হতে চাই না। আমি অনেকের চেয়ে আলাদা থাকতে চাই। আমি এখন থেকে আপনাকে চাচা ডাকব।

আচ্ছা।

না চাচা ডাকব না, চাচাজি ডাকব। চাচাজি ডাকের মধ্যে আন্তরিকতা আছে। চাচা ডাকের মধ্যে নেই। তাই না?

হ্যাঁ।

লিলি ঝুঁকে এসে বলল, জু লাগালেই যে আন্তরিক হয়ে যায় তা কিন্তু না। যেমন ধরুন বাবাজি, বাবাজি শুনতে ফাজলামির মতো লাগে না?

লিলি মুখ টিপে টিপে হাসছে। মেয়েটাকে এখন খুবই সুন্দর লাগছে। মনে

হচ্ছে বেতের চেয়ারে একটা পরী বসে আছে। হঠাতে মেয়েটাকে এত সুন্দর লাগছে কেন মিসির আলি বুবাতে পারলেন না। মানুষের চেহারাও কি সময়ের সঙ্গে সঙ্গে বদলায় ? বদলাতে পারে। দিনের একেক সময় তার মুখে একেক রকম আলো পড়ে। সেই আলোর কারণেই চেহারা বদলায়। এনসেল আডামে'র একটা ফটোগ্রাফির বইতে পড়েছিলেন— তিনটা স্পট লাইট দিয়ে যে-কোনো মানুষের চেহারা নিয়ে খেলা করা যায়।

চাচাজি পান মসলা খাবেন ?

না।

একটু খেয়ে দেখুন খুব ভালো। আমি নিজে বানিয়েছি। আমার নিজের ফর্মুলা। আমি এই ফর্মুলার নাম দিয়েছি— লিলি'স পান পাউডার। কারণ আমার জিনিসটা পাউডারের মতো। মুখে দিয়ে কুটুর কুটুর করে চাবাতে হয় না। বুড়ো মানুষ যাদের দাঁতের অবস্থা ভালো না— তাদের জন্যে খুব সুবিধা। চাবাতে হবে না।

লিলি পান পাউডারের কৌটা বাড়িয়ে দিল। হাতের মুঠোর ভেতর রাখা যায় এমন কৌটা। দেখতে খুবই সুন্দর। কৌটার গায়ে ময়ূরের পালকের ডিজাইন। মনে হয় ছেষট একটা ময়ূর হাতের মুঠোয় শয়ে আছে।

মিসির আলি বললেন, তোমার কৌটাটা খুব সুন্দর।

আপনার পছন্দ হয়েছে ?

হ্যাঁ পছন্দ হয়েছে।

কৌটাটা আমি আপনাকে দিয়ে দিতাম, কিন্তু দেয়া ঠিক হবে না। আপনার কাছে এই কৌটা দেখলে সবাই হাসাহাসি করবে।

কেন বল তো ?

কারণ কৌটাটা মেয়েদের। মেয়েরা এই ধরনের কৌটায় পিল রাখে। কোন ধরনের পিল বুবাতে পারছেন তো ? বার্থ কন্ট্রোল পিল।

ও আচ্ছা।

আপনি কি আমার কথায় লজ্জা পেয়েছেন ? পুরী লজ্জা পাবেন না। আমার স্বভাব হচ্ছে— মুখে যা আসে বলে ফেলি। চিন্তা-ভাবনা করে কিছু বলি না। আপনি নিশ্চয়ই আমার মতো না। আমার মনে হয় আপনি আপনার প্রতিটি কথা খুব চিন্তা-ভাবনা করে বলেন। ছাঁকনি দিয়ে কথাগুলি ছাঁকেন।

মিসির আলি ঘড়ির দিকে তাকিয়ে বললেন, লিলি তুমি তোমার জরুরি চিঠিটা আমাকে দিয়ে দাও। আমার আজ একটু বের হতে হবে। আমার কিছু কেনাকাটা আছে।

কেরোসিনের চুলা কিনবেন ?

মিসির আলি খুবই চমকালেন, কিন্তু মুখের ভাবে কিছুই প্রকাশ করলেন না। তিনি কেরোসিনের চুলা ঠিকই কিনবেন, কিন্তু এই তথ্য মেয়েটির জানার কথা না। টেবিলের উপর কোনো কাগজের টুকরাও নেই, যেখানে কেরোসিনের চুলা লেখা। থট রিডিং জাতীয় কিছু ? সেই সভাবনাও ক্ষীণ। ইএসপির কথা খুব শোনা যায়। বাস্তবে দেখা যায় না।

মিসির আলি মনের বিশ্বয় চেপে রেখে বললেন, হ্যাঁ একটা কেরোসিনের চুলা কিনব।

আমি যে বলে দিতে পারলাম এতে অবাক হন নি ?

প্রথমে অবাক হয়েছিলাম। এখন অবাক হচ্ছি না।

এখন অবাক হচ্ছেন না কেন ? আমি কীভাবে কেরোসিনের চুলার ব্যাপারটা বলে ফেলেছি তা ধরে ফেলেছেন— এই জন্যে অবাক হচ্ছেন না ?
হ্যাঁ।

আচ্ছা বলুন, আমি কীভাবে বলতে পারলাম কেরোসিনের চুলা ?

আমি লক্ষ করেছি তুমি কথা বলার সময় ঘতটা না আমার চোখের দিকে তাকাও তারচে' বেশি তাকাও আমার ঠোঁটের দিকে। কথা বলার সময় ঠোঁটের দিকে তাকানোর প্রয়োজন পড়ে না, কারণ শব্দটা আমরা কানে শুনতে পাই। তুমি ঠোঁটের দিকে তাকাচ্ছ তার মানে তুমি লিপি রিডিং জান। আমি নিশ্চয়ই তোমার সঙ্গে কথা বলার সময় বিড়বিড় করে 'কেরোসিনের চুলা' বলেছি। তুমি ঠোঁট নাড়া দেখে বুঝে ফেলেছ।

লিলি হাসতে হাসতে বলল, আপনাকে আমি দশে সাড়ে নয় দিলাম। আসলেই আপনার বুদ্ধি আছে।

তোমার কি ধারণা হয়েছিল বুদ্ধি নেই ?

আপনাকে তো আমি খুব ভালোমতো জানি না। যা জানি বইপত্র পড়ে জানি। বইপত্রে সব সময় বাড়িয়ে বাড়িয়ে লেখা হয়। তাছাড়া চাচাজি আপনি কিছু মনে করবেন না। আপনার চেহারায় হালকা বোকা ভাব আছে। আপনি নিজে তো নিজেকে আয়নায় দেখেন। ঠিক বলছি না চাচাজি ?

হ্যাঁ ঠিক বলছ।

আমি বুঝতে পারছি আমাকে বিদায় করতে পারলে আপনি খুশি হন। আমি আর মাত্র বারো মিনিট থাকব। তারপর চলে যাব।

হিসেব করে বারো মিনিট কেন ?

লিলি হাসিমুখে বলল, একটা বাজার ঠিক দশ মিনিট আগে আপনাকে আমি

চিঠিটা দেব। এই চিঠি আগেও দেয়া যাবে না, পরেও দেয়া যাবে না। একটা বাজার ঠিক দশ মিনিট আগেই দিতে হবে। কারণটা হচ্ছে আজ মে মাসের ছয় তারিখ। এই তারিখে সূর্য ঠিক মাথার উপর আসবে একটা বেজে দশ মিনিটে। যিনি চিঠিটা আমার কাছে দিয়েছেন, তিনি এইসব বিষয় খুব ভালো জানেন। সূর্য মাথার উপর আসার ব্যাপারটা আমি তাঁর কাছ থেকে জেনেছি।

চিঠিটা কে দিয়েছে তোমার হাসবেন্ড ?

জি।

তাঁর শখ কি আকাশের তারা দেখা ? যারা আকাশের তারা দেখে এইসব ব্যাপার তারাই খুব ভালো জানে।

হ্যাঁ তিনি আকাশের তারা দেখেন। তাঁর তিন-চারটা টেলিস্কোপ আছে। আচ্ছা চাচাজি বইপত্রে পড়ি আপনার অবজারভেশন ক্ষমতা অস্বাভাবিক। দেখি তো কেমন ? আমাকে দেখে আমার হাসবেন্ড সম্পর্কে বলুন। বলা কি সম্ভব ?

না সম্ভব না।

কিছু নিশ্চয়ই বলা সম্ভব। এই যে আমি বললাম— তিনি আকাশের তারা দেখেন। এই বাক্যটায় আমি সম্মানসূচক ‘তিনি’ ব্যবহার করেছি। এখান থেকেই তো আপনি বলতে পারবেন যে, আমার স্বামীর বয়স বেশি। সমবয়সী হলে বলতাম, ও আকাশের তারা দেখে।

মিসির আলি নড়েচড়ে বসলেন। এই মেয়েটির সহজ সরল চোখের ভেতরে তীক্ষ্ণ চোখ লুকিয়ে আছে। এই চোখকে অগ্রহ্য করা ঠিক না।

কেরোসিনের চুলা কিনতে চাচ্ছেন কেন ?

আমি কয়েক দিনের জন্যে বাইরে যাব। নিজে রান্নাবান্না করে থেতে হবে। তার প্রসূতি।

শুধু কেরোসিনের চুলা কিনলে হবে না। এর সঙ্গে আরো অনেককিছু কিনতে হবে। কী কী কিনতে হবে আসুন তার একটা লিস্ট করে ফেলি। এতে দ্রুত সময় কেটে যাবে।

লিলি তার হ্যান্ডব্যাগ খুলে কাগজ কলম বের করল। মিসির আলিকে অবাক করে দিয়েই টেবিলে ঝুঁকে দ্রুত লিখে ফেলল—

1. কেরোসিনের চুলা
2. চুলার ফিতা
3. কেরোসিন
4. ছুরি
5. কাঠের বোর্ড (মাছ গোসত কাটার জন্যে)

৬. কেতলি
৭. সসপ্যান
৮. দু'টি হাঁড়ি (ভাতের এবং তরকারির)
৯. চায়ের কাপ
১০. চামচ
১১. কনডেসড মিষ্ট
১২. চা
১৩. কফি

মেয়েটা এমনভাবে লিখছে যেন মিসির আলি চেয়ারে বসে পড়তে পারেন।
মেয়েটার এই ভঙ্গিটা ভালো লাগছে। কাজের ভঙ্গি। কাজটা সে হেলাফেলার
সঙ্গে করছে না, শুরুত্বের সঙ্গে করছে।

আপনি একা যাচ্ছেন?

হ্যাঁ।

আমারো মাঝে মাঝে খুব ইচ্ছা করে একা কোথাও গিয়ে থাকতে।
রবিনসনকুশোর মতো একা কোনো দ্বীপে বাস করা। কী করব না করব কেউ
দেখবে না। আমার মনে হয় আমি একা একা সারা জীবন কাটাতে পারব। আচ্ছা
চাচাজি আপনি কি পারবেন?

বুঝতে পারছি না। আমি কখনো ভেবে দেখি নি।

কোনো পুরুষ মানুষের পক্ষে একা একা সারা জীবন কাটানো সম্ভব না।
পুরুষদের নানান ধরনের চাহিদা আছে। অন্দু চাহিদা, অভ্যন্তর চাহিদা। উদের
চাহিদার শেষ নেই।

মেয়েরা কি তার থেকে মুক্ত?

মেয়েরাও তার থেকে মুক্ত না। তবে মেয়েরা ব্যক্তিগত চাহিদার কাছে
কখনো পরাজিত হয় না। পুরুষরা হয়।

লিলি লেখা বন্ধ করে সোজা হয়ে বসতে বসতে বলল, সব মিলিয়ে
আটগ্রিশটা আইটেম লিখেছি। এই আটগ্রিশটা আইটেম সঙ্গে নিয়ে গেলে আপনি
একা একা থাকতে পারবেন। এর মধ্যে অমুখও আছে। চট করে অসুখ বিসুখ
হলে ডাক্তারখানা পাবেন না।

থ্যাংক যুঁ।

আমি কাল আবার আসব। এর মধ্যে যদি আরো নতুন কোনো আইটেমের
নাম মনে আসে আপনাকে বলব।

আচ্ছা।

লিলি ছেটি নিঃশ্বাস ফেলে বলল, এখন একটা বেজে দশ মিনিট। এই নিন
চিঠি। দয়া করে ঝুঁড়িতে ফেলে দেবেন না। পড়বেন। তবে আমার সামনে
পড়বেন না। আমি চলে যাবার পর পড়বেন।

অবশ্যই পড়ব।

আমি বাজার করতে খুব পছন্দ করি। আপনি যদি রাজি হন তাহলে কাল
যখন আসব তখন আপনাকে নিয়ে কেরোসিনের চুলা-টুলা কিনে দেব। আপনি
যে দামে কিনবেন, আমি তার অর্ধেক দামে কিনে দেব। আর কিছু আইটেম আছে
যা দোকানে গেলে মনে পড়বে। কাগজ কলম নিয়ে বসলে মনে পড়বে না।
এইতো এখন একটা জরুরি আইটেম মনে পড়ল, ন্যাকড়া।

ন্যাকড়া?

হ্যাঁ ন্যাকড়া। ন্যাকড়াকে মোটেই তুচ্ছ মনে করবেন না। চুলা থেকে গরম
চায়ের কেতলি নামাবেন কীভাবে? হাতের কাছে ন্যাকড়া না থাকলে হয়তো
গায়ের শাটের একটা অংশ দিয়ে নামাতে যাবেন— তারপর এ্যাকসিডেন্ট। সারা
গা গেল পুড়ে। ভালো কথা অমুধের লিস্টে আমি বার্নল লিখে দিয়েছি। নিতে কিন্তু
ভুলবেন না।

আচ্ছা ভুলব না।

চাচাজি বাজার করার সময় আমাকে কি আপনি সঙ্গে নেবেন?

তুমি কাল আস তখন দেখা যাবে। আমার সমস্যা কি জান? আমি আমার
নিজের কাজগুলি নিজেই করতে ভালোবাসি। কেউ আমাকে কোনো ব্যাপারে
সাহায্য করছে এটা ভাবতেই আমার কাছে খারাপ লাগে।

এই জন্যেই কি বিয়ে করেন নি?

বিয়ে না করার পেছনে এটা কারণ হিসেবে কাজ করে নি। বউকে দিয়ে কাজ
করাব— এই ভেবেতো আর কেউ বিয়ে করে না।

কাল আমি ঠিক এগারোটার সময় আসব।

আচ্ছা।

আমার যেতে ইচ্ছা করছে না। আরো কিছুক্ষণ আপনার সঙ্গে গল্ল করতে
ইচ্ছা করছে। বসব?

না। আমি এক নাগাড়ে কারো সঙ্গেই পঞ্চাশ মিনিটের বেশি গল্ল করতে
পারি না। দীর্ঘ দিন মাস্টারি করেছি তো। মাস্টারদের ক্লাসগুলি হয় পঞ্চাশ
মিনিটের। যে সব শিক্ষক দীর্ঘদিন অধ্যাপনা করেছেন তারা কখনো পঞ্চাশ
মিনিটের বেশি কোনো সিটিং দিতে পারেন না।

আমার নাম কি আপনার মনে আছে?

ঘনে আছে। ডাক নাম লিলি। ভালো নাম মারহাবা খাতুন।

আমার ভালো নাম আসলে মারহাবা খাতুন না। মাহাবা বেগম। আমি 'মা'র পরে একটা 'র' বসিয়ে মাহাবা-কে মারহাবা করেছি।

মাহাবা তো বেশ আধুনিক নাম। তুমি কেন বললে খুব পুরনো ধরনের নাম?

মিথ্যা করে বললাম। ছোট একটা পরীক্ষা করলাম। মিথ্যা কথা বললে আপনি ধরতে পারেন কি না সেই পরীক্ষা। আমি আপনাকে নিয়ে লেখা একটা বইয়ে পড়েছি কেউ মিথ্যা কথা বললে আপনি সঙ্গে সঙ্গে ধরে ফেলেন। আসলে আপনি পারেন না।

তুমি নাম নিয়ে মিথ্যা বলতে পার এটা মাথায় আসে নি। কাজেই আমি সেইভাবে তোমাকে লক্ষ করি নি।

মেয়েদের সম্পর্কে আপনি আসলে খুব কম জানেন। নিজের নাম নিয়ে মিথ্যা কথা বলতে মেয়েরা খুব পছন্দ করে।

তাই না-কি?

হ্যাঁ। ধরন কোনো মেয়ে টেলিফোন ধরেছে। অপরিচিত একজন পুরুষ জিজ্ঞেস করল, আপনি কে বলছেন? মেয়েটা তখন নিজের নাম না বলে ফট করে তার বাস্তবীর নাম বলে দেবে। আচ্ছা আমি যাই, আপনি তো আবার পঞ্চাশ মিনিটের বেশি কথা বলেন না। আমি যে বাড়তি কিছুক্ষণ কথা বললাম— কেন বললাম জানেন? পঞ্চাশ মিনিট পুরো করার জন্যে বললাম। আমি আপনার কাছে এসেছি সাড়ে বারোটায়। এখন বাজে একটা বিশ। পঞ্চাশ মিনিট হয়েছে?

হ্যাঁ হয়েছে।

আপনি আমাকে দ্রুত বিদায় করতে চাচ্ছিলেন। আমি চলেই যেতাম কিন্তু পঞ্চাশ মিনিটের কথা বলে আপনি নিজেই নিজের ফাঁদে আটকে গেলেন। খুব বুদ্ধিমান মানুষদের এটা একটা সমস্যা। নিজেদের তৈরি করা ছোট ছোট ফাঁদে তারা নিজেরা ধরা পড়ে। চাচাজি যাই?

আচ্ছা যাও।

মিসির আলি মেয়েটিকে বাড়ির গেট পর্যন্ত এগিয়ে দিলেন। এই কাজটা তিনি সচরাচর করেন না।

লিলি গেট পার হয়ে থমকে দাঁড়িয়ে পড়ল। লজ্জিত গলায় বলল, চাচাজি আমি খুব দুঃখিত।

মিসির আলি বললেন, কেন বলতো?

আমি বুঝতে পারছিলাম আপনি আমার উপর খুব বিরক্ত হচ্ছেন, তারপরেও আমি চলে যাই নি। বরং আপনি যেন আরো বিরক্ত হন সেই চেষ্টা করেছি।

আসলে আপনার সামনে থেকে চলে যেতে ইচ্ছা করছিল না।

মিসির আলি বললেন, আমি যতটা বিরক্ত হয়েছি বলে তুমি ভাবছ, তত বিরক্ত কিন্তু আমি হই নি। বরং তোমাকে আমার ইন্টারেন্সিং একটি মেয়ে বলে মনে হয়েছে।

তাহলে চলুন আবার ঘরে ফিরে যাই। কিছুক্ষণ গল্প করি।

বলতে বলতে লিলি হেসে ফেলল। মিসির আলিও হাসলেন। লিলি বলল, আপনাকে তয় দেখাবার জন্যে বললাম, আপনি কি ভেবেছিলেন? আমি আরো ঘণ্টাদুই আপনার সঙ্গে বকবক করব? আপনার মাইগ্রেনের ব্যথা তুলে তারপর বিদেয় নেব?

লিলি হাসছে। এই মেয়েটার হাসি একটু অন্যরকম। সে যখন হাসে তার চোখে পানি জমে। এই হাসির একটা নামও আছে— অশ্রু হাসি।



জনাব মিসির আলি

শ্রদ্ধাপ্নেয়,

আমার স্তু লিলি নিশ্চয়ই অনেক নাটকীয়তা করে এই চিঠি আপনার হাতে দিয়েছে। সে এমন এক মেয়ে যে কোনো রকম নাটকীয়তা ছাড়া কিছু করতে পারে না। খুব সহজ কথাও সে সহজে বলবে না। দু'তিন জায়গায় পাঁচ দিয়ে বলবে। সহজ কথাটাকেই তখন মনে হবে ভয়ঙ্কর জটিল। আপনি খুব বড় সাইকিয়াট্রিস্ট, আপনার কাছে হয়তো এর ব্যাখ্যা আছে, আমার কাছে কোনো ব্যাখ্যা নেই।

যাই হোক মূল প্রসঙ্গে আসি। আমি এবং আমার স্তু আমরা দু'জনই আপনার মহাভক্ত। আপনার বিষয়ে প্রকাশিত প্রতিটি গ্রন্থ আমার স্তু কয়েকবার করে পড়েছে, এবং আমাকেও পড়তে বাধ্য করেছে। আমি আপনার সঙ্গে নিরিবিলিতে কিছু কথা বলার জন্যে অত্যন্ত আগ্রহী। সবচে' ভালো হতো আমি যদি লিলির সঙ্গে ঢাকায় চলে আসতে পারতাম। তা সম্ভব হচ্ছে না, কারণ আমি বন্দি-জীবনযাপন করছি। গত সাত বছর ধরেই আমি হইল চেয়ারে আছি। রোড এ্যাকসিডেন্টে স্পাইনাল কর্ড জখম হয়েছিল। আপনি তো জানেন স্পাইনাল কর্ডের জীবকোষ কখনো রিজেনারেট করে না। আমাকে আমার ভাগ্য মেনে নিতে হয়েছে। চাকার জীবনে অভ্যন্তর হবার চেষ্টা করছি। অভ্যন্তর হওয়া সম্ভব হচ্ছে না। কখনো হবে তাও মনে হয় না। নিজেকে এখন আর আমার মানুষ বলে মনে হয় না। মনে হয় আমি একটা দু'চাকার রিকশা।

আপনাকে ভুলিয়ে ভালিয়ে এখানে আনার একটি পরিকল্পনা আমি এবং আমার স্তু দু'জনে মিলে করেছি। জানি

না আপনাকে কন্তিপ করতে পারব কি না। চেষ্টা করে দেখা যাক। আমার এখানে আসার জন্যে তিনটি টোপ আমি ফেলছি। কেন জানি আমার মনে হচ্ছে প্রথম দু'টি টোপ কাজ না করলেও শেষটি করবে। টোপ দিয়ে মাছের মতো মানুষও ধরা যায়।

টোপ নাস্তার এক

আমাদের বসতবাড়িটা মেঘনার পাড়ে। উচু পাঁচিল দিয়ে ঘেরা দোতলা পাকা দালান। দোতলায় প্রশস্ত টানা বারান্দা। বারান্দা থেকে মেঘনা দেখা যায়। না দেখা গেলেই ভালো হতো। কারণ এই মেঘনা জমি গ্রাস করতে করতে দ্রুত এগিয়ে আসছে। যে-কোনো সময় (হয়ত এ বছরই) আমাদের এই অতি চমৎকার বাগানবাড়িটা গ্রাস করবে। আমাদের বাড়িটা চমৎকার। বাড়ির সামনের বাগান চমৎকার। আমি নিশ্চিত একবার আপনি এসে উপস্থিত হলে অবাক বিশ্বয়ে বলবেন— বাকি জীবনটা এখানে কাটিয়ে দিতে পারলে কী ভালোই-না হতো! আমাদের বাড়ির পেছনে কিছু অন্দুত গাছ বাড়ির আদি মালিক বাবু অশ্বিনী রায় (আমার দাদাজান এই বাড়ি পরে তাঁর কাছ থেকে কিনে নিয়ে ছিলেন।) লাগিয়েছিলেন। গাছগুলির নাম এখানে কেউ জানে না। এর মধ্যে একটা গাছের গা থেকে নীল বর্ণের কষ বের হয়। দু'বছর পরপর মরিচের ফুলের মতো নীল রঙের ফুল ফোটে। আমার স্ত্রী এই গাছটির নাম দিয়েছে— নীল মরিচ গাছ। আমার এখানে যে-ই আসে সে-ই এই গাছটার একটা নাম দেয়। আপনিও হয়তো একটা নাম দেবেন।

টোপ নাস্তার দুই

আপনার বিষয়ে একটা বইয়ে পড়েছি আপনার সারা জীবনের শব্দের বস্তু হলো ভালো একটা টেলিক্ষোপ। যে টেলিক্ষোপে আপনি বৃহস্পতির চাঁদ দেখতে পারবেন, শনির বলয় দেখতে পারবেন। আপনার অবগতির জন্যে জানাচ্ছি টেলিক্ষোপ চোখে দিয়ে আকাশের দিকে তাকিয়ে থাকা বর্তমানে আমার একমাত্র শখ। বৃহস্পতি গ্রহের চাঁদ দেখা বা শনির বলয় দেখা চেয়েও বিশ্বয়কর দৃশ্য এন্ড্রোমিডা নক্ষত্রপুঞ্জ দেখা। নক্ষত্রপুঞ্জের স্পাইরালে শত শত নক্ষত্র ঝলমল করছে। এই দৃশ্য একবার দেখলে সারা জীবনের জন্যে আকাশের গায়ে আটকে থাকতে হবে। আমি সর্বশেষ যে টেলিক্ষোপটি এনেছি তার সঙ্গে ট্রেকার

যুক্ত। পৃথিবীর ঘূর্ণনের সঙ্গে টেলিক্ষেপও ঘূরবে, কাজেই আকাশে
যে বস্তুটিকে ফোকাস করা হয়েছে সেই বস্তু কখনো দৃষ্টির আড়াল
হবে না। আপনি যদি আসেন দু'জনে মিলে আকাশের তারা
দেখব। দু'জনে মিলে দেখব কারণ লিলির তারা দেখার বিষয়ে
কোনো আগ্রহ নেই। আমি ঠিক করে রেখেছি আমার চারটা
টেলিক্ষেপের একটা আমি আপনাকে উপহার দেব। চারটা
টেলিক্ষেপই আমার অত্যন্ত প্রিয়। সেখান থেকে আপনাকে একটা
উপহার হিসেবে দিতে আমার কষ্ট যে হবে না তা-না। কষ্ট হবে
তবে আপনি এই টেলিক্ষেপ ঢোকে লাগিয়ে গাঢ় আনন্দ পাবেন
এটা ভেবেই সেই কষ্ট দূর করব।

টোপ নামার তিন

এইটিই শেষ টোপ। আমি নিশ্চিত এই টোপে আপনি কাবু
হবেন। ইএসপি ক্ষমতাসম্পন্ন মানুষ সম্পর্কে আপনার প্রবল
কৌতুহল। সালমা নামের একটি ১৪/১৫ বছরের মেয়ে আমাদের
সন্ধানে আছে। গ্রামেরই মেয়ে।

মেয়েটি অতীন্দ্রিয় ক্ষমতাসম্পন্ন। আমি নানানভাবে পরীক্ষা
করেছি। এবং নিশ্চিত হয়েছি। একটি পরীক্ষা হলো বিখ্যাত
জেনার টেস্ট। তার ক্ষমতা কোন পর্যায়ের সেটা এখন আর ব্যাখ্যা
করলাম না। কিছুটা রহস্য রেখে দিলাম।

টোপ নামার চার

যদিও তিনটা টোপ ব্যবহার করার কথা ছিল, তারপরেও
আমি চতুর্থ টোপটি ব্যবহার করছি। অনেকের ব্যাপারে এই টোপ
কাজ করলেও আপনার ব্যাপারে করবে বলে মনে হচ্ছে না। এটা
হল লিলির রান্না। রান্নার উপর নোবেল পুরস্কার দেবার ব্যাপার
থাকলে প্রতি বছরই সে একটা করে নোবেল পুরস্কার পেত।
সামান্য আলু ভাজাও যে অমৃতসম খাদ্য হতে পারে লিলির আলু
ভাজা না খেলে বুবাতে পারবেন না।

টোপ নামার পাঁচ

ক্ষমা প্রার্থনা পূর্বক আরো একটি টোপ। এটি আপনাকে কাবু
করে ফেলবে বলে আমার ধারণা। আমার ব্যক্তিগত লাইব্রেরীর
কথা বলছি। বইয়ের মোট সংখ্যা আঠারো হাজারের বেশি।
আপনার পছন্দের বিষয়ে (সাইকোলজি, বিহেভিয়ারেল সায়েন্স)

প্রচুর বই আছে। শুধু একটি নাম উল্লেখ করছি Asmond-এর
The Other Mind.

মিসির আলি সাহেব, কয়েকটা দিনের জন্যে আপনি কি
আসতে পারেন না? আমার শরীর পঙ্গু কিন্তু মনটা পঙ্গু না।
আপনি নিজে একজন সতেজ মনের মানুষ। আপনার সঙ্গে
মানসিক যোগাযোগের জন্যে গভীর আগ্রহ নিয়ে অপেক্ষা করছি।

বিনীত

এস. সুলতান হক

পুনশ্চ: আকাশ দেখার জন্যে এই সময়টা খুব ভালো। কুয়াশা
থাকে না। এবং চারদিন পরই অমাবস্যা। আকাশ ভর্তি হয়ে যাবে
তারায়। শুল্কপক্ষ তারা দেখার জন্যে ভালো না। চাঁদের আলোয়
তারাদের ঝঞ্জুল্য করে যায়। কাজেই এখনি সময়।

মিসির আলি যে-কোনো চিঠি তিনবার পড়েন। চিঠির ভেতরে কিছু কথা
থাকে যা একবার পড়ে ধরা যায় না। দ্বিতীয় কিংবা তৃতীয়বারে ধরা পড়ে। এটিও
তিনবার পড়লেন। সুন্দর চিঠি। সুন্দর হাতের লেখা। প্রতিটি অক্ষর স্পষ্ট।
কাটাকুটি যে নেই তা না। তবে কাটা অংশগুলি হোয়াইট ইফ্ফ দিয়ে মুছে দেয়া।
ভদ্রলোকের বাগানবাড়িতে যেতে ইচ্ছা করছে। কিন্তু সম্ভব না। মিসির আলি তাঁর
ছাত্রকে কুরিয়ারে চিঠি দিয়েছেন। সে সব কাজ ফেলে টেকনাফে এসে বসে
থাকবে। তিনি না পৌছলে খুব অস্তির বোধ করবে। দুশ্চিন্তা করবে। তিনি
কাউকে অকারণ দুশ্চিন্তায় ফেলতে চান না।



লিলিকে দেখে মিসির আলি চিনতে পারলেন না। চিনতে পারার কথাও না—
দরজা ধরে যে দাঁড়িয়ে আছে সে আগের দিনের লিলি না, অন্য কেউ। মাথার চুল
নীল রঙের শ্বার্ফ দিয়ে ঢাকা। চোখে কালো চশমা। ঠোঁটে গাঢ় লাল লিপস্টিক।
জাপানি কিমানোর মতো একটা পোশাক পরেছে। তার রঞ্জ দেখে চোখ ধাঁধিয়ে
যায়। উচু হীলের জুতা পরেছে বলে তাকে দেখাচ্ছেও অনেক লম্বা।

চাচাজি আমাকে চিনতে পারছেন না, আমি লিলি। মাহাবা বেগম।

মিসির আলি বিড়বিড় করে বললেন, ও আচ্ছা আচ্ছা।

সত্য করে বলুন তো আমাকে চিনতে পেরেছিলেন ?

না চিনতে পারি নি।

মানুষের চেহারা মনে রাখা কত কঠিন দেখলেন ?

দেখলাম।

আমি কী করেছি জানেন ? লম্বা করে লিপস্টিক দিয়ে ঠোঁট লম্বা করেছি।
মানুষকে চেনা যায় ঠোঁট দিয়ে আর চোখ দিয়ে। যে দুটা জিনিস দিয়ে চেনা যায়,
সে দুটা জিনিস আমি বদলে দিয়েছি। চশমা দিয়ে চোখ ঢেকেছি আর ঠোঁট
বদলে দিয়েছি।

মিসির আলি বললেন, লিলি বোস। তোমাকে সুন্দর লাগছে।

সুন্দর দেখাবার জন্যে আমি সাজ করি নি। নিজেকে বদলে দেবার জন্যে
করেছি। ভালো কথা চাচাজি, আপনি কি কেরোসিনের চুলা এইসব কিনে
ফেলেছেন ?

না কেনা হয় নি।

লিলি স্বষ্টির নিষ্পাস ফেলে বলল, বাঁচলাম। কারণ আমি সব কিনে ফেলেছি।
এমন অনেক কিছু কিনেছি যা লিটে ছিল না, যেমন হারিকেন, টর্চ, ব্যাটারি। হাফ
কেজি সুতলি কিনেছি।

সুতলি কেন ?

এখন আপনার কাছে মনে হচ্ছে সুতলি কী জন্যে ? কিন্তু একা থাকতে গিয়ে

দেখুন সুতলি কত কাজে লাগবে। মশারি খাটাবার জন্যে লাগবে। তেজা জামা কাপড় শুকুতে দেবেন— তার জন্যে দড়ি টানাতে হবে। আরো অনেক কিছুর জন্যে লাগবে। শলার ঝাড়ুও কিনেছি।

কত টাকা খরচ হয়েছে?

আপনার বাজেটের চেয়ে কম লেগেছে।

তুমি তো জান না আমার বাজেট কত?

বাজেট যতই হোক, তারচে' কম। কারণ বাংলাদেশে আমার চেয়ে দরাদরি আর কেউ করতে পারে না। চাচাজি শুনুন এই যে বাজার টাজার করে ফেলেছি তার জন্যে রাগ করেন নি তো?

না।

পীজ রাগ করবেন না। আরেকটা কথা জিনিসগুলির দাম দেবারও চেষ্টা করবেন না। কোনো লাভ হবে না। কারণ কিছুতেই দাম দিতে পারবেন না। আমার হাসবেন্ডের চিঠিটা পড়েছেন?

হ্যাঁ।

আপনি টোপ গেলেন নি। তাই না? আপনি নিশ্চয় সমুদ্র ফেলে তারা দেখতে যাচ্ছেন না? সমুদ্র হাত দিয়ে ছোঁয়া যায়। আকাশের তারা যত সুন্দরই হোক হাত দিয়ে ছোঁয়া যায় না।

তারা দেখার ইচ্ছা থাকলেও যেতে পারছি না। আমার এক ছাত্রের সঙ্গে সবকিছু ঠিক করা। সে আবার আমাকে অতিরিক্ত রকমের শ্রদ্ধাভক্তি করে। সে টেকনাফে এসে বসে থাকবে।

লিলি হাসিমুখে বলল, আপনাকে টেকনাফে না দেখলে তার মাথা খারাপের মতো হয়ে যাবে। সে ভাববে আমাদের স্যার ভুলা টাইপ মানুষ, না জানি তাঁর কী হয়েছে!

ঠিক বলেছ লিলি।

আমার কোনো ইএসপি ক্ষমতা নেই, কিন্তু আমি জানতাম আপনি আমাদের এখানে আসবেন না। আমি আমার হাসবেন্ডকে সেটা বলেছি। সে বিশ্বাস করে নি। তার ধারণা সে এমন গুছিয়ে চিঠিটা লিখেছে যে চিঠি পড়েই আপনি হোল্ডঅল বেঁধে রওনা দিয়ে দেবেন। উন্নর দক্ষিণে তাকাবেন না।

মিসির আলি বললেন, চিঠিটা খুবই গুছিয়ে লেখা।

লিলি বলল, আপনার জন্যে চিঠিটা গুছিয়ে লেখা না। আবেগ আছে এমন সব মানুষদের জন্যে চিঠিটা গুছিয়ে লেখা। আপনি তাদের দলে পড়েন না।

তোমার ধারণা আমার আবেগ নেই?

আছে তবে তা সাধারণ মানুষের আবেগ না। অন্য ধরনের আবেগ। আপনাকে যদি লেখা হতো— আমি মহাবিপদে পড়েছি। মারা যাচ্ছি। একমাত্র আপনি আমাকে মৃত্যুর হাত থেকে বাঁচাতে পারেন। তাহলে আপনি চলে যেতেন। কিন্তু সেটাতো আর লেখা যাবে না কারণ ও মারা যাচ্ছে না।

মিসির আলি বললেন, লিলি তুমি এক কাজ কর। তোমাদের ঠিকানাটা লিখে রেখে যাও। সমুদ্র দেখা শেষ হলে তোমাদের ওখানে চলে যাব।

আপনি একা একা খুঁজে বের করতে পারবেন না। যাওয়াও খুব ঝামেলা, ট্রেন, বাস— রিকশা— ইঁটা।

একটু ঝামেলা না হয় করলাম।

লিলি হেসে ফেলে বলল, থাক দরকার নেই। চাচাজি শুনুন আমি কিন্তু আজও পঞ্চাশ মিনিট থাকব। আমাকে আগেভাগে বিদায় করে দিতে চাইলেও আমি যাব না। তবে আজ যে গতদিনের মতো শুধু বকবক করব তা না। আপনাকে কফি বানিয়ে খাওয়াব। আমি কফি নিয়ে এসেছি। আপনি কফি পছন্দ করেন তো?

করি।

মিসির আলি দেখলেন লিলি তার কাঁধে ঝোলানো পাটের ব্যাগ থেকে কফির কৌটা, মগ, চায়ের চামচ এবং ফ্লাঊ বের করছে। বোঝা যাচ্ছে কফি বানানো হবে। মেয়েটা কফির সব সরঞ্জাম সঙ্গে নিয়ে এসেছে। গরম পানিও এনেছে। ফ্লান্সে নিশ্চয়ই গরম পানি।

লিলি বলল, মেশিন ছাড়া এক্সপ্রেসো কফি বানানো যায় না, কিন্তু আমি বানাতে পারি। আপনাকে শিখিয়ে দিচ্ছি। আপনি প্রতিটি স্টেপ খুব ভালোভাবে লক্ষ করুন। এই দেখুন কী করছি এক চামচের চেয়ে সামান্য বেশি নিলাম কফি।— চিনি নিলাম তিন চামচ। এখন চিনি আর কফি মিল করছি। চামচ দিয়ে ঘষে ঘষে মেশানো। এই মেশানোর কাজটা অনেকক্ষণ করতে হবে। যত ভালোমতো মেশাবেন কফি তত ভালো হবে।

এত যন্ত্রণা?

যন্ত্রণা ভাবলে যন্ত্রণা। আমি কখনো যন্ত্রণা ভাবি না। যে লেখক লেখাকে যন্ত্রণা মনে করেন তিনি কখনো লেখক হতে পারেন না। ঠিক তেমনি যে ঝাঁধুনি রান্নাকে যন্ত্রণা মনে করেন তিনি ঝাঁধুনি হতে পারেন না। চাচাজি আপনার কাছে কি আলু আছে?

না।

থাকলে ভালো হতো। আমি আপনাকে আলু ভাজা কী করে করতে হয় শিখিয়ে দিতাম। যে সব রান্না খুব সহজ মনে হয় সে সব রান্না আসলে খুব

কঠিন। আমার মতে 'পৃথিবীর সবচে' কঠিন রান্না হলো চা বানানো, আর দ্বিতীয় কঠিন রান্না হলো আলু ভাজা।

লিলি চিনির সঙ্গে কফি মিশিয়েই যাচ্ছে। ফ্লান্টিহীন আঙুল নাড়াচাড়া করছে। তার মুখ উজ্জ্বল। যেন কোনো বিশেষ কারণে সে আনন্দিত। আনন্দ চেপে রাখতে পারছে না। মিসির আলি ভুরু কুঁচকালেন। সেই বিশেষ কারণটা কী? তিনি তাদের বাগানবাড়িতে যাচ্ছেন না এটাই কি বিশেষ কারণ?

লিলি বলল, চাচাজি আপনি কি লক্ষ করছেন কফির কাপ থেকে এখন চমৎকার কফির গন্ধ আসতে শুরু করেছে?

হ্যাঁ লক্ষ করছি।

তার মানে হলো এখন আমরা তৈরি পানি ঢালার জন্যে। এখন আমি ওয়ান থার্ড কাপ পানি ঢেলে, চামচ নেড়ে নেড়ে ফেলা করব। ফেলায় যখন কাপ ভর্তি হয়ে যাবে তখন বাকি পানিটা ঢালব।

তৈরি হয়ে যাবে এক্সপ্রেসো কফি?

হ্যাঁ। আগে তো আর কফি বানানোর মেশিন ছিল না। এইভাবেই কফি বানানো হতো। এখন আর কেউ কষ্ট করতে চায় না। ফট করে মেশিন কিনে ফেলে।

মিসির আলি সিগারেট ধরাতে ধরাতে বললেন, লিলি তোমাকে দেখে মনে হচ্ছে তুমি খুব আনন্দিত। তোমার মধ্যে একটা দুশ্চিন্তা ছিল। দুশ্চিন্তা হঠাৎ কেটে গেছে।

লিলি বলল, কফি বানাচ্ছি তো এই জন্যেই আমাকে আনন্দিত মনে হচ্ছে। যে-কোনো রান্নাবান্নার সময় আমি খুব আনন্দে থাকি।

মিসির আলি বললেন, ব্যাপারটা তা না। যেই মুহূর্তে আমি বললাম—আমি তোমাদের বাগান বাড়িতে যেতে পারছি না, সেই মুহূর্তেই তোমার চোখ মুখ উজ্জ্বল হয়ে গেল। কারণ ব্যাখ্যা কর তো।

আমি আমার হাসবেড়ের সঙ্গে বাজি রেখেছিলাম যে আপনি যাবেন না। আপনি না যাওয়াতে আমি বাজি জিতেছি তো এই জন্যেই হয়তো আমার চোখে মুখে আনন্দ চলে এসেছে। পৃথিবীর সমস্ত স্তৰীদের একটা চেষ্টা থাকে কোনো না কোনোভাবে তাদের স্বামীদের হারিয়ে দেয়া। যেহেতু আপনি বিয়ে করেন নি—আপনি এই ব্যাপারটা জানেন না।

লিলির কফি বানানো শেষ হয়েছে। ফেলা-ওঠা কফির কাপ মিসির আলির সামনে রাখতে রাখতে সে বলল, চাচাজি চুমুক দিয়ে দেখুন। মিষ্টি একটু বেশি লাগবে। উপায় নেই, এক্সপ্রেসো কফি কড়া মিষ্টি না হলে ভালো লাগে না।

মিসির আলি কফির কাপ হাতে নিতে বললেন, লিলি আমি সিদ্ধান্ত
পাল্টেছি। তোমাদের বাগানবাড়িতে যাব। শেষ পর্যন্ত তুমি তোমার স্বামীর কাছে
বাজিতে হারলে।

লিলি বলল, কফিতে চুমুক দিন। এত কষ্ট করে বানালাম আর আপনি কাপ
হাতে নিয়ে বসে আছেন?

মিসির আলি কফিতে চুমুক দিয়ে বললেন, এখন যদি আমরা রওনা দেই
কতক্ষণে পৌছব?

পৌছতে পৌছতে রাত ন'টা দশটা বেজে যাবে।

তাতে কোনো সমস্যা নেই তো?

জু না সমস্যা নেই।

তাহলে চল কফি শেষ করে রওনা দিয়ে দেই।

কফি খেতে কেমন হয়েছে আপনি কিন্তু এখনো বলেন নি।

মিসির আলি নিচু গলায় বললেন, এত ভালো কফি আমি আমার জীবনে
খেয়েছি বলে মনে পড়ে না।

লিলি ক্লান্ত গলায় বলল, থ্যাংক যু।

সে তার মাথার নীল স্কার্ফ খুলে বিশেষ কায়দায় মাথা ঝাঁকি দিয়েছে। তার
চুল ছড়িয়ে পড়েছে চারদিকে। চেহারা আবার পাল্টে গেছে।

মিসির আলির মনে হলো মেয়েটা কখন কি করবে সব আগে থেকে ঠিক
করা। সে যে একটানে মাথা থেকে স্কার্ফ খুলে মাথা ঝাঁকাবে এটাও সে আগে
থেকেই ঠিক করে এসেছে।



মিসির আলি হঠাৎ লক্ষ করলেন তার পা ছমছম করছে। যেন অশুভ কিছু তাঁর জন্যে অপেক্ষা করছে। ভয়ঙ্কর কিছু। লৌকিক কিছু না, অলৌকিক কিছু। অনেককাল আগে তার একবার এ রকম অনুভূতি হয়েছিল। শ্যামগঞ্জ রেলস্টেশনে অপেক্ষা করছেন। গভীর রাত। তিনি এগারো সিঙ্গুর এক্সপ্রেসে বৈরব যাবেন। ট্রেন আসবে ভোর রাতে। পৌষ মাসের মাঝামাঝি। প্রচণ্ড শীত। ওয়েটিং রুমে বসে সময় কাটানোর জন্যে চুকতে যাবেন হঠাৎ তার পা জমে গেল। বুক ধকধক করতে লাগল। মনে হলো ওয়েটিং রুমে অশুভ কিছু আছে। ভয়ঙ্কর কিছু। যে ভয়ঙ্করের কোনো ব্যাখ্যা নেই। তার উচিত কিছুতেই ওয়েটিং রুমে না ঢোকা। একবার চুকলে আর বের হতে পারবেন না।

কৌতুহল সব সময় ভয়কে অতিক্রম করে। তাঁর বেলাতেও তাই হলো। তিনি কৌতুহলী হয়েই উঁকি দিলেন। ওয়েটিং রুমের ইঞ্জি চেয়ারে একজন বৃদ্ধ, হলুদ কম্বল গায়ে দিয়ে শুয়ে আছে। বৃদ্ধের হাতে জুলন্ত সিগারেট। বৃদ্ধ চোখ বন্ধ করে সিগারেট টানছে। মিসির আলি ঘরে চুকলেন। বৃদ্ধ চোখ মেলল না, তবে তার ঠোঁটের কোণায় সামান্য হাসি দেখা গেল। শরীর জমিয়ে দেয়া তীব্র ভয় মিসির আলিকে আবারো আচ্ছন্ন করল। তিনি প্রায় ছিটকে বের হয়ে এলেন। বাকি রাতটা কাটালেন প্ল্যাটফরমে পায়চারি করে। এগারো সিঙ্গুর এক্সপ্রেস ভোর চারটা চালিশে প্ল্যাটফরমে ইন করল। মিসির আলি ট্রেনে ওঠার আগে আরেকবার ওয়েটিং রুমে উঁকি দিলেন। বৃদ্ধ যাত্রী ঠিক আগের জায়গাতেই আছে। মাথা নিচু এবং চোখ বন্ধ করে আগের মতোই সিগারেট টানছে। ঠোঁটের কোণায় আগের মতোই অস্পষ্ট হাসি।

মিসির আলি তাঁর জীবনের এই ভয় পাওয়া ঘটনাকে নানানভাবে ব্যাখ্যা করার চেষ্টা করেছেন। 'সবচে' কাছাকাছি ব্যাখ্যা যেটা দাঁড় করিয়েছিলেন সেটা হলো কিশোর বয়সে তিনি নিশ্চয়ই নির্জন স্টেশনের ওয়েটিং রুমের কোনো ভূতের গল্প পড়ে ভয় পেয়েছিলেন। ভয়টা এতোই তীব্র ছিল যে, মন্তিষ্ঠের নিউরোন সেই শৃঙ্খল মূল্যবান কোনো শৃঙ্খল মনে করে যত্ন করে মেমোরি-সেলে চুকিয়ে রেখেছে। নষ্ট হতে দেয় নি। অনেককাল পরে আরেকটি নির্জন স্টেশন দেখামাত্র মন্তিষ্ঠ মনে করল এ রকম একটা শৃঙ্খল তো আছে। শৃঙ্খলটা বের করে

বর্তমানের সঙ্গে মিলিয়ে দেখা যাক। যেহেতু অনেকদিনের স্মৃতি বের করতে গিয়ে সমস্যা হলো। স্মৃতির কিছু অংশ নষ্ট হয়ে গেল। কিছু অন্য রকম হয়ে গেল। মন্তিক শুধু যে স্মৃতি বের করে আনল তা-না, স্মৃতির মনে জড়িত ভয়ঙ্কর ভীতিও বের করে আনল। এ রকম কাণ্ডকারখানা মন্তিক মাঝে মাঝে করে। এর যেমন মন্দ দিক আছে। ভালো দিকও আছে, মন্তিকের ভেতর হঠাৎ নিউরোনের প্রবল ঝড় সৃষ্টি হয়। এতে ক্ষতিকারক স্মৃতি উড়ে চলে যায়। স্মৃতি জমা করে রাখা মেমরি-সেল খালি হয়।

আজ যে ভয়টা পাচ্ছেন তার পেছনের কারণটা কী? তিনি দাঁড়িয়ে আছেন পাঁচিল-ঘেরা প্রকাণ একটা বাড়ির গেটের কাছে। অঙ্ককারে পাঁচিল-ঘেরা বাড়িটাকে জেলখানার মতো লাগছে। তিনি দাঁড়িয়ে আছেন একা। এতক্ষণ লিলি তার সঙ্গে ছিল। অনেকক্ষণ ডাকাডাকি করে সে দারোয়ান শ্রেণীর কাউকে দিয়ে গেট খুলিয়েছে।

তাও পুরো গেট না। গেটের অংশ যার ভেতর ছোটখাট মানুষ হয়তো-বা কষ্ট করে চুকতে পারে। গেট খুলতেই লিলি তাঁর দিকে ফিরে বলল, স্যার আপনি দাঁড়ান। পাঁচ-ছয় মিনিট লাগবে। আমি কুকুর বেঁধে আসি। আমাদের তিনটা কুকুর আছে। খুবই উগ্র স্বভাব, অপরিচিত কাউকে দেখলে কী করবে কে জানে? আমাকেই একবার কামড়ে দিয়েছিল।

মিসির আলি তারপর থেকে দাঁড়িয়ে আছেন। তিনি ঘড়ি দেখেন নি কিন্তু তাঁর কাছে মনে হচ্ছে পাঁচ-ছ' মিনিটের অনেক বেশি সময় পার হয়েছে। কোনো সাড়াশব্দ পাওয়া যাচ্ছে না। বিশাল বাড়ি কিন্তু পুরোপুরি নিঃশব্দ। তিনটা ভয়ঙ্কর কুকুর অথচ তারা একবারও শব্দ করবে না এটা কেমন কথা? তাছাড়া বাড়ি অঙ্ককারে ডুবে আছে। বিশাল এই বাড়ির একটি ঘরেও বাতি জ্বলবে না, এটাইবা কেমন কথা। এমন তো না যে, এই বাড়িতে মানুষজন থাকে না। রাত তো বেশি হয় নি। খুব বেশি হলে দশটা। যে দারোয়ান গেট খুলেছে তার হাতে কি একটা টর্চ থাকবে না?

এমন গাঢ় অঙ্ককার মিসির আলি অনেকদিন দেখেন নি। নক্ষত্রের আলো পর্যন্ত নেই। আকাশ মেঘে ঢাকা। প্রবল অঙ্ককারে জোনাকি বের হয়। জোনাকিও নেই। অনেকদিন তিনি জোনাকি দেখেন নি। জোনাকি দেখতে পেলে ভালো লাগত।

নদীর আওয়াজ পাওয়া যাচ্ছে। স্রোতের শব্দ। হঠাৎ করেই কি নদী সাড়াশব্দ শুরু করল? এতক্ষণ এই নদী ছিল কোথায়? বকুল ফুলের গন্ধ আসছে। এটা কি বকুল ফুলের সময়? শহরবাসী হয়ে ছোটখাট ব্যাপারগুলি ভুলতে বসেছেন।

গন্ধটা হয়তো বকুল ফুলের না । অন্য কোনো বুনো ফুলের । জায়গাটা বন তো
বটেই । আশপাশে লোকালয় নেই ।

ঘড়ঘড় শব্দ হলো । মিসির আলির চোখ হঠাৎ ধাঁধিয়ে গেল । গেট খুলেছে ।
গেটের ওপাশে জাহাজি লঞ্চ হাতে লিলি দাঁড়িয়ে আছে । তার পাশে দারোয়ান ।
দারোয়ানের হাতে লম্বা টর্চ । পাঁচ ব্যাটারির টর্চ নিশ্চয়ই । এই টর্চে আলো ফেলে
দেখতে ইচ্ছা করছে— আলো কেমন হয় ।

লিলি বলল, স্যার আসুন । ওর শরীরটা খারাপ বলে বাতি নিভিয়ে শুয়ে
পড়েছে । আর আমি খুঁজে পাছি না হারিকেন । বরকতকে দেখুন এত লম্বা টর্চ
নিয়ে ঘুরছে । টর্চে নেই ব্যাটারি । ব্যাটারি ছাড়া টর্চ হাতে নিয়ে ঘোরার দরকারটা
কী স্যার আপনিই বলুন । আপনাকে ব্যাগ হাতে নিতে হবে না । বরকত নেবে ।

মিসির আলি বললেন, তোমার কুকুর কি বাঁধা হয়েছে ?

হঁয় বাঁধা হয়েছে । সকালে কুকুরগুলির সঙ্গে পরিচয় করিয়ে দেব তখন আর
আপনাকে কিছু বলবে না । আপনার থাকার ব্যবস্থা করেছি দোতলার সবচে'

দক্ষিণের ঘরে । ঘরটা তেমন ভালো না, তবে খুব বড় ঘর । এই ঘরের খাটটা
সুন্দর । অন্য ঘরগুলিতে এত সুন্দর রেলিং দেয়া খাট নেই ।

লঞ্চনের আলোয় বাড়িগুর কিছু দেখা যাচ্ছে না । লঞ্চন তার চারপাশ আলো
করছে । দূরে আলো ফেলতে পারছে না । লঞ্চন এবং টর্চের এই হলো তফাত—
লঞ্চন নিজেকে আলোকিত করে । নিজেকে দেখায় । টর্চ অন্যকে আলোকিত
করে ।

সিঁড়িটা সাবধানে উঠবেন স্যার । শ্যাওলা জমে কেমন পিছল হয়ে গেছে ।
রেলিং ধূরে উঠুন । আপনার নিশ্চয়ই খুব ক্ষিধে লেগেছে । ক্ষিধে লেগেছে না
স্যার ?

হঁ লেগেছে ।

আপনি হাত-মুখ ধুয়ে একটু বিশ্রাম করুন । আমি খাবার রেডি করে ফেলব ।
এর মধ্যে কোনো কিছুর দরকার হলে দোতলার বারান্দায় রেলিং ধরে দাঁড়াবেন ।
মাথা নিচু করে বরকত বরকত করে ডাক দেবেন । আমাদের একটাই কাজের
লোক বরকত । একের ভেতর চার । সে-ই দারোয়ান, সে-ই কেয়ারটেকার, সে-
ই মালী, সে-ই কুকুর-পালক । ভাত খাবার আগে চা-কফি কিছু খাবেন ?

থেতে পারি ।

আমি এক্সুপি বরকতকে দিয়ে পাঠিয়ে দিচ্ছি ।

তোমার হাসবেড়ের সঙ্গে কি রাতে দেখা হবে ?

অবশ্যই হবে ।

অসুস্থ বলছিলে ।

অসুস্থ হোক যাই হোক গেস্টের সঙ্গে দেখা করবে না ?

মিসির আলির ঘর পছন্দ হলো । পুরনো বাড়ির একটা সুন্দর ব্যাপার হলো—
ঘরগুলি প্রকাণ্ড । ছোটখাট ফুটবল খেলার মাঠ । কড়ি বর্গার ছাদ অনেক উঁচুতে ।
ছাদ থেকে লম্বা লম্বা লোহার রড নেমে এসেছে । রডের মাথায় ফ্যান । এক
শোবার ঘরেই চারটা ফ্যান । ইলেক্ট্রিসিটি ছাড়া এই ফ্যান চলার কথা না । কাজেই
ধরে নেয়া যেতে পারে এদের জেনারেটর আছে । ফ্যানগুলি পুরনো আমলের
ডিসি ফ্যান না । আধুনিক কালের ফ্যান । ফ্যানের পাখায় জমে থাকা ময়লা থেকে
বোবা যায় যে ফ্যানগুলি ব্যবহার করা হয় ।

ঘরে শোবার খাট দুটা । চারপাশে রেলিং দেয়া প্রকাণ্ড খাটটা ঘরের
মাঝামাঝি রাখা । এই খাটে ওঠার জন্যে দুই ধাপ সিঁড়ি আছে । জানালার পাশে
খাটের সাইজেরই একটা টেবিল । বিশাল টেবিলের সঙ্গে বেমানান ছোট একটা
চেয়ার । চেয়ার টেবিলের উল্টোদিকে দুটা আলমিরা । কাঠের আলমিরা
তালাবক্ষ । চারটা সোফার চেয়ার । চেয়ারে সবুজ মখমলের গদি । চেয়ারের পাশে
পুরনো ডিজাইনের দুটা আলনা । তারপরেও মনে হচ্ছে ঘরটা ফাঁকা । দুটা
খাটেই বিছানা করা হয়েছে । কিছুক্ষণ আগেই করা হয়েছে বলে মনে হচ্ছে ।
একটায় বিছানো হয়েছে ধবধবে সাদা চাদর । সাদা বালিশের ওয়ার । রেলিং দেয়া
খাটে সবকিছুই রঙিন । তবে দুটো খাটেই কোলবালিশ আছে । মিসির আলি
বাথরুমে উকি দিলেন । বাথরুমও প্রায় শোবার ঘরের মতোই বড় । খুবই
আধুনিক বাথরুম । এই বাথরুম অবশ্যই পরে বানানো হয়েছে । যে সময়ের বাড়ি
সে সময়ে টাইলস নামক বস্তু বাজারে আসে নি ।

বাথরুমটা শুধু যে ঝকঝক করছে তা না, বড় বড় হোটেলের মতো করে
গোছানো । বেসিনের উপর সাবান, টুথপেস্ট এবং একটা মোড়ক-না-খোলা
টুথব্রাশ । তোয়ালে রাখার জায়গায় তোয়ালে ঝুলছে । ময়লা নয়— মনে হচ্ছে
এইমাত্র ধোপাখানা থেকে নিয়ে আসা ।

মিসির আলি বেসিনের কলে পানি আশা করেন নি । দোতলায় পানি আসতে
হলে ছাদে পানির ট্যাংক থাকতে হবে । সেই ট্যাংকে পানি তোলার ব্যবস্থা
থাকতে হবে । ট্যাপ ঝুলতেই পানি পাওয়া গেল । অনেকদিন অব্যবহারের পর
হঠাতে কল ঝুললে লাল পানি বের হয়— সে রকম পানি না । পরিষ্কার পানি ।
মিসির আলি মুখে পানি ছিটালেন ।

সিঁড়িতে থপথপ শব্দ করতে করতে কেউ-একজন আসেছে । বাড়ির মালিক
নিশ্চয় নন । তিনি হইল চেয়ারে থাকেন । তাহলে কে আসেছে— দারোয়ান ?

একেকটা সিড়ি ভাঙতে এত সময় নিচ্ছে কেন? নিচয়ই ভারী কিছু নিয়ে আসছে। সেই ভারী বস্তুটা কী হতে পারে? চেয়ার-টেবিল কাঁধে করে আনবে না। তাঁর ঘরে চেয়ার-টেবিল আছে। বালতিতে করে গরম পানি কি আনছে? রাতের বেলার অতিথিদের গরম পানি দেয়ার রেয়াজ আছে। অতিথি গরম পানিতে গোসল করবেন, কিংবা হাত-মুখ ধোবেন। তাঁর প্রতি যে বিশেষ যত্ন নেয়া হচ্ছে তাতে সেটা প্রকাশ পাবে।

না বালতি নিয়ে কেউ আসছে না। বালতি হলে মাঝে মাঝে সিডিতে নামিয়ে রাখত। তার শব্দ পাওয়া যেত। সেই শব্দ পাওয়া যাচ্ছে না। মিসির আলি ঘর থেকে বের হয়ে বারান্দায় চলে এলেন।

দারোয়ান বরকত আসছে। তার কোমরে মাটির কলসি। কলসির মুখ দিয়ে ধোঁয়া বের হচ্ছে, তার মানে কলসিতে করে গরম পানিই আনা হচ্ছে। মিসির আলি স্বত্তির নিঃশ্঵াস ফেললেন। যাক লজিক শেষ পর্যন্ত কাজ করেছে। সিদ্ধান্তে ভুল হয় নি। আজকাল এই ব্যাপারটা তাঁর প্রায়ই হচ্ছে। কোনো বিষয়ে সিদ্ধান্তে আসার পরই টেনশান বোধ করা শুরু করছেন। লজিকের যে সিডিগুলি গাঁথা হয়েছে সেই সিডিগুলি কি ঠিক আছে? সিডি বেয়ে ওঠা যাবে তো?

মিসির আলি জানেন এই সবই হচ্ছে বয়সের লক্ষণ। বয়স মানুষের সবচে' বড় ক্ষতি যা করে— তা হলো আস্তা কমিয়ে দেয়। যাই করা হয় মনে হয় ঠিকমতো বুঝি করা হলো না। ভুল থেকে গেল।

স্যার গরম জল।

বুঝতে পারছি।

সিনান করলে করেন।

গোসল করব না।

বড় সাব সিনান করতে বলেছেন।

তোমার বড় সাহেব বললে তো হবে না। আমার গোসল করতে ইচ্ছে করছে না।

আর কিছু লাগব?

না আর কিছু লাগবে না। ভালো কথা— তুমি গরম পানি না বলে গরম জল বলছ কেন? তোমাদের এদিকে কি পানিকে জল বলা হয়? এটা কি হিন্দুধর্মান অঞ্চল?

বরকত জবাব দিল না। সরু চোখে তাকিয়ে রইল। মিসির আলি বললেন, আচ্ছা ঠিক আছে তুমি যাও।

যাও বলার পরেও সে যাচ্ছে না। আগের মতোই সরু চোখে তাকিয়ে আছে। বলশালী একজন মানুষ। বয়স কত হবে ত্রিশ কিংবা পঁয়ত্রিশ। বেশি ও হতে

পারে। চুলে পাক ধরেছে। মানুষটার বুদ্ধি কেমন? চট করে মানুষের বুদ্ধি বের করার কোনো উপায় এখনো বের করা যায় নি। সাইকোলজিস্টরা নানান ধরনের পরীক্ষা অবশ্য বের করেছেন। কোনো পরীক্ষাই মিসির আলির কাছে গ্রহণযোগ্য মনে হয় না। আসলে বুদ্ধি পরীক্ষার ব্যবস্থা না থেকে থাকা উচিত ছিল বোকামি পরীক্ষার ব্যবস্থা। প্রথম শ্রেণীর বোকাদের জন্যে এক রুকম পরীক্ষা। দ্বিতীয় শ্রেণীর বোকাদের জন্যে আরেক রুকম পরীক্ষা।

বরকত চলে যাচ্ছে। যেতেও দু'বার ফিরে তাকাল। সিঁড়ির কাছে অঙ্ককার। কাজেই তার চোখের দৃষ্টিতে কি আছে বোৰা যাচ্ছে না। কিছু একটা নিশ্চয়ই আছে। নয়তো এত বার করে তাকাত না।

মিসির আলি নিজের ঘরে ঢুকলেন। ঘরটা নিজের মতো করে সাজিয়ে নেয়া দরকার। নিজের গায়ের গন্ধ ঘরময় ছড়িয়ে দিতে হবে। গন্ধ যত ছড়াবে ঘর হবে তত আপন। নিম্নশ্রেণীর পশুরা তাই করে। নিজের গায়ের গন্ধ দিয়ে সীমানা ঠিক করে দেয়। অদৃশ্য সাইনবোর্ড গন্ধ দিয়ে বলে— এই আমার সীমানা। এর ভেতর আর কেউ আসবে না। যদি ভুলে চলেও আস, বেশিক্ষণ থাকবে না। থাকলে সম্ভূত বিপদ।

মিসির আলি সুটকেস খুলে বই বের করলেন। চারটা বইয়ের মধ্যে একটা হলো ক্লোজআপ ম্যাজিকের বই। দড়িকাটার খেলা, পিংপং বল অদৃশ্য করে দেবার খেলার মতো ছোট ছোট ম্যাজিকের কৌশল দেয়া আছে। পড়তে ভালো লাগে। তিনি বইগুলি টেবিলে সাজিয়ে রাখলেন। এত বড় টেবিলে চারটা মাত্র বই দেখতে হাস্যকর লাগছে। মিসির আলি ঠিক করে রাখলেন— এ বাড়ির লাইব্রেরি থেকে বেশ কিছু বই এনে টেবিল ভর্তি করে রাখবেন। চোখের সামনে প্রচুর বই থাকলে ভালো লাগে।

আবারো সিঁড়িতে থপথপ শব্দ হচ্ছে। বরকত কি আবারো ভারী কিছু নিয়ে উঠছে? ব্যাপারটা কী? এবার সে কী আনছে? মিসির আলি দ্রুত বারান্দায় চলে এলেন। বরকত ভারী কিছু তুলছে না। তার হাতে ছোট তেলের শিশির মতো শিশি। অথচ এমনভাবে সে উঠছে যেন তার উঠতে কষ্ট হচ্ছে। মাঝে মাঝে সিঁড়িতে দাঁড়িয়ে সে বিশ্রামও করে নিছে বলে মনে হয়। এমন স্বাস্থ্যবান একজন মানুষের সিঁড়ি ভাঙতে কোনো কষ্ট হবার কথা না। অথচ তার যে কষ্ট হচ্ছে এটা পরিষ্কার। হাতের কোনো অসুখ কি আছে? কিংবা আর্থরাইটিস? ওঠার সময় হাঁটুতে ব্যথা করে?

বরকত মিসির আলির সামনে এসে বলল, অমুখ নিয়া আসছি।

মিসির আলি বিশ্বিত হয়ে বললেন, কীসের অমুখ?

সাপের অমুখ। আপনের ঘরের চারিদিকে দিয়া দিব।

ঘরের চারদিকে সাপের অমুখ দেবে মানে-কী ? দোতলায় সাপ আসবে কীভাবে ?

বরকত প্রশ্নের জবাব দিল না । ঘরে চুকে গেল । মিসির আলি বারান্দায় দাঁড়িয়েই তীব্র কার্বলিক এসিডের গন্ধ পেলেন । তাঁর গন্ধবিষয়ক সমস্যা আছে । কিছু কিছু গন্ধ মনে হয় তাঁর স্নায়ুতে সরাসরি আক্রমণ করে । চট করে মাথা ধরে যায় । কার্বলিক এসিডেও তাই হয়েছে । মিসির আলি ছেউ নিঃশ্বাস ফেলে ভাবলেন, শুধু সাপ না, আমি নিজেও আর এই ঘরে চুকতে পারব না । এই গন্ধ নিয়ে বাস করার চাইতে ঘরে দু'তিনটা সাপ নিয়ে বাস করা অনেক সহজ । মশারি ভালোমতো গুঁজে দিয়ে রাখলে সাপ চুকতে পারবে না । সাপকে খাটে উঠতে হলে খাটের পা বেয়ে উঠতে হবে । সাপের জন্যে এই প্রক্রিয়া খুবই কষ্টকর হবার কথা । সাপ শুধু শুধু এত কষ্ট করবে না ।

বরকত নেমে যাচ্ছে । শিশিটা নিশ্চয়ই ঘরে কোথাও রেখে এসেছে । বোতল থেকে গন্ধ বের হচ্ছে । আচ্ছা বোতলটা সে কোথায় রেখেছে ? খাটের নিচে রেখেছে নিশ্চয়ই । মশার কয়েল জুলিয়ে আমরা বেশির ভাগ সময় জুলন্ত কয়েলটা খাটের নিচে রেখে দেই ।

সিঁড়ি দিয়ে নামতে বরকতের তেমন কষ্ট হচ্ছে বলে মনে হলো না । বেশ দ্রুতই নামছে । বরকতের আর্থরাইটিস নেই, এটা নিশ্চিত ।

সিঁড়ির শেষ মাথায় ছোট একটা শব্দ হলো । জায়গাটা গাঢ় অঙ্ককার । তারপরেও মিসির আলির মনে হলো কে যেন সেখানে বসে আছে । তীক্ষ্ণ দৃষ্টিতে তাঁকে দেখছে । মিসির আলির মনে হলো তাঁর হাতে একটা টর্চ থাকলে ভালো হতো । টর্চের আলো ফেলে দেখা যেত কে ঘাপটি মেরে বসে আছে ? তিনি সিঁড়ি বেয়ে দু'ধাপ নামলেন । উঁচু গলায় বললেন, কে ? কে ওখানে ?

কেউ জবাব দিল না । মিসির আলি আরো কয়েকটা সিঁড়ি টপকালেন আর তখনি শান্ত গভীর পুরুষ গলায় কেউ একজন বলল, স্যার রেলিং ধরে ধরে নামুন । খুব খেয়াল রাখবেন যত বার উঠানামা করবেন । রেলিং ধরে ধরে করবেন । আমার নাম সুলতান । ওয়েল কাম টু মাই ‘ধ্বংসস্তূপ’ । ধ্বংসস্তূপের ইংরেজিটা মনে পড়ছে না বলে বাংলা বললাম । স্যার কেমন আছেন ?

হইল চেয়ারে বসে যে মানুষটি হাত বাড়িয়েছে মিসির আলি কয়েক মুহূর্তের জন্যে তার উপর থেকে চোখ ফেরাতে পারলেন না । কাছাকাছি আসায় মানুষটাকে এখন দেখা যাচ্ছে । কেউ একজন একতলার দরজাও মনে হয় খুলেছে । আলো এসে পড়েছে মানুষটার মুখে । অত্যন্ত সুপুরুষ একজন মানুষ । অতিথিকে স্বাগতম বলার জন্যে যিনি বিশেষভাবে পোশাক পরেছেন । ইন্ত্রিরি করা ধরধরে সাদা প্যান্টের সঙ্গে, হালকা নীল ফুল হাফ শার্ট । পোশাকটায় স্কুল-ড্রেস

শুল-ড্রেস ভাব আছে। কিন্তু এই মানুষটাকে খুব মানিয়েছে। অন্দরে চশমা পরেন, নাকের কাছে চশমার দাগ আছে, কিন্তু এখন চোখে চশমা নেই। তাঁর বড় বড় ভাসা ভাসা চোখ, বুদ্ধিতে ঝিকমিক করছে। বয়স পঞ্চাশের বেশি। মাথা ভঙ্গি কাঁচা-পাকা চুল। কাঁচা-পাকা চুলের যে আশ্চর্য সৌন্দর্য আছে, তা এই মানুষটার চুলের দিকে তাকালে পরিষ্কার বোৰা যায়।

স্যার আপনি আমার প্রশ্নের জবাব দেন নি। আপনি কেমন আছেন?

আমি ভালো আছি।

ঘরটা পছন্দ হয়েছে?

কার্বলিক এসিড দেয়ার আগ পর্যন্ত পছন্দ ছিল। আমার কিছু গন্ধবিষয়ক সমস্যা আছে।

আপনি এসেছেন আমি অসম্ভব খুশি হয়েছি। খুশির প্রকাশটা অবশ্য করতে পারছি না। আপনি তীক্ষ্ণ বুদ্ধির মানুষ, আপনি নিশ্চয়ই আমার খুশি ধরতে পারছেন।

মিসির আলি কিছু বললেন না। মানুষটা যে খুশি হয়েছে, তা বোৰা যাচ্ছে। আনন্দিত মানুষের ভেতর অস্ত্রিতা থাকে। ব্যথিত মানুষ চুপচাপ হয়ে যায়। এই মানুষটা অস্ত্রিত। হইল চেয়ার নিয়ে এদিক-ওদিক করছে।

আমি আপনাকে খাবার ঘরে নিয়ে যাবার জন্যে অনেকক্ষণ থেকে সিঁড়ির গোড়ায় বসে আছি। আপনি বারান্দায় দাঁড়িয়ে ছিলেন, আমি নিচ থেকে আপনাকে লক্ষ করছিলাম। আমার মনে হচ্ছিল কোনো একটা বিষয় নিয়ে আপনি দুশ্চিন্তা করছিলেন। দুশ্চিন্তার বিষয়টা ধরার চেষ্টা করছিলাম।

দুশ্চিন্তা করছিলাম না। আপনার স্ত্রী লিলি কোথায়?

ও রান্না শেষ করে ঘুমুতে চলে গেছে। ভুল বললাম, সে চলে যায় নি। আমি তাকে জোর করে পাঠিয়েছি। ওর কিছু মানসিক সমস্যা আছে। সমস্যাগুলি হঠাৎ হঠাৎ দেখা দেয়। আপনাকে নানান কৌশল করে এখানে আনার অনেকগুলি কারণের মধ্যে একটা কারণ হলো লিলির ব্যাপারটি নিয়ে আপনার সঙ্গে আলাপ করা।

ও আচ্ছা।

স্যার আসুন। খেতে আসুন। খাবার ঘরটা একতলায়। একতলায় থাকায় গুণ্ঠা। আমি যেতে পারছি। দোতলায় হলে যেতে পারতাম না।

মিসির আলি ভেবেছিলেন বিশাল একটা খাবার ঘর দেখবেন। তা দেখলেন না। ছোট ঘর। খাবার টেবিলটাও ছোট। টেবিলের পাশে একটামাত্র চেয়ার। ইমে হচ্ছে একজনের জন্যেই খাবার ব্যবস্থা করা হয়েছে। এই ঘরের প্রধান আকর্ষণ মোমদানি। রূপার তৈরি মোমদানিতে এক সঙ্গে একুশটা মোমদানি

জুলছে। ঘর আলো হয়ে আছে। মোমদানিটা খাবার টেবিলে রাখা।

মিসির আলি চেয়ারে বসতে বসতে বললেন, আপনি খাবেন না?

জু না। সন্ধ্যার পর আমি কিছু খাই না। আগে পানি, চা-কফি খেতাম। এখন তাও না। সূর্য ডুবল মানে আমার খাওয়ার পর্ব শেষ।

মিসির আলি একবার ভাবলেন জিজ্ঞেস করেন— সূর্য ডোবার পর কেন খান না? শেষ পর্যন্ত প্রশ্নটা করলেন না। সূর্য ডোবার পর খাদ্য গ্রহণ না করার পেছনে অন্দরোকের নিশ্চয়ই কিছু যুক্তি আছে। সেইসব যুক্তি তিনি যদি অন্যদের জানাতে চান— প্রশ্ন না করলেও জানাবেন।

সূর্য ডোবার পর আমি খাওয়া বন্ধ করে দিয়েছি কেন জানেন?

না জানি না।

সরি, আমি আপনাকে খুবই বোকার মতো প্রশ্নটা করলাম। সন্ধ্যার পর আমি কেন কোনো খাদ্য গ্রহণ করি না সেটা তো আপনার জানার কথা না। তবে আপনার লজিকেল ডিডাকসানের যে ক্ষমতা আপনি নিশ্চয়ই বের করে ফেলেছেন?

আমি কিছু বের করি নি।

স্যার আপনি খাওয়া শুরু করুন। সব টেবিলে দেয়া আছে। আপনি খেতে থাকুন। আমি গল্পটা বলি। এক রাতে খেতে বসেছি; হঠাৎ মনে হলো— পৃথিবীর পশ্চ পাথি— কীট পতঙ্গ কোনো কিছুই রাতে খাদ্য গ্রহণ করে না। জীব জগতের নিয়মই হলো রাতে খাদ্য গ্রহণ না করা। এমনকি উড়িদণ্ড সূর্যের আলো নিয়ে খাদ্য তৈরি করে দিনে, রাতে না। আর আমরা মানুষরা জীব জগতের সমস্ত নিয়ম ভঙ্গ করে রাতে খাদ্য গ্রহণ করছি। এটা তো ঠিক হচ্ছে না। তারপর থেকে সূর্য ডোবার পর ফুড ইনটেক পুরোপুরি বন্ধ করে দিলাম। প্রথম কিছুদিন কষ্ট হয়েছে। এখন আর হচ্ছে না। এখন ভালো আছি। শরীর খুবই ফিট। যার সঙ্গেই দেখা হয় তাকেই গল্প বলার ছলে বলতে চেষ্টা করি— সূর্য ডোবার পর খাদ্য গ্রহণ করা ঠিক না।

মিসির আলি প্লেটে ভাত নিতে নিতে বললেন, জীব জগতের কেউই রাতে খাবার খায় না?

বাদুর আর পেঁচা খায়। এরা নিশাচর— এদেরটা হিসেবে ধরছি না। আমি যে বকবক করছি আপনি বিরক্ত হচ্ছেন না তো?

বিরক্ত হচ্ছি না।

প্রথম দফাতে অনেক বিরক্ত করে ফেলেছি। আর করব না। আপনি খাওয়াদাওয়া শেষ করে বিশ্রাম করুন। আমি বইয়ে পড়েছি আপনি একা খেতে পছন্দ করেন। সবকিছু দেয়া আছে। আপনি খান। আমি পাশের ঘরেই থাকব।

কোনো দরকার হলে ডাকবেন।

মিসির আলি বিব্রত গলায় বললেন, আমার একা খাওয়াটা কোনো নিয়মের কারণে না। একা থাকি বলেই একা থাই।

একা খেয়ে আপনার অভ্যাস হয়ে গেছে। হঠাৎ করে এই অভ্যাস ভাঙ্গনো ঠিক হবে না। আপনি খাওয়া শেষ করুন— তখন শুভ রাত্রি জানানোর জন্য আসব। আপনাকে খুব স্পেশাল ডেজার্টও খাওয়াব।

খাবার আয়োজন বেশি না। আলু ভাজা, মুগের ডাল, করলা ভাজি, বেগুন ভাজি, সজনের ঝোল, পটলের ঝোল এবং ডাল। সবই নিরামিশ। একটা বাটিতে ধি, অন্য একটা বাটিতে তেঁতুলের আচার। মিসির আলি অত্যন্ত ত্বক্ষি করে খেলেন। লিলি মেয়েটির রান্নার হাত যে অসাধারণ— এ বিষয়ে কোনো সন্দেহই নেই। এত অল্প সময়ে এতগুলি পদ সামনে দেয়া সহজ ব্যাপার না। মেয়েটার অসুস্থতার ব্যাপারটি এখনো মিসির আলির কাছে পরিষ্কার হয় নি। তাঁর কাছে মনে হচ্ছে মেয়েটাকে যে-কোনো কারণেই হোক তার সামনে আসতে দেয়া হচ্ছে না, কিংবা সে নিজেই আসছে না। এই মুহূর্তে ব্যাপারটা নিয়ে ভাবতে ইচ্ছা করছে না।

মিসির আলি খাওয়া শেষ করার সঙ্গে সঙ্গেই সুলতান চুকল। তাঁর হাতে কাচের মুখ খোলা বোয়ম এবং একটা চামচ। সে কি আড়াল থেকে মিসির আলির খাওয়া দেখছিল? তা না হলে খাওয়া শেষ হওয়া মাত্র তার উপস্থিত হওয়াটা সম্ভব না।

স্যার আপনার ডেজার্ট। অনেক রকম ডেজার্ট খেয়েছেন, এটাও খেয়ে দেখুন। আপনাকে মেপে মেপে দু' চামচ দেব। দু' চামচের বেশি খাওয়া ঠিক হবে না। তবে আপনার যদি আরো খেতে ইচ্ছে করে, তাহলে খাবেন। সাধারণত দু' চামচের বেশি খেতে ইচ্ছা করে না।

সোনালি রঙের ঘন তরল পদার্থ। হারিকেনের আলোয় বিকাশিক করে গৃহে। সুলতান বলল, তজনীতে মাখিয়ে মাখিয়ে মুখে দিন। এইভাবেই খাওয়ার নিয়ম।

মিসির আলি বললেন, জিনিসটা কি মধু?

জু মধু।

বিশেষ কোনো মধু?

অবশ্যই বিশেষ মধু। 'চাকভাঙ্গা মধু' এই বাক্যটা নিশ্চয়ই শনেছেন। এটা হলো চাকভাঙ্গা মধু। সুন্দরবনের মধুয়ালীরা মার্চ-এপ্রিল মাসে এই মধু সংগ্রহ করে। এই সময় খলসা ফুল ফুটে। মৌমাছিরা খলসা ফুল থেকে মধু জমা করে। কেওরা ফুলের মধুও আছে। সেটাও খারাপ না। তবে খলসা ফুলের মতো ভালো

মধু পৃথিবীর আর কোথাও আছে বলে আমি মনে করি না ।

মিসির আলি আঙুলে মধু মাখিয়ে মুখে দিলেন । তিনি বিশেষ কোনো পার্থক্য অনুভব করতে পারলেন না । ঘন মিষ্টি সিরাপে হালকা ফুলের গন্ধ ।

অন্য মধুর সঙ্গে পার্থক্য বুঝতে পারছেন ?

না । মধু আমি খাই না । যারা নিয়মিত খায় তারা হয়তো পার্থক্যটা ধরতে পারবে । আমি পারব না ।

আপনিও পারবেন । আমার কাছে এই মুহূর্তে আট রকমের মধু আছে । অস্ট্রেলিয়ান মধু, কানাডার মধু, আয়ারল্যান্ডের মধু এবং পাঁচ রকমের সুন্দরবনের মধু । সব আপনাকে খাওয়াব । আপনি নিজেই পার্থক্য ধরতে পারবেন । আপনি যখন এ বাড়ি থেকে বিদায় নেবেন তখন আপনি মোটামুটিভাবে একজন মধু বিশেষজ্ঞ ।

মিসির আলি মধু শেষ করে উঠে দাঁড়ালেন ।

সুলতান বলল, যান শুয়ে পড়ুন । সকালবেলা নাশতা খেতে খেতে আগামী কয়েক দিনের প্রোগ্রাম সেট করে ফেলব ।

আচ্ছা ।

পান খাবার অভ্যাস আছে ?

না ।

কাঁচা সুপারি দিয়ে একটা পান খেয়ে দেখুন । কাঁচা সুপারিতে এলকালয়েড আছে । এই এলকালয়েড স্নায়ুর উপর কাজ করে । শরীরে হালকা বিম বিম ভাব নিয়ে আসে । ইন্টারেক্টিং সেনসেশন ।

মিসির আলি কাঁচা সুপারির একটা পান মুখে দিলেন । সুলতান বলল, আপনার ঘর পাল্টে দিয়েছি । কার্বলিক এসিডের গন্ধ আপনার কাছে বিরক্তিকর এটা জানতাম না । এই ঘরটায় কার্বলিক এসিড দেয়া হয় নি ।

দোতলায় সাপ কি সত্য আছে ?

থাকার কোনোই কারণ নেই । তবে সাপ দেখা গেছে । আমি নিজেই দেখেছি । আমি সাপ চিনি না । যেটাকে দেখেছি তার ফণা আছে । কাজেই বিষ থাকার কথা ।

বলেন কী ?

আপনার খাটটা ঠিক ঘরের মাঝখানে দিতে বলেছি । খাটের নিচে জুলন্ত হারিকেন থাকবে । সাপ কার্বলিক এসিডের চেয়েও বেশি ভয় পায় আলো । মশা নেই, তবু মশারি খাটিয়ে ঘুমাবেন । বাথরুমে যাবার প্রয়োজন হলে ভালোমতো মেঝে দেবে তারপর নামবেন । আপনার কি ভয় লাগছে ?

সামান্য লাগছে। সাপ আমার পছন্দের প্রাণী না।

আমার নিজেরও না। আমি এই পৃথিবীতে একটা জিনিসই ভয় পাই। তার নাম সাপ। মানুষ নানান রকম দুঃস্বপ্ন দেখে আমি একটা দুঃস্বপ্নই দেখি—আমি সাপের সঙ্গে শুয়ে আছি। বেশ স্বাভাবিকভাবেই শুয়ে আছি। স্বপ্নটা দেখার সময় ভয় লাগে না। স্বপ্নটা যখন ভেঙে যায় তখন প্রচণ্ড ভয় লাগে। গা ঘিনঘিন করতে থাকে। বারবার গোসল করি তারপরেও মনে হয় সাপের স্পর্শ শরীরে লেগে আছে। আপনার সঙ্গে এই বিষয়টা নিয়ে পরে কথা বলব।

আচ্ছা।

আমি দোতলা পর্যন্ত আপনাকে এগিয়ে দিতে পারছি না। ইচ্ছা থাকলেও সম্ভব না। হইল চেয়ার দোতলায় ওঠাবার কোনো ব্যবস্থা নেই। বরকত আপনাকে নতুন ঘর দেখিয়ে দেবে।

এত বড় বাড়িতে আপনারা তিন জন মাত্র মানুষ!

আমরা হয় জন ছিলাম। এখন তিন জন। জার্নি করে এসেছেন আপনি ক্লান্ত। শুয়ে পড়ুন। কাল আপনার সঙ্গে কথা হবে। আমার উচিত ছিল ঘর পর্যন্ত আপনাকে এগিয়ে দেয়া সেটা সম্ভব না। বরকত এগিয়ে দেবে।

কোনো অসুবিধা নেই।

বরকতের অনিদ্রা রোগ আছে। সে কুকুরগুলির সঙ্গে সারারাত জেগে থাকে। আপনার যদি কোনো কিছুর প্রয়োজন হয়— সিঁড়ির কাছে এসে ওকে ডাকলেই হবে।

থ্যাংক যু।

নতুন জায়গায় ঘুম যদি না আসে তার জন্যে আপনার ঘরে ফ্রিজিয়াম জাতীয় কিছু ট্যাবলেট দিতে বলেছি। লিলি নিশ্চয়ই দিয়েছে। রাত জেগে যদি বই পড়তে চান তার ব্যবস্থাও করেছি। The Other Mind বইটাও আপনার বিছানার কাছে আছে। বইটা কি পড়েছেন?

না।

পাঁচ জন সিরিয়াল কিলারের মানসিকতা ব্যাখ্যা করে বইটা লেখা হয়েছে। আমি নিজে খুবই আগ্রহ করে বইটা পড়েছি। আপনার অনেক বেশি ভালো লাগবে বলে আমার ধারণা।

বরকত এক গাদা জিনিসপত্র সঙ্গে নিয়েছে। ফ্লাক্স আছে, চায়ের কাপ আছে, পানির বোতল আছে। মিসির আলির চোখ ঘুমে জড়িয়ে আসছে। ফ্লাক্স ভর্তি চা থাকলেও তিনি যে রাত জাগবেন এবং চা খাবেন তা মনে হচ্ছে না। বরকত পাশে পাশে হাঁটছে। মনে হচ্ছে তার হাঁটতে খুবই কষ্ট হচ্ছে।

নতুন যে ঘরে মিসির আলিকে থাকতে দেয়া হয়েছে সে ঘরটাও প্রায় আগেরটার মতই বড়। তবে আসবাবপত্র নেই। ঘরের মাঝখানে কাল রঙের খাট। খাটের পাশেই ছোট টেবিল। টেবিলে হারিকেন আছে, একটা কেরোসিনের টেবিল ল্যাম্প আছে, দেয়াশলাই এবং মোমবাতিও রাখা আছে। ঘুমের অমুধ রাখা হয়েছে, এক ধরনের নয়—বেশ কয়েক ধরনের। The Other Mind বইটি রাখা হয়েছে বিছানায় বালিশের উপর।

শোবার আগে বই পড়া মিসির আলির অনেক দিনের অভ্যাস। পড়ার বই তিনি সঙ্গে এনেছেন। বাইরে বেড়াতে গেলে হালকা ধরনের বইপত্র পড়তেই ভালো লাগে। সাইকেলজির কঠিন বই না। কিন্তু এ বাড়ির কর্তা যে-কোনো কারণেই হোক চাচ্ছে যেন তিনি The Other Mind বইটি পড়েন। আজ পড়া যাবে না, কারণ ঘুমে চোখ বন্ধ হয়ে আসছে।

মিসির আলি দরজার ছিটকিনি লাগাতে গেলেন। জং ধরে ছিটকিনি আটকে গেছে। অনেক চেষ্টা করেও ছিটকিনি লাগাতে পারলেন না। লাভের মধ্যে লাভ এই হলো যে ঘুম কেটে গেল। মিসির আলি ডায়েরি বের করলেন—কয়েক পৃষ্ঠা লিখবেন। এতে মন্তিক্ষ ফ্লাস্ট হবে। তারপর বই নিয়ে বসবেন। সাইকেলজির কঠিন বই না, জেরোম কে জেরোমের এক নায়ে তিনজন।

টেবিলে যদিও দুটা বাতি তারপরেও এই আলো লেখার জন্যে যথেষ্ট মনে হচ্ছে না। মিসির আলি লিখে আরাম পাচ্ছেন না। এক সময় তাঁর মনে হলো শুধু যে আলোর অভাবেই তিনি লিখে আরাম পাচ্ছেন না, তা না। যে বিষয় নিয়ে লিখছেন সেই বিষয়টি লিখতেও ভালো লাগছে না। মনের ভেতরে এক ধরনের চাপ সৃষ্টি হচ্ছে।

‘এখন রাত একটা কুড়ি। আমার অনেকদিনের অভ্যাস ঘুমুতে যাবার আগে হয় কিছুক্ষণ লিখি, নয় বই পড়ি। লাল মলাটের এই ডায়েরিটা আমি কিনেছিলাম নির্জন সমুদ্রবাসের অভিজ্ঞতা লেখার জন্যে। সমুদ্রবাস এই মুহূর্তে করতে না পারলেও নির্জনবাস ঠিকই করছি। যাদের বাড়িতে আমি আছি তারা আমাকে খুবই আন্তরিকতার সঙ্গে গ্রহণ করেছে কিন্তু আমি কেন যেন ঠিক স্বত্ত্ব পাচ্ছি না। আমার শুধুই মনে হচ্ছে—কোথাও একটা সমস্যা আছে। আমি সমস্যা ধরতে পারছি না। সমস্যার নিয়ম হলো—সমস্যাটা যদি এমন হয় যে খুবই স্পষ্ট তাহলে সেই সমস্যা ধরা যায় না। ধরতে সময় লাগে।

এরা খুব আগ্রহ করে আমাকে এই বাড়িতে এনেছে। আগ্রহের পেছনের কারণটা কী? আমাকে আকাশের তারা দেখানের জন্যে, কিংবা ভালো ভালো থাবার রান্না করে খাওয়াবার জন্যে নিশ্চয়ই আনে নি। আমি অতি বিখ্যাত কোনো ব্যক্তি না যে এ বাড়িতে কিছুদিন থেকে গেলে এদের সামাজিক মর্যাদা বৃদ্ধি

পাবে। এরা বলতে পারবে—আমাদের সঙ্গে মিসির আলি কিছুদিন ছিলেন। তিনি আমাদের অতি বক্সু মানুষ। প্রায়ই আসেন। আগামী সামারে আবার আসবেন। এই দেখুন মিসির আলির সঙ্গে আমাদের ছবি।

সুলতান বা তার স্ত্রী আমার কাছ থেকে ঠিক কি চাচ্ছে তা এখনো ধরতে পারছি না বলে আমার অস্বাস্তিটা কাটছে না। তারা কোনো বিপদে আছে বলে আমার মনে হয় না। বিপদে থাকলে প্রথম রাতেই বিপদের কথা জানতে পারতাম। এদের আচার আচরণে সামান্য অস্বাভাবিকতা আছে এটা থাকবেই। একটা বিশাল পঁচিল ঘেরা বাড়িতে দিনের পর দিন যদি তিনটি মানুষ বাস করে তাহলে তাদের চরিত্রে পরিবেশের প্রভাব প্রবলভাবে পড়বে। পরিবারের প্রধান মানুষটি হইল চেয়ারে জীবন যাপন করছেন। এর প্রভাবও বাকিদের উপর পড়বে। আক্রিকার আদিবাসি এক জনগোষ্ঠীর উপর একবার একটি সমীক্ষা চালানো হয়েছিল। দেখা গেল এরা সবাই খুঁড়িয়ে খুঁড়িয়ে হাঁটে। কারণ অনুসন্ধান করে পাওয়া গেল এদের দলপতি বাঁ পায়ে ব্যথা পেয়েছিল। ব্যথার কারণে সারাজীবন তাকে খুঁড়িয়ে হাঁটতে হয়েছে। তাই সংক্রমিত হয়েছে পুরো দলের উপর।

আমি এ বাড়ির তিন সদস্যকে আলাদা আলাদাভাবে দেখার চেষ্টা করছি, আবার দলবদ্ধভাবেও দেখার চেষ্টা করছি। সুলতানকে আমার মনে হয়েছে আস্ত্রবিশ্বাসী একজন মানুষ। আমি যা করছি ঠিক করছি, আমি যা ভাবছি ঠিক ভাবছি গোত্রের একজন। একই ব্যাপার লিলির মধ্যে এবং বরকতের মধ্যেও দেখলাম। দীর্ঘদিন কিছু মানুষ যদি একটি গম্ভীর বাস করে তাহলে একটা পর্যায়ে তারা তাদের ব্যক্তিস্বাতন্ত্র্য হারিয়ে ফেলতে শুরু করে। এদের ক্ষেত্রেও কি তাই হতে যাচ্ছে?

সুলতানের আট ধরনের মধু এবং মধু নিয়ে তার বাড়াবাড়ি উচ্চাসের কারণটা ধরতে পারছি না। যারা মদ্যপান করেন এবং ভালো মদের ব্যাপারে যাদের আগ্রহ আছে তাদের মধ্যে এই উচ্চাস দেখা যায়। নানান ধরনের মদ সংগ্রহ করতে এবং অতিথিদের তা দেখাতে এরা পছন্দ করেন। সুলতানের মধুর ব্যাপারটা শুরুতে আমি সে রকম কিছুই ভেবেছিলাম। পরে লক্ষ করলাম ব্যাপারটা সে রকম না। আমি নিশ্চিত যে সুলতান মধু খায় না। কারণ সে যখন আমাকে মধু দিছিল তখন তার নাক এবং ভুরু সামান্য কুঞ্চিত হলো। যে শুটকি কখনো খায় না তার সামনে এক বাটি শুটকির খোল দিলে সে এই ভঙ্গিতেই নাক কুঁচকাবে। আমি একবার ভেবেছিলাম তাকে সরাসরি জিজ্ঞেস করি সে মধু খায় কি-না। শেষ পর্যন্ত জিজ্ঞেস করি নি। আমি যে চোখ খোলা রেখে সব দেখছি তা ঠিক এই মুহূর্তে এদের জানতে দিতে চাচ্ছি না। বরকত নামের দারোয়ানের একটা বিষয় আমার চোখে লাগছে। আমি লক্ষ করেছি সিঁড়ি বেয়ে উঠতে তার

খুবই কষ্ট হয়। দেখে মনে হয় কষ্টটা শারীরিক। আমার ধারণা তা না। আমার ধারণা কষ্টটা মানসিক। দোতলার কোনো ভয়ঙ্কর শৃঙ্খি কি তার মাথায় আছে? যে কারণে দোতলায় ওঠার ব্যাপারে তার অনাগ্রহ আছে?

লিলি মেয়েটি নিজের চারদিকে এক ধরনের রহস্য তৈরি করার জন্যে ব্যস্ত। এটি অস্বাভাবিক না। মেয়ে মাঝই নিজেকে রহস্যময়ী হিসেবে উপস্থিত করতে চায়। মেয়েটি বুদ্ধিমত্তা। সে নানানভাবে আমার বুদ্ধির হিসেব নিতে চাচ্ছে। দাঢ়ি পাল্লায় বুদ্ধি মাপতে চাচ্ছে। তার ভাবভঙ্গি দেখে মনে হচ্ছে আমার বুদ্ধির ব্যাপারটা তার কাছে জরুরি। কেন জরুরি? সে-কী আমার বুদ্ধি ব্যবহার করতে চায়? কোথায় ব্যবহার করবে...’

এই পর্যন্ত লিখে মিসির আলি হাই তুললেন। তার ঘূর্ম পাচ্ছে। এখন ঘূর্মানো যায়।



মিসির আলি বিড়বিড় করে বললেন, *This is a dream. Nothing but a dream.* যে বিশ্঵ায়কর ঘটনা এই মুহূর্তে তাঁর চোখের সামনে ঘটছে সেটা স্বপ্ন ছাড়া আর কিছুই হতে পারে না। স্বপ্নে বিশ্বায়কর ঘটনা খুব স্বাভাবিকভাবে ঘটে। এখানেও তাই ঘটছে। তিনি পরিষ্কার দেখতে পাচ্ছেন তাঁর মশারির ছাদে একটা সাপ কুণ্ডলি পাকিয়ে শুয়ে আছে। কুণ্ডলি ভেঙে সাপটা মাথা বের করল। এই তো এখন মশারি বেয়ে নিচে নামছে। সাপের গায়ে লম্বা লম্বা দাগ থাকে— এর গায়ে ফুটি ফুটি। অনেকটা চিত্রা হরিণের মত।

তিনি আবারো বিড়বিড় করে বললেন, *This is a dream. Nothing but a dream.* স্বপ্নের নানান স্তর আছে। তিনি নিচয়ই গভীর কোনো স্তরের স্বপ্ন দেখছেন। এ ধরনের স্বপ্ন চট করে ভাঙে না। মানুষের মন্ত্রিক স্বপ্নটা পুরোপুরি দেখানোর ব্যবস্থা করে। তার বেলাতেও এই ব্যাপারটিই হচ্ছে। স্বপ্নটা প্রথম থেকে শেষ পর্যন্ত তাঁকে দেখতে হবে। তাঁর মন্ত্রিক দেখাবে। তিনি না চাইলেও দেখাবে।

যদি ঘটনাটা স্বপ্ন হয়ে থাকে তাহলে তাঁর চুপচাপ শুয়ে সাপটার দিকে তাকিয়ে থাকা ছাড়া কিছু করার নেই। চোখ বন্ধ করলেও সাপটা চলে যাবে না। তাঁর চোখ বন্ধ না করার সঙ্গে স্বপ্নের কোনো সম্পর্ক নেই। আর যদি স্বপ্ন না হয়ে থাকে তাহলে অনেক কিছুই করার আছে। শুয়ে না থেকে তাঁর উঠে বসা দরকার। হাততালি দেয়া দরকার। সাপ শব্দ পছন্দ করে না। যে-কোনো ধরনের কম্পন তার কাছে বিরক্তিকর। খাটটা দোলানো যেতে পারে। বালিশের নিচে সিগারেট আছে। সিগারেট ধরানো যেতে পারে। সিগারেটের ধোয়াও নিচয়ই সাপটা পছন্দ করবে না।

মিসির আলি উঠে বসার সিদ্ধান্ত নিলেন কিন্তু অনেক চেষ্টা করেও বসতে পারলেন না। এর দুটা কারণ হতে পারে। স্বপ্নে নিজের ইচ্ছায় কিছু করা যায় না। তিনি উঠে বসার চেষ্টা করছেন কিন্তু পারছেন না। কাজেই এটা স্বপ্ন। আর স্বপ্ন না হয়ে ঘটনাটা যদি সত্যি হয় তাহলে তিনি উঠে বসতে পারছেন না, কারণ তিনি প্রচণ্ড ভয় পেয়েছেন। ভয়ে স্নায়ুতে স্থৱিরতা চলে এসেছে। মন্ত্রিক উঠে

বসার সিগন্যালটা ঠিকমত দিতে পারছে না। যে সব রাসায়নিক বস্তু নিউরনের বিদ্যুৎ প্রবাহ নিয়ন্ত্রণ করে তাদের ভেতরের ভারসাম্য নষ্ট হয়ে গেছে। তিনি বালিশের নিচে হাত দিয়ে সিগারেট নিলেন। সিগারেট ধরালেন। তামাকের গন্ধ পাওয়া গেল। তাহলে কি এটা স্বপ্ন না, সত্যি? স্বপ্ন হলো সিনেমার পর্দায় ছবি দেখার মতো— ছবি দেখা যাবে, শব্দ শোনা যাবে তবে কোনো গন্ধ পাওয়া যাবে না। স্বপ্ন গন্ধ এবং বর্ণহীন।

তিনি গন্ধ পাচ্ছেন এবং রংও দেখছেন। সাপের গায়ের হলুদ ফুটি স্পষ্ট দেখেছেন। এই তো এখন তাঁর হাতে বেনসন এন্ড হেজেস-এর সোনালি প্যাকেট। গাঢ় লাল রঙের উপর লেখা Special filter.

তবে এখানেও কথা আছে, গভীর স্তরের স্বপ্নে বর্ষ গন্ধ সবই থাকে। আচ্ছা এমন কি হতে পারে তিনি যা দেখছেন তা স্বপ্ন না, বাস্তব ঘটনা। তাঁকে তো আগেই বলা হয়েছে এই বাড়ির দোতলায় সাপ আছে। যদি সাপ থেকেই থাকে তাহলে ঘরে সাপ আসতেই পারে। কারণ এই ঘরটায় কার্বনিক এসিড দেয়া হয় নি।

ধরে নেয়া যায় একটা সাপ ঘরে ঢুকেছে। আলো সমস্ত প্রাণীকুলকে কৌতুহলী করে সাপটাকেও করেছে। সে এগিয়ে এসেছে খাটের নিচে রাখা হারিকেনের দিকে। এখানে এসে সে শুনতে পেল নিঃশ্বাস ফেলার শব্দ। খাট থেকে শব্দটা আসছে। সাপটা আবারো কৌতুহলী হলো। সে দেখতে গেল ব্যাপারটা কী? কীসের শব্দ? শব্দটা কোথেকে আসছে? দেখতে গিয়ে সে চলে গেল মশারির ছাদে। তার কৌতুহল মিটেছে বলে সে এখন চলে যাচ্ছে। কিংবা তার কৌতুহল মিটে নি। সে চলে যাচ্ছে কারণ সে বুঝতে পারছে কৌতুহল মেটার কোনো সংভাবনা নেই।

মিসির আলি বিছানায় উঠে বসলেন। বালিশের কাছে হাত বাড়ালেন। টর্চ লাইটটা আছে। তিনি টর্চের আলো ফেললেন। সাপটা দেখা যাচ্ছে না। খাট বেয়ে নিশ্চয়ই নেমে গেছে। তিনি কয়েকবার কাশলেন। টর্চ লাইটে টোকা দিলেন। বসে বসেই খাট নাড়ালেন। তিনি এখন বিছানা থেকে নামবেন। তাঁকে একটা কাজ করতে হবে। ছেটখাট একটা পরীক্ষা। তাঁকে যেতে হবে বড় টেবিলটার কাছে। টেবিলের উপর ডায়েরি আছে। ডায়েরির পাতায় কিছু একটা লেখে নাম সই করতে হবে।

এই মুহূর্তে যা ঘটছে তা স্বপ্ন না সত্যি তা প্রমাণ হবে ডায়েরির লেখা থেকে। সকালে ঘুম ভেঙে যদি দেখেন ডায়েরিতে কিছু লেখা নেই তাহলে বুঝতে হবে পুরো ব্যাপারটা স্বপ্ন। আর যদি দেখেন লেখা আছে তাহলে বুঝতে হবে যা দেখেছেন সবই সত্যি। মিসির আলি খুব সাবধানে বিছানা থেকে নামলেন। সাপটাকে প্রথমবার দেখে যে ভয় পেয়েছিলেন, সেই ভয়টা এখন আর লাগছে না। তবে গা ছমছম করছে।

মেঝেতে কোথাও সাপটাকে দেখা গেল না। মিসির আলি টেবিলের কাছে গেলেন। ডায়েরিতে লিখলেন—“আজ সাত তারিখ। আমি আমার মশারির উপর একটা সাপ দেখেছি।” লিখে নাম সই করলেন। ডায়েরি উল্টে এমনভাবে টেবিলে রাখলেন যেন সকালে ঘুম ভাঙতেই চোখে পড়ে ডায়েরিটা উল্টানো। টেবিলের কাছ থেকে গেলেন দরজার কাছে। দরজা খুলে বাইরে যাবেন। কিছুক্ষণ বারান্দায় দাঁড়াবেন। ঘরের ভেতর দমবন্ধ লাগছে।

তিনি দরজায় ছিটকিনি না দিয়েই শুয়েছিলেন। পুরনো আমলের বাড়ি ছিটকিনি জং ধরে আটকে গিয়েছিল। যেহেতু ছিটকিনি লাগানো নেই, আংটা ধরে টানলেই দরজা খুলে যাবার কথা। কিন্তু আশ্চর্য দরজা খুলতে পারলেন না। প্রাণপণে টেনেও দরজা নাড়ানো গেল না। মনে হচ্ছে দরজা বাইরে থেকে বন্ধ। তিনি বেশ কয়েকবার চেষ্টা করলেন। কোনো লাভ হলো না। মিসির আলি খাটে এসে উঠলেন। হৈ তৈ চিৎকার করার কোনোই মানে হয় না। পুরো ব্যাপারটা স্বপ্ন হবার সন্তাননা অনেক বেশি। কাজেই তাঁর যা করণীয় তা হলো বিছানায় চলে যাওয়া। ঘুমিয়ে পড়া এবং ঘুম ভাঙার জন্যে অপেক্ষা করা।

মিসির আলি বিছানায় শুয়ে পড়লেন। শীত শীত লাগছে। পায়ের কাছে রাখা চাদর বুক পর্যন্ত টেনে দিলেন। একটা হাত রাখলেন কোলবালিশের উপর। তিনি চোখ বন্ধ করে আছেন। মাথার ভেতরে সমুদ্র গর্জনের ঘতো শব্দ হচ্ছে। এ রকম শব্দ কেন হচ্ছে কে জানে? প্রচণ্ড ভয় পাবার পরে কি মানুষের শরীর বৃত্তীয় কর্মকাণ্ড খানিকটা এলোমেলো হয়ে যায়?

তাঁর ঘুম ভাঙল অনেক বেলায়। ঘর ভর্তি আলো। পাখপাখালি চারদিকে কিচকিচ করছে। খাটের পাশে লিলি দাঁড়িয়ে আছে। তার হাতে চায়ের কাপ। আজ মেয়েটিকে দেখে মনে হচ্ছে তার বয়স কিছুতেই সতেরো আঠারো বছরের বেশি হবে না। লিলি বাসিমুখে বলল, চাচাজি আপনি দরজার ছিটকিনি না লাগিয়েই ঘুমিয়েছেন?

মিসির আলি উঠে বসতে বললেন, ছিটকিনি লাগাতে পারি নি।

লিলি বলল, আমি তো আর সেটা জানি না। এর আগেও দু'বার এসে বন্ধ দরজার সামনে দাঁড়িয়ে থেকে চলে গেছি। এইবার কী মনে করে দরজা ধাক্কা দিলাম। ধাক্কা দিতেই দরজা খুলে গেল। চাচাজি রাতে ঘুম কেমন হয়েছে?

ভালো।

নিন চা নিন। আমি বইয়ে পড়েছি আপনি বাসিমুখে দিনের প্রথম চা খান। নাশতা তৈরি আছে। হাত মুখ ধুয়ে নিচে নামলেই নাশতা দিয়ে দেব।

তোমার শরীর এখন ভালো?

শরীর খুব ভালো । কাল রাতেও ভালো ছিল । ওর সঙ্গে রাগারাগি করে বিছানায় শুয়ে পড়েছিলাম । ও আপনাকে কী বলেছে ? আমার মাথা খারাপ ? আমার চিকিৎসা দরকার ?

এই ধরনেরই কিছু ।

লিলি হাসতে হাসতে বলল, ওর কোনো দোষ নেই । রাগারাগির এক পর্যায়ে আমি মাথা খারাপের অভিনয় করেছি । ও আমার অভিনয় ধরতে পারে না । চাচাজি আমার চা কেমন হয়েছে ?

ভালো হয়েছে ।

কাল রাতের খাবারটা কেমন ছিল ?

ভালো ছিল । আমি খুব ত্ণি করে খেয়েছি ।

আজ আপনাকে কই মাছের পাতুরি খাওয়াব । পুই শাকের পাতা আনতে পাঠিয়েছি । পাওয়া গেলে হয় । এমন জংলা জায়গায় বাস করি । আশে পাশের দু'তিন মাইলের মধ্যে হাটবাজার নেই ।

মিসির আলি কাপে চুমুক দিতে দিতে বললেন, লিলি একটা কাজ কর তো— টেবিলের উপর দেখ আমার ডায়েরিটা উল্টো করে রাখা আছে । পাতাটা খুলে দেখ কী লেখা ।

লিলি টেবিলের কাছে গেল । ডায়েরি উল্টো করে রাখা নেই । বইগুলির উপর রাখা । লিলি বলল, চাচাজি টেবিলের উপর কোনো ডায়েরি উল্টো করে রাখা নেই ।

লাল মলাটের বইটি ডায়েরি । সাত তারিখ বের করে দেখ তো কিছু লেখা আছে কি না ।

লিলি অবাক হয়ে বলল, কিছু লেখা নেই । কী লেখা থাকবে ?

মিসির আলি হালকা গলায় বললেন, রেখে দাও । কিছু লেখা থাকবে না । তোমার স্বামীর ঘুম কি ভেঙ্গেছে ?

ওর ঘুম একটার আগে ভাঙ্গে না । সারা রাতে জেগে তারা দেখেছে । আপনাকে কী কী দেখাবে সব ঠিকঠাক করেছে । আজ আপনাকে কী দেখানো হবে জানেন ?

না ।

শনির বলয় । এইসব দেখে কী হয় কে জানে ! আমার খুবই ফালতু লাগে । চাচাজি আমি নিচে যাচ্ছি । হাতমুখ ধুয়ে আপনি নেমে আসুন । আজ আপনি নাশতা খাবেন চুলার পাশে বসে । গরম গরম লুচি ভেজে পাতে তুলে দেব ।

তোমার লুচিগুলি কি স্পেশাল ?

অবশ্যই। অর্ধেক ময়দা আৰ অর্ধেক সুজিদানা মিশিয়ে কাই তৈরি কৱা হয়। দশ বারো ঘণ্টা এই কাই ভেজা ন্যাকড়ায় জড়িয়ে রেখে দিতে হয়। লুচিৰ কাই আমি কাল রাতেই তৈরি কৱে রেখেছি।

ভালো।

গুধু ভালো বললে হবে না। আপনি চলে যাবাৰ আগে আমাকে একটা সার্টিফিকেট দিয়ে যাবেন। রান্নার সার্টিফিকেট। সেই সার্টিফিকেট আমি বাঁধিয়ে রাখব।

অবশ্যই দিয়ে যাব। তুমি চাইলে এখনি দিয়ে দিতে পাৰি।

ওমা এখন কেন দেবেন? আমি তো এখনো আপনার জন্যে রান্নাই কৱি নি। চাচাজি যাই।

লিলি চলে যাবাৰ পৱ মিসিৰ আলি টেবিলেৰ কাছে গেলেন। ডায়েৱি হাতে নিলেন। সেখামে স্বপ্নেৰ কথা কিছু লেখা নেই। তাহলে ব্যাপাৰটা কি দাঁড়াল? গত রাতে যা দেখেছেন সবই স্বপ্ন? গভীৰ গাঢ় স্বপ্ন?

মিসিৰ আলি হাত মুখ ধুয়ে নিচে নামলেন। লুচি বেগুনভাজা খেলেন। চা খেলেন। লিলি বলল, চাচাজি আপনি ঘুৰে ফিৰে বাড়ি দেখুন। বাগান দেখুন। লাইব্ৰেৱি ঘৰ খুলে রেখেছি। লাইব্ৰেৱিৰ বইপত্ৰ দেখতে পাৱেন।

তোমাৰ কুকুৱগুলি কি বাঁধা আছে?

হঁয়া কুকুৱ বাঁধা। বৱকতকে পুঁই পাতাৰ খৌজে পাঠিয়েছি। বড় বড় পুঁই পাতা ছাড়া পাতুৱি হয় না। বৱকত এলেই কুকুৱগুলিৰ সঙ্গে আপনার পৱিচয় কৱিয়ে দেব। তখন আপনার কুকুৱ-ভীতি থাকবে না।

নীল ফুল ফোটে ঐ গাছটা কোথায়?

পেছনেৰ বাগানে। বিশাল গাছ আপনি দেখলেই চিনতে পাৱবেন। গাছেৰ গুঁড়িটা বাঁধানো। পেছনেৰ বাগানে একটা ভাঙা মন্দিৰ আছে। মন্দিৱে চুক্বেন না। সাপেৱ আড়ডা।

কী মন্দিৱ?

কালী মন্দিৱ। হিন্দু বাড়ি ছিল। বাড়িৰ মালিক অশ্বিনী রায় শাক্ত মতেৱ মানুষ ছিলেন। স্বপ্নে দেখে তিনি কালী প্ৰতিষ্ঠা কৱেন। খুবই ইন্টাৱেন্টিং গল্ল। আমি ভাসা ভাসা জানি। সুলতানকে জিজ্ঞেস কৱলেই আপনাকে বলবে।

আছা তাকে জিজ্ঞেস কৱব।

লিলি বলল, আমি ঐ দিনেৰ মতো এক্সপ্ৰেসো কফি বানিয়ে আপনার জন্যে নিয়ে আসছি। ঠিক আছে চাচাজি?

ঠিক আছে।

মিসির আলি বাড়ি দেখতে বের হলেন। রাতে বাড়িটা যত প্রকাও মনে হয়েছিল দিনের আলোয় মনে হচ্ছে তার চেয়েও প্রকাও। তবে প্রকাও হলেও ধ্বংসস্তুপ। বাড়িটা যেন অপেক্ষা করছে কখন হৃষি খেয়ে পড়বে। বাড়িটার দিকে বেশিক্ষণ তাকিয়ে থাকা যায় না। ভয় ভয় করে। মনে হয় বাড়িটাও কৌতুহলী চেখে তাঁকে দেখছে। চিন্তা ভাবনা করছে। চিন্তা ভাবনা শেষ হলেই বাড়ি গঠীর গলায় ডাকবে, এই যে অদ্বলোক আপনার সঙ্গে কিছু কথা আছে, দয়া করে শুনে যান।

মিসির আলি বাড়ির পেছনে চলে গেলেন। তিনি বৃক্ষ প্রেমিক না। গাছপালা নিয়ে তাঁর বাড়াবাড়ি কৌতুহল নেই, কিন্তু নীল মরিচ ফুল গাছটা দেখতে ইচ্ছা হচ্ছে।

বাড়ির পেছনের জায়গাটা আশ্চর্য-রকমভাবে পরিষ্কার। বোপ ঝাড় নেই, বড় বড় ঘাস নেই, গাছের নিচে শুকনো পাতা পড়ে নেই। মনে হচ্ছে এই কিছুক্ষণ আগে ঝাঁট দেয়া হয়েছে। নীল মরিচ ফুল গাছটা দূর থেকে দেখা যাচ্ছে। এমন কিছু বিশ্বয়কর গাছ বলে মনে হচ্ছে না। তবে মরিচ ফুল গাছের পাশেই চেরী গাছ ফুলে ফুলে ছেয়ে আছে। পাতাশূন্য গাছ সাদা ফুলে ঢেকে আছে। মিসির আলি বিস্মিত গলায় বললেন, বাহু সুন্দর তো!

চেরী গাছের পাতা শীতকালে ঝরে যায়। এখন শীত না, তারপরেও গাছে একটা পাতা নেই কেন? জন্মভূমি ছেড়ে অন্যদেশে এসে গাছের জীনে কি কোনো পরিত্বন হয়েছে? না-কি এটা চেরী গাছ না, অন্য কোনো গাছ। তিনি নাম জানেন না।

ভাঙ্গা মন্দিরটা দেখা যাচ্ছে। মন্দিরের অংশটা ঝোপঝাড়ে ঢাকা। বড় বড় কয়েকটা আম গাছ জায়গাটা অঙ্ককার করে রেখেছে। উইয়ের টিবির মতো কিছু উঁচু মাটি দেখা গেল। মন্দিরের ঠিক সামনে সারি করে লাগানো জবা গাছ। জবা গাছ এত বড় হতে মিসির আলি দেখেন নি। গাছগুলি আম কঁঠালের গাছের মতোই প্রকাও। একটা গাছেই শুধু ফুল ফুটেছে। কালচে লাল রঙের ফুল। দেখতে ভালো লাগে না। জবা ফুল ছাড়া কালী পূজা হয় না। পূজার ফুলের জন্যই কি এই গাছগুলি লাগানো? এত প্রাচীন গাছ? মিসির আলি মন্দিরের দিকে এগিয়ে গেলেন।

মন্দিরের গায়ে শ্বেত পাথরের ফলকে কী সব লেখা। পড়তে ইচ্ছা করছে।

বাবু অশ্বিনী কুমার রায়

কর্তৃক

অদ্য শনিবার বঙ্গাদ ১২০৮ গৌর কালী মূর্তি অধিষ্ঠিত হইল।

মিসির আলি নামফলকের দিকে তাকিয়ে আছেন। গৌর কালী মূর্তি ব্যাপারটা বোঝা যাচ্ছে না। কালী কৃষ্ণ বর্ণ, গৌর বর্ণ না।

চাচাজি আপনার কফি। আপনাকে বলা হয়েছে মন্দিরের কাছে না আসতে আর আপনি সোজাসুজি মন্দিরে চলে এসেছেন। আপনি দেখি একেবারে বাচ্চাদের মতো। যেটা করতে না করা সেটাই করেন।

মিসির আলি কফির মগ হাতে নিতে নিতে বললেন, গৌর কালী ব্যাপারটা কী?

গৌর কালী হলো যে কালীর গায়ের রঙ গৌর। ধৰধৰে সাদা। বাবু অশ্বিনী রায় স্বপ্নে দেখেছিলেন মা কালী তাঁকে বলছেন— তুই আমাকে প্রতিষ্ঠা কর। তবে গায়ের রঙ কালো করিস না বাবা। গৌর বর্ণ করবি। অশ্বিনী কুমার রায় বললেন, ঠিক আছে মা করব। দেবী তখন বললেন, আমি তোর এখানে থাকব নগু অবস্থায়। আমার গায়ে যেন কোনো কাপড় না থাকে। অশ্বিনী কুমার রায় বললেন, সেটা কি ঠিক হবে মা? কত ভক্তরা তোমাকে দেখতে আসবে! দেবী বললেন, কেউ আমাকে দেখতে আসবে না। তোকে যা করতে বললাম তুই কর।

মিসির আলি বললেন, অশ্বিনী কুমার নগু গৌর বর্ণের কালী প্রতিষ্ঠা করলেন?

লিলি বলল, হ্যাঁ।

মন্দিরে কি মূর্তি আছে?

না। অশ্বিনী কুমার রায় নিজেই মূর্তিটা মেঘনায় ফেলে দিয়েছিলেন।

কেন?

গল্পটা আমি পুরোপুরি জানি না। ভাসা ভাসা জানি। দূরবীনওয়ালা, অর্থাৎ সুলতান সাহেবে ভালোমতো জানে। ও আপনাকে গুছিয়ে বলবে।

আগে তোমার কাছ থেকে অগোছালোভাবে শুনি। অগোছালো গল্প শুনতেই আমার বেশি ভালো লাগে।

ঘটনাটা হলো এ রকম— যেদিন দেবী প্রতিষ্ঠিত হলো সেই রাতেই অশ্বিনী বাবুকে দেবী স্বপ্নে দেখা দিয়ে বললেন, এই বোকা ছেলে! নরবলি ছাড়া শক্তির প্রতিষ্ঠা হয়? তুই এক কাজ কর আগামী অমাবস্যায় নরবলি দে। অশ্বিনী বাবু বললেন, এইটা পারব না মা। আমি মহাপাতক হব। দেবী বললেন, পাপ-পুণ্যের তুই বুঝিস কী? তোকে যা করতে বললাম কর। নয়তো মহাবিপদে পড়বি। অশ্বিনী বাবু স্বপ্নের মধ্যেই কাঁদতে কাঁদতে বললেন, এই কাজটা পারব না মা। নরবলি ছাড়া তুমি যা করতে বলবে তাই করব। দেবী তখন বললেন, তুই যখন পারবি না তখন আমার ব্যবস্থা আমিই করব। তখন তোর দুঃখের সীমা থাকবে না। অশ্বিনী বাবুর ঘুম ভেঙে গেল। দুশ্চিন্তায় তিনি অস্তির হয়ে গেলেন। খুবই

কানুকাটি শুরু করলেন। আগামী অমাবস্যায় না জানি কি হয়!

কিছু হয়েছিল?

হ্যাঁ হয়েছিল। অশ্বিনী বাবুর বড় মেয়েকে মন্দিরের ভেতর পাওয়া গেল। বড় মেয়ের নাম শ্বেতা। বয়স আঠারো উনিশ। বিয়ের কথা চলছিল। সকালে মন্দিরে চুকে অশ্বিনী বাবু দেখেন, মেয়ের মাথা একদিকে ধড় আরেক দিকে। দেবীর খাড়ায় চাপ চাপ রক্ত।

কী সর্বনাশ!

অশ্বিনী বাবুর মাথা খারাপের মতো হয়ে গেল। তিনি সেই রাতেই দেবী মূর্তি মেঘনা নদীর মাঝখানে ফেলে দিয়ে এলেন।

উনার কি একটাই মেয়ে ছিল?

ওনার চার মেয়ে ছিল। দু'মাসের মাথায় দ্বিতীয় মেয়েটিরও একই অবস্থা হলো। মন্দিরের ভেতর তাকে পাওয়া গেল মাথা একদিকে ধড় আরেক দিকে। অশ্বিনী বাবু বাড়ি ঘর বিক্রি করে বাকি দুই মেয়ে আর স্ত্রীকে নিয়ে প্রথমে গেলেন ডিক্রুগরে সেখান থেকে শিলিঙ্গড়িতে। শিলিঙ্গড়িতে তাঁর ত্বরীয় মেয়েটির একই অবস্থা হলো। তখন তাঁর স্ত্রী সীতাদেবী মামলা করলেন স্বামীর বিরুদ্ধে। সীতাদেবী বললেন, হত্যার ঘটনাগুলি তাঁর স্বামী ঘটাচ্ছেন। দোষ দিচ্ছেন মাকালীর। ছোট মেয়েটাও বাবার বিরুদ্ধে সাক্ষ্য দিল।

মামলার রায় কী হয়েছিল?

ওনার ফাসি হয়েছিল।

ভূমি এতসব জানলে কী করে?

এই মামলা নিয়ে অনেক লেখালেখি হয়েছে। আমাদের দূরবীনওয়ালা সেইসব লেখা সবই যোগাড় করেছিল। আপনি চাইলেই আপনাকে খুঁজে বের করে দেবে। আপনি কি চান?

না আমি চাই না।

লিলি বলল, আমাকে দেখে কি বুঝতে পারছেন যে আমার মনটা খুব খারাপ?

না বুঝতে পারছি না।

আমার মনটা খুবই খারাপ কারণ পুঁই পাতা পাওয়া যায় নি। বড় বড় পুঁই পাতা দিয়ে পেঁচিয়ে পাতুরি করতে হয়। কলাপাতা দিয়েও হয়। তবে ভালো হয় না।

মিসির আলি হেসে ফেলে বললেন, মন খারাপের কারণটা তো মনে হয় খুবই গুরুতর।

আপনার কাছে গুরুতর মনে না হতে পারে আমার কাছে গুরুতর । ও যেমন তারা দেখে, আমি করি রান্না । কোনো রাতে যদি আকাশ মেঘে ঢেকে যায় ওর প্রচণ্ড মেজাজ খারাপ হয় ঠিক সে রকম আমি যখন রান্নার জিনিসপত্র পাই না, আমার মেজাজ খারাপ হয় । এটা কি দোষের ?

না দোষের না । এত সুন্দর বাগান তুমি এখানে বেড়াতে আস না ?

লিলি বলল, কখনো না । নেঁটা দেবীর আশে পাশে আমি থাকব ? পাগল হয়েছেন ? তাছাড়া গাছপালা আমার ভালোও লাগে না । চাচাজি শুনুন আমি চলে যাচ্ছি । খবরদার আপনি কিন্তু মন্দিরের ভেতর চুকবেন না ।

আচ্ছা চুকব না । তোমার স্বামীর ঘূম ভেঙেছে ?

হ্যাঁ ভেঙেছে ।

তার নাশতা খাওয়া শেষ ?

সে নাশতা খাবে না । দুপুরে ভাত খেয়ে আবার ঘুমিয়ে পড়বে । ঘূম না এলে ঘুমের অশুধ খেয়ে ঘুমাবে ।

কেন ?

রাত জাগবে । আজ সে আপনাকে নিয়ে তারা দেখবে ।

আজ কি অমাবস্যা ?

আগামীকাল অমাবস্যা ।

মিসির আলি বললেন, ক'দিন ধরেই যেমন মেঘলা মেঘলা যাচ্ছে—অমাবস্যার রাতে যদি আকাশে মেঘ থাকে তাহলে তো সমস্যা ।

লিলি নিচু গলায় বলল, আপনার আর কী সমস্যা । সমস্যা আমার । আকাশে মেঘ দেখলে ও প্রচণ্ড রেগে যায় । হৈ চৈ করে । অমাবস্যা হলো বৃষ্টির সময় । অন্যদিন বৃষ্টি না হলেও অমাবস্যায় বৃষ্টি হবেই । চাঁদের আকর্ষণ বিকর্ষণের কিছু ব্যাপার নিশ্চয়ই আছে । আমি জানি না । আপনি নিশ্চয়ই জানেন ।

আমিও জানি না ।

কফির মগটা দিন আমি নিয়ে চলে যাই । দুপুরের রান্না হলে খবর দেব চলে আসবেন । এখন নিজের মনে ঘুরে বেড়ান । শুধু দয়া করে মন্দিরে চুকবেন না ।

মিসির আলি নীল মরিচ গাছের নিচে বসলেন । কালো সিমেন্টে বাঁধানো বেদী, বসার জন্যে সুন্দর । বই সঙ্গে নিয়ে এলে বই পড়া যেত । দোতলায় উঠে বই আনতে ইচ্ছা করছে না । আচ্ছা গতরাতের ঘটনাটা নিয়ে কি কিছু ভাববেন । না থাক এখনো সময় হয় নি । মন্দিরের ভেতরটা একবার উঁকি দিয়ে দেখতে ইচ্ছা করছে । মেয়েটা যদিও নিষেধ করেছে । নিষেধ অগ্রাহ্য করার একটা প্রবণতা হয়তো মানুষের ডিএনএ'র ভেতরই আছে । মানুষকে যেটাই নিষেধ করা হয়েছে

সেটাই সে করেছে। ব্যাপারটা শুরু করেছিলেন আদি মানব আদম। তাঁকে কোনো ব্যাপারে নিষেধ করা হয় নি, শুধু বলা হয়েছিল— গন্ধম ফলটা খেও না। আদম প্রথম যে কাজটা করলেন সেটা হলো গন্ধম ফল খাওয়া।

এডমন্ড হিলারীর মা'র ছিল উচ্চতা ভীতি। তিনি তাঁর পুত্রকে বললেন, তুমি আর যাই কর বাড়ির ছাদে উঠবে না। সেই হিলারী এভারেষ্টের চূড়ায় উঠে বসে থাকলেন।

মিসির আলি মন্দিরের দিকে রওনা হলেন। ভেতরে ঢোকার দরকার নেই— তিনি শুধু উঁকি দিয়ে চলে আসবেন। পরিত্যক্ত মন্দিরে সাপ থাকা স্বাভাবিক তবে কাল রাতের ঘটনার পর দিনের সাপ তত ভয়ঙ্কর হবে বলে মনে হয় না।

মন্দিরে ঢোকার দরজাটা কাঠের। দরজায় হৃক আছে। তালা লাগানোর ব্যবস্থাও আছে। কিন্তু দরজায় তালা নেই। মিসির আলি ধাক্কা দিতেই দরজা খুলল। মেঝে শ্বেত পাথরের, ঝক ঝক করছে। মনে হচ্ছে এই মাত্র কেউ এসে সাবান পানি দিয়ে ধুইয়ে দিয়ে গেছে। তার চেয়েও বিশ্বাসকর ঘটনা হলো মন্দিরে মূর্তি আছে। গৌর কালীর নগ্ন মূর্তি।

এখানেই বিশ্বাসকর সমাপ্তি না। এর চেয়েও বিশ্বাসকর ব্যাপার হলো মূর্তিটি দেখতে অবিকল লিলির মতো। যেন কোনো ভাস্কর এসে লিলিকে দেখে পাথর কেটে কেটে মূর্তি বানিয়েছে। কাকতালীয়ভাবে একটা মানুষের চেহারার সঙ্গে পুরনো মূর্তির চেহারা মিলে যাবে এটা বিশ্বাসযোগ্য না। এটা খুবই অবিশ্বাস্য একটা ঘটনা।

মিসির আলি মন্দির থেকে বের হলেন। চেরী গাছটার নিচে বরকত দাঁড়িয়ে আছে। তার হাতে শলার ঝাড় বাগান ঝাঁট দিয়ে এসেছে। তবে সে এই মুহূর্তে বাগান ঝাঁট দিচ্ছে না, এক দৃষ্টিতে তাকিয়ে আছে মিসির আলির দিকে। সেই দৃষ্টিতে কৌতুহল, বিশ্বাস আনন্দ কোনো কিছুই নেই। সে তাকিয়ে আছে মাছের মত ভাবলেশহীন চোখে।

মিসির আলি মন্দির থেকে বের হয়ে মন্দিরের পেছনের দিকে হাঁটতে শুরু করলেন। বরকত চোখের দৃষ্টিতে এখনো তাঁকে অনুসরণ করছে। তাঁর দৃষ্টির আড়ালে যাবার জন্যেই মন্দিরের পেছনে চলে যাওয়া দরকার।

মন্দিরের পেছনটা সম্পূর্ণ অন্যরকম। একটা কুয়া আছে। কুয়ার পাড় পাথর দিয়ে বাঁধানো। কুয়ার উপরে তারের জাফরি। সেখানে বাগান বিলাস গাছ। গাছ ভর্তি ফুল। অঙ্ককার কুয়া, ফুলের কারণে আলো হয়ে আছে। নদীর কাছের বাড়িতে কখনো কুয়া থাকে না। এই কুয়াটাই প্রমাণ করে দিচ্ছে একসময় নদী অনেক দূরে ছিল। মিসির আলি কুয়ার পাড়ে উঠলেন। পানি আছে কি-না দেখতে হবে। পাথর নিয়ে ফেলতে হবে।

মিসির আলি কুয়াতে পাথর ফেলতে পারলেন না। তার আগেই তাঁকে চমকে
উঠতে হল, কারণ ঝাঁটা হাতে বরকত এসে দাঁড়িয়েছে। মিসির আলি বললেন,
কিছু বলবে ?

বরকত জবাব দিল না। চোখও নামিয়ে নিল না।

মিসির আলি বললেন, বাগান ঝাঁট দিতে এসেছ ?

বরকত বলল, না।

মিসির আলি বললেন, তোমার কুকুরগুলির সঙ্গে এখনো পরিচয় হয় নি। চল
যাই কুকুরগুলির সঙ্গে পরিচিত হয়ে আসি।

বরকত বলল, আপনেরে ডাকে।

কে ডাকে ?

বরকত এই প্রশ্নের জবাব না দিয়ে বাড়ির দিকে আংগুল উঁচিয়ে দেখাল।
মিসির আলি বললেন, কে ডাকছে ? লিলি ?

বরকত জবাব দিল না। আংগুল উঁচিয়ে রাখল। মিসির আলি আংগুল লক্ষ্য
করে এগুলেন। বরকত এখনো হাত নামাচ্ছে না। তীর চিহ্ন আঁকা সাইনবোর্ডের
মত হাত স্থির করে রেখেছে। তাকে দেখাচ্ছে কাক তাড়ুয়ার মতো।

হাতের আঙুল লক্ষ্য করে মিসির আলি উপস্থিত হলেন লাইব্রেরি ঘরে।
বিরাট ঘর। সাধারণত লাইব্রেরি ঘরের চারদিকেই বই থাকে। এই ঘরের
একদিকের দেয়ালে বই রাখা। কোনো আলমিরা নেই। সব বই র্যাকে রাখা।
র্যাকের উচ্চতা এমন যে হইল চেয়ারে বসেই হাত বাড়িয়ে বই নেয়া যায়।

লাইব্রেরি ঘরের ঠিক মাঝখানে হইল চেয়ারে সুলতান বসে আছে।
সুলতানের সামনে টি টেবিলের মতো ছোট টেবিল। সুলতানের উল্টেদিকে
আরেকটা হইল চেয়ার।

সুলতান হাসি মুখে বলল, স্যার কেমন আছেন ? মিসির আলি বললেন,
ভালো।

আপনার বসার জন্যে একটা হইল চেয়ার রেখে দিয়েছি।

তাইতো দেখছি।

সুলতান গলার স্বর গঞ্জির করে মাথা সামনের দিকে খানিকটা ঝুঁকিয়ে বলল,
সাধারণ চেয়ার না রেখে আপনার জন্যে হইল চেয়ার কেন রেখেছি বলতে
পারবেন ?

না, বলতে পারব না।

আপনি কি বিশ্বিত হচ্ছেন ?

সামান্য হচ্ছি।

স্যার বিশ্বিত হবার কিছু নেই। আমি ব্যাখ্যা করলেই বুঝবেন আপনার জন্যে হইল চেয়ারের ব্যবস্থা করাটা খুবই যুক্তিযুক্ত। আপনি চেয়ারটায় আরাম করে বসুন আমি ব্যাখ্যা করছি।

মিসির আলি বললেন। সুলতান বলল, চেয়ারের কন্ট্রোলগুলি দেখে নিন। পায়ের এখন আর আপনার কোন ব্যবহার নেই। চেয়ার ঘোরানো, সামনে পেছনে যাওয়া, সবই এখন থেকে করবেন হাতে। কাজটা এক হাতেও করতে পারেন তবে দুটা হাত ব্যবহার করলে পরিশ্রম কম হবে।

মিসির আলি বললেন, আমারতো আর এই চেয়ারে বসে অভ্যন্তর হবার দরকার নেই। আমি বসলাম আমার মতো। আপনি হইল চেয়ারের রহস্যটা ব্যাখ্যা করুন।

সুলতান বলল, স্যার লিলি আপনাকে চাচাজি ডাকে। সেই সূত্রে আপনি অবশ্যই আমাকে ভূমি করে বলবেন।

আচ্ছা বলব।

এখন বলি কেন আপনার জন্যে হইল চেয়ারের ব্যবস্থা করলাম। আমি আকাশের বিশেষ বিশেষ দিকে টেলিস্কোপ ফিট করি। তারপর আসে ফোকাসের ব্যাপারটা। টেলিস্কোপ স্ট্যান্ডে বসিয়ে এই কাজটা আমাকে করতে হয় হইল চেয়ারে বসে। একবার টেলিস্কোপ সেট করা হয়ে গেলে সেখানে আর হাত দেয়া যাবে না। সেটিং বদলানো যাবে না। স্যার বুঝতে পারছেন?

পারছি।

হইল চেয়ারে বসে আমি টেলিস্কোপ সেট করলাম। তারপর হইল চেয়ার নিয়ে সরে গেলাম—আপনি আরেকটা হইল চেয়ার নিয়ে টেলিস্কোপের কাছে চলে এলেন। আপনাকে কষ্ট করতে হলো না। আপনাকে আর দাঁড়িয়ে, হাঁটু গেড়ে কিংবা কুঁজো হয়ে টেলিস্কোপে চোখ রাখতে হবে না। হইল চেয়ারের লজিকটা কি এখন আপনার কাছে পরিষ্কার হয়েছে?

মিসির আলি হাসিমুখে বললেন, হ্যাঁ পরিষ্কার হয়েছে। খুবই যুক্তিযুক্ত ব্যাখ্যা। ব্যাখ্যাটা চট করে মাথায় আসে না বলে শুরুতে হইল চেয়ার দেখে একটা ধাক্কার মত খেয়েছিলাম।

সুলতান হাসতে হাসতে বলল, আজ যেমন মন্দিরে চুকে আপনি একটা ধাক্কার মত খেলেন। মন্দিরে চুকে দেখলেন গৌর কালীর মূর্তি দেখতে অবিকল লিলির মত। এরও কিন্তু অত্যন্ত সরল ব্যাখ্যা আছে।

কী ব্যাখ্যা?

গৌর কালীর মূর্তি বাবু অশ্বিনী কুমার অনেক আগেই নদীতে ফেলে দিয়েছিলেন। এই মূর্তিই পরে আমি বানিয়েছি। হইল চেয়ারে বসে জীবন কাটে

না । নানান ধরনের কাজে নিজেকে ব্যস্ত রাখতে গিয়ে মাইকেল এঙ্গেল হবার হাস্যকর চেষ্টা । ছেনি হাতুড়ি নিয়ে পাথর কাটাকাটি ।

মূর্তিটা সুন্দর হয়েছে ।

মোটেও সুন্দর হয় নি । মুখের আদলটা শুধু এসেছে । আর কিছু আসে নি । নগ্ন মূর্তি বলে আপনি লজ্জায় ভালোমত তাকান নি । ভালোমত তাকালে ক্রটিগুলি ধরতে পারতেন । মূর্তির একটা হাত বড়, একটা ছোট । পায়ের প্রোপরশন ঠিক হয় নি । হাঁটু যেখানে থাকার কথা তারচে' উঁচুতে হয়েছে । আপনি এখন যদি দেখেন তাহলে ক্রটিগুলি চোখে পড়বে । মূর্তিটা নগ্ন কেন বানিয়েছি সেই ব্যাখ্যা শুনতে চান ? তারও ব্যাখ্যা আছে ।

না । এর ব্যাখ্যা আমার কাছে আছে । গৌর কালীর মূর্তিটা ছিল নগ্ন । তুমি মন্দিরে গৌর কালী প্রতিষ্ঠা করতে চেয়েছ । অতীত ফিরিয়ে আনার চেষ্টা । ইংরেজিতে সহজভাবে বলা যায় An attempt to recreate the past.

ব্যাপারটা তাই বাবু অশ্বিনী রায়ের ঘটনাটা আমাকে খুবই আলোড়িত করে । আমার মূর্তি বানানোতেও তার একটা ছায়া পড়েছে ।

মিসির আলি বললেন, তোমার কি মাঝে মাঝে নিজেকে বাবু অশ্বিনী কুমার মনে হয় ?

সুলতানকে দেখে মনে হলো মিসির আলির এই কথায় সে একটা ধাক্কার মত খেয়েছে । নিজেকে সামলাতে তার সময় লাগছে । তার ভুরু কুঁচকে আছে । চোখের দৃষ্টি তীক্ষ্ণ । সে পকেট থেকে সিগারেটের প্যাকেট বের করতে করতে বলল, এই কথাটা কেন বললেন স্যার ?

এম্বি বললাম, মন্দিরে মূর্তি প্রতিষ্ঠা থেকে এটা মনে হলো । কোনো মানুষকে খুব বেশি পছন্দ হয়ে গেলে জীবন যাত্রায় সেই মানুষটার ছায়া পড়ে ।

সুলতান কঠিন গলায় বলল, অশ্বিনী কুমার একজন সিরিয়াল কিলার । সে ঠাণ্ডা মাথায় একের পর এক মানুষ খুন করেছে । খুনগুলি করেছে অতি প্রিয়জনদের । নিজের কন্যা । তাকে আমার পছন্দ হবে কেন ?

মানুষের পছন্দ অপছন্দের ব্যাপারটা অত্যন্ত বিচিত্র । মানুষ সুন্দর যেমন পছন্দ করে, অসুন্দরও করে ।

সবাই করে না । কেউ কেউ হ্যাত করে ।

সুন্দরের পূজাও সবাই করে না । কেউ কেউ করে ।

সুলতান অসহিষ্ণু গলায় বলল, আপনি কি বলতে চাচ্ছেন পরিষ্কার করে বলুন ।

মিসির আলি শান্ত গলায় বললেন, আমার ধারণা অশ্বিনী বাবুর ব্যাপারটা তোমার মাথায় ঢুকে গেছে । তুমি তার মতো করে জীবন যাপন করতে চাচ্ছ ।

তুমি আকাশের তারা দেখ কারণ অশ্বিনী বাবু দেখতেন।

সুলতান কঠিন গলায় বলল, আপনাকে কে বলল অশ্বিনী বাবু তারা দেখতেন?

মিসির আলি সহজ গলায় বললেন, আমাকে কেউ বলে নি। আমি অনুমান করছি। এই অনুমানের পেছনে ভিত্তি আছে। তোমার সঙ্গে গল্প করার ফাঁকে ফাঁকে আমি লাইব্রেরিতে সাজানো বইগুলির উপর চোখ বুলিয়েছি। চামড়ায় বাঁধানো, সোনার জলে নাম লেখা বেশ কিছু পুরনো বই দেখলাম। আকাশের তারা নিয়ে লেখা দুটা বই চোখে পড়েছে। একটার নাম তারা পরিচিতি, আরেকটার নাম— আকাশ পর্যবেক্ষণ। একটা ইংরেজি বই আছে Western Hemisphere Stars. এখন তুমি বল এই বইগুলি কি অশ্বিনী বাবুর?

হ্যাঁ।

উনি কি আকাশ দেখতেন?

হ্যাঁ দেখতেন। তাঁর একটা দূরবীন ছিল। যাক এলেন্টার কোম্পানির চোঙ দূরবীন।

উনি তারা দেখতেন বলেই কি তুমি এখন তারা দেখছ?

সুলতান কিছুক্ষণ চুপ করে থেকে নিচু গলায় বলল, না ব্যাপারটা সে রকম না। আকাশের বিষয়ে আমার কৌতুহল ছোটবেলা থেকেই ছিল। তবে অশ্বিনী বাবুর লেখা ডায়েরি পড়ে আমি টেলিস্কোপ কিনতে আগ্রহী হই এটা ঠিক। তিনি আকাশ দেখতেন এবং কি দেখলেন তা খুব শুচিয়ে লিখে রাখতেন। পড়তে ভালো লাগে। তার মানে এই না যে আমি তাঁর জীবন যাত্রা অনুসরণ করছি। আপনি নিশ্চয়ই বলবেন না— মন্দিরে মূর্তি প্রতিষ্ঠা করা হয়েছে এখন আমি মানুষ বলি দেয়া শুরু করব?

মিসির আলি বললেন, অশ্বিনী বাবুর লেখা ডায়েরিটা কি আমি পড়তে পারি?

অবশ্যই পড়তে পারেন। আপনি কিন্তু স্যার আমার প্রশ্নের জবাব দেন নি।
প্রশ্নটা যেন কী?

প্রশ্নটা হলো— আপনার কি ধারণা আমিও মানুষ বলি দিচ্ছি? গ্রাম থেকে মানুষ ধরে এনে গোপনে বলি দিয়ে মন্দিরের পেছনের কুয়ায় ফেলে দিচ্ছি? আমাকে কি অসুস্থ মানুষ বলে মনে হচ্ছে?

মিসির আলি সিগারেট ধরাতে ধরাতে বললেন, ছোটখাট অসুখগুলি চট করে ধরা যায়। কিন্তু ভয়ংকর অসুখগুলি মানুষের মস্তিষ্কের গভীরে বাস করে। এদের চট করে ধরা যায় না। যেমন অশ্বিনী বাবুর কথাই ধরা যাক— তাঁর ভয়ংকর অসুখ ধরতে অনেক সময় লেগেছিল। অশ্বিনী বাবুর সবচে' কাছের মানুষ তাঁর

স্তৰী পর্যন্ত ধৰতে পাৱেন নি। তিনটি মেয়েৰ মৃত্যুৰ পৰ ধৰতে পাৱলেন।

সুলতান হতভৰ গলায় বলল, স্যার আপনি তো দেখি সত্যি সত্যি আমাকে অশ্বিনী বাবুৰ দলে ফেলে দিয়েছেন। ঠিক কৱে বলুনতো আপনি আমাৰ সম্পর্কে কি ভাবছেন।

এখন পৰ্যন্ত আমি কিছুই ভাবছি না। তবে আমাৰ অবচেতন মন নিশ্চয়ই ভাবছে। অবচেতন মনেৰ কৰ্মকাণ্ড খুব অদ্ভুত। অবচেতন মনকে মাৰে মাৰে আমাৰ কাছে আত্মভোলা শিশুৰ মতো মনে হয়। যে শিশু নিজেৰ মনে খেলছে। জিগ স পাজলেৰ খেলা। একটা টুকুৱাৰ সঙ্গে আৱেকটা টুকুৱা জোড়া দিয়ে ছবি বানাচ্ছে। ছবি ভেঙ্গে ফেলছে। আবাৰ বানাচ্ছে। মাৰে মাৰে অদ্ভুত কোনো ছবি তৈৰি হয়ে গেলে অবাক বিশ্বয়ে কিছুক্ষণ ছবিৰ দিকে তাকিয়ে আবাৰ সেই ছবিও নষ্ট কৱে ফেলছে।

সুলতান শান্ত গলায় বলল, স্যার শুনুন আমাৰ কোনো ছবি দাঁড় কৱাতে হলে সৱাসিৰ আমাকে জিঞ্জেস কৱলেই হবে। আমি জবাব দেব। অনুমানেৰ উপৰ কিছু দাঁড় কৱানোৰ প্ৰয়োজন নেই।

মিসিৰ আলি বললেন, অবচেতন মন কাউকে জিঞ্জেস কৱে কাজ কৱে না। জিজ্ঞাসাবাদেৱ বিষয়টি চেতন মনেৰ, অবচেতন মনেৰ না। তবে চেতন মন থেকে সে যে তথ্য নেয় না, তা না। তথ্য নেয়। যেটা তাৰ পছন্দ তাই নেয় সব তথ্য নেয় না।

সুলতান হেটি নিঃখ্বাস ফেলে বলল, স্যার আমাৰ নিজেৰ ধাৰণা এই বাড়িটা আপনাৰ উপৰ প্ৰভাৱ ফেলতে শুৱ কৱেছে। জেলখানাৰ মত উঁচু পাঁচিলে ঘেৱা বিৱাট বাড়ি। গেট সব সময় তালাবন্ধ। তিনটা কুকুৰ বাড়ি পাহাৱা দিচ্ছে। আপনাৰ ধাৰণা হয়েছে আপনি বন্দি হয়ে গেছেন। যেই মুহূৰ্তে মানুষ নিজেকে বন্দি ভাবে সেই মুহূৰ্ত থেকে তাৰ চিন্তাৰ ধাৰা বদলে যায়। আমি যখন মুক্ত মানুষ ছিলাম তখন একভাৱে চিন্তা কৱতাম। যেই মুহূৰ্তে হইল চেয়াৱে বন্দি হয়েছি সেই মুহূৰ্ত থেকে অন্যভাৱে চিন্তা কৰা শুৱ কৱেছি। আপনাৰ বেলাতেও তাই হচ্ছে। আপনি আমাকে সহজভাৱে প্ৰহণ কৱতেই পাৱছেন না। আপনি ধৰেই নিয়েছেন আমি হচ্ছি হইল চেয়াৱে বসা অশ্বিনী বাবু।

মিসিৰ আলি কিছু বললেন না। সুলতান বলল, আপনি খেতে যান। আপনাৰ খাবাৰ দেয়া হয়েছে।

তুমি খাবে না ?

না। আমাৰ মেজাজ খুবই খাৱাপ। আপনাৰ কাৱণে মেজাজ খাৱাপ না। আকাশ মেঘে ঢাকা, তাৱা দেখা যাবে না। এই জন্যে মেজাজ খাৱাপ। মেজাজ খাৱাপ নিয়ে আমি খেতে পাৱি না। আপনি খেতে যান, আমি অশ্বিনী বাবুৰ

ডায়েরিটা খুঁজে বের করি। তাঁর অনেক খাতাপত্রের সঙ্গে ডায়েরিটা আছে। খুঁজে বের করতে সময় লাগবে।

পুঁই পাতা পাওয়া যায় নি কথাটা সত্যি না। পাতা পাওয়া গেছে। সেই পাতায় কৈ মাছের পাতুরি রান্না হয়েছে। লিলি মিসির আলির পাতে মাছ তুলে দিয়ে হাসতে হাসতে বলল— দেখলেন কেমন বোকা বানালাম!

আয়োজন প্রচুর। মাছই আছে তিনি রকমের। চিংড়ি মাছ, মলা মাছ আর কৈ মাছ। নানান ধরনের ভর্তা, ভাজি। কুচকুচে কাল রঙের একটা ভর্তা দেখা গেল। আরেকটার বর্ণ গাঢ় লাল। পাশাপাশি দুটা বাটিতে লাল এবং কাল ভর্তা রাখা হয়েছে যার থেকে ধারণা করা যায় যে শুধু রান্না না, খাবার সাজানোর একটা ব্যাপারও মেয়েটার মধ্যে আছে। লিলি বলল, চাচাজি এই দেখুন কাল রঙের এই বস্তু হলো কালিজিরা ভর্তা। কৈ মাছের পাতুরি আপনার পাতে তুলে দিয়েছি বলেই এটা দিয়ে খাওয়া শুরু করবেন না। কালিজিরা দিয়ে কয়েক নলা ভাত খেলে মুখে ঝুঁটি চলে আসবে। তখন যাই খাবেন, তাই ভালো লাগবে।

মিসির আলি বললেন, আমার ঝুঁটির কোন সমস্যা নেই। তারপরেও তুমি যেভাবে খেতে বলবে আমি সেইভাবেই খাব। লাল রঙের বস্তুটা কী?

মরিচ ভর্তা। শুকনো মরিচের ভর্তা।

আমি ঝাল খেতে পারি না।

এই মরিচ ভর্তার বিশেষত্ব হচ্ছে ঝাল নেই বললেই হয়। বিশেষ প্রক্রিয়ায় শুকনো মরিচ থেকে ঝাল দূর করা হয়েছে। বিশেষ প্রক্রিয়াটা শুনতে চান?

শুনে আমার কোন লাভ নেই তবু বল।

শুকনো মরিচ লেবু পানিতে ডুবিয়ে রাখলে মরিচের ঝাল চলে যায়। ভিনিগারে ডুবিয়ে রাখলেও হয়। আমি ঝাল দূর করেছি লেবু পানিতে ডুবিয়ে।

বিচির ধরনের রান্না বান্না তুমি কি কারো কাছ থেকে শিখেছ? না নিজে যাথা খাটিয়ে বের করেছ?

বেশির ভাগ রান্নাই আমি আমার নানির কাছ থেকে শিখেছি। নানি আমাকে রান্না শিখিয়েছেন তার চেয়েও বড় কথা রান্নার মন্ত্র শিখিয়েছেন। আমি প্রায় কুড়িটার মতো রান্নার মন্ত্র জানি।

মিসির আলি বিশ্বিত হয়ে বললেন, রান্নার কি মন্ত্র আছে নাকি?

লিলি সহজ ভঙিতে বলল, হ্যাঁ মন্ত্র আছে। এই মন্ত্র কাউকে শেখানো নিষেধ। মন্ত্র শেখালে তার পাওয়ার চলে যায়। কিন্তু আপনি চাইলে আপনাকে শেখাব।

আমি রান্না শিখতে চাছি না । কিন্তু মন্ত্রটা শিখব ।

মন্ত্রটা সত্যি শিখতে চান ?

শিখতে চাই না, শুধু শুনতে চাই । যে-কোনো একটা মন্ত্র বললেই হবে ।

লিলি বলল, একেক রান্নার একেক মন্ত্র । ছোট মাছ রান্নার মন্ত্রটা বলি । ছোট মাছের সঙ্গে তেল মশলা মাখাতে হয় । চুলায় হাঁড়ি দিয়ে আগুন দিতে হয় । হাঁড়ি পুরোপুরি গরম হবার পর তেল-মশলা মাখা মাছটা হাঁড়িতে দিয়ে মন্ত্রটা পড়তে হয় দশবার । তারপর পানি দিতে হয় । পানি এমনভাবে দিতে হয় যেন মাছের উপর দু আংগুল পানি থাকে । এই মন্ত্রের নাম দশ-দুই মন্ত্র । পানি ফুটতে শুরু করলেই রান্না শেষ । আরেকবার মন্ত্রটা পড়ে ফুঁ দিয়ে হাঁড়ির মুখ বন্ধ করে হাঁড়ি নামিয়ে ফেলতে হবে । তরকারি বাটিতে ঢালার আগে আর ঢাকনা নামানো যাবে না ।

এখন মন্ত্রটা বল ।

লিলি বলল, মন্ত্রটা অনেক লম্বা । শুন্টটা এরকম—

উত্তরে হিমালয় পর্বত

দক্ষিণে সাগর

নদীতে সপ্ত ডিঙ্গায়

চাঁদ সদাগর ।

আমি চুলার ধারে

ধোয়া বেগমার

অগ্নিবিনা রঞ্জন হবে

প্রতিজ্ঞা আমার ।

অগ্নি আমার ভাই

জল আমার বোন

আমি কন্যা চম্পাবতী

শোন মন্ত্র শোন ।

আশ্বিনে আশ্বিনা বৃষ্টি

কার্তিকে হিম

শরীরে দিয়াছি বন্ধন

আলিফ লাম মিম ।

.....

মিসির আলি মন্ত্র শুনে হাসলেন । লিলি বলল, চাচাজি হাসবেন না । এই মন্ত্র পড়ে একবার ছোট মাছ রান্না করে দেখুন । দশবার মন্ত্র পড়ার পর দু আংগুল

পানি । আর কিছু লাগবে না ।

মিসির আলি বললেন, লিলি আমার ধারণা মন্ত্রটা হলো— টাইমিৎ । সেই সময়তো গ্রামেগঞ্জে ঘড়ি ছিল না । রান্নার মতো তুচ্ছ বিষয়ে ঘড়ির ব্যবহারের প্রশ্নই আসে না । আমার ধারণা তখন মন্ত্র পড়ে সময়ের হিসাব রাখা হতো । তুমি যে মন্ত্রটা বললে এই মন্ত্র দশবার বলতে যত সময় লাগে ততটা সময় তেল-মশলা মাখানো মাছ গরম চুলায় রাখলেই হবে । তুমি এক কাজ কর । ঘড়ি দেখে দশবার মন্ত্র পড়তে কত সময় লাগে সেটা বের কর । তারপর মন্ত্র ছাড়া সময় দেখে রান্না কর । দেখবে রান্না ঠিকই হয়েছে ।

লিলি বলল, আপনার আসলেই অনেক বুদ্ধি । মন্ত্র যে কিছুই না, সময়ের হিসেব এটা আমিও টের পেয়েছি । কিন্তু আমার অনেক সময় লেগেছে । আপনি সঙ্গে সঙ্গে ধরে ফেলেছেন । আপনি কি যে-কোনো সমস্যার সমাধান সঙ্গে সঙ্গে করে ফেলেন ? এই ক্ষমতা কী সত্যি আপনার আছে ?

মিসির আলি কিছু বললেন না । তিনি লক্ষ করলেন লিলি তীক্ষ্ণ চোখে তাঁকে দেখছে । সে কি কিছু বলার চেষ্টা করছে ? প্রশ্নের ভেতরেও লুকানো প্রশ্ন থাকে । মেয়েটির এই প্রশ্নের ভেতর লুকানো কোন প্রশ্ন কি আছে ?

লিলি বলল, মিষ্টি জাতীয় কিছু রান্না করি নি । আপনি কি মধু খাবেন ? মধু এনে দেব ? এই দিন খলসা ফুলের মধু খেয়েছেন, আজ কেওড়া ফুলের মধু খান । না ।

লিলি হঠাতে গঞ্জির হয়ে বলল, আপনি কি আমাকে কিছু জিজ্ঞেস করতে চান ? জিজ্ঞেস করতে চাইলে করতে পারেন ।

মিসির আলি বললেন, সুলতান চিঠিতে একটা মেয়ের কথা বলেছিল ঐ মেয়েটি সত্যি আছে ? সালমা নাম, পনেরো ষোল বছর বয়স । অতীন্দ্রিয় ক্ষমতাসম্পন্ন মেয়ে ।

লিলি সহজ গলায় বলল, থাকবে না কেন আছে । দূরবীনওয়ালাকে বললেই সে আপনাকে দেখাবে ।

মিসির আলি বললেন, মেয়েটা থাকে কোথায় ?

লিলি বলল, মেয়েটা কোথায় থাকে তা দিয়ে কি করবেন ? মেয়েটার সত্যি কোনো ক্ষমতা আছে কি-না এটা জানা জরুরি তাই না ?

মেয়েটার সত্যি কি ক্ষমতা আছে ?

মেয়েটার শুধু যে ক্ষমতা আছে তা না, ভয়াবহ ক্ষমতা আছে ।

তুমি নিজে দেখেছ ?

হ্যাঁ । আপনি তাকে দেখে খুবই অবাক হবেন । প্রথমে আপনার বিশ্বাস হবে

না । ভাববেন ঠাট্টা করা হচ্ছে ।

মিসির আলি বললেন, তুমই কি সেই মেয়ে ?

লিলি হ্যাস্চক মাথা নেড়ে খিলখিল করে হেসে ফেলল এবং প্রায় সঙ্গে সঙ্গেই হাসি থামিয়ে গন্ধীর হয়ে বলল, চাচাজি শুনুন মধু আপনাকে খেতেই হবে । ইচ্ছা না করলেও খেতে হবে দূরবীনওয়ালা যদি শোনে আপনাকে মধু দেয়া হয় নি তাহলে খুব রাগ করবে । আমাকে বলা হয়েছে আজ যেন কেওড়া ফুলের মধু দেয়া হয় ।

মধু না খেলে সুলতান রাগ করবে ।

রাগের চেয়েও যেটা করবে তা হলো মেজাজ খারাপ ।

মিসির আলি বললেন, নিয়ে এসো তোমার মধু ।

লিলি বলল, সুন্দরবনের বানররা মধু কীভাবে খায় এই গল্প কি আপনি জানেন ?

না জানি না ।

আপনি আংশুলে মধু মাখিয়ে খেতে শুরু করুন । আমি গল্পটা করি । ছোট বাচ্চাদের যেমন গল্প বলে বলে খাবার খাওয়াতে হয় আপনাকেও সে রকম গল্প বলে বলে মধু খাওয়াব ।

ঠিক আছে, শুরু কর তোমার গল্প ।

কোনো বানরের যখন মধু খেতে ইচ্ছা করে সে তখন নদীর পাড়ে চলে যায় । সারা গায়ে কাদা মাখে । তারপর রোদে বসে এই কাদা শুকায় । আবার যায় কাদায় । আবারো কাদায় হৃটপুটি করে গায়ে কাদা মাখে । আবারো রোদে শুকায় । এই প্রক্রিয়াটি কয়েকবার করার পর বানরের গায়ে শক্ত কাদার একটা স্তর পড়ে যায় । তখন সে মহানন্দে চাক ভেঙ্গে মধু খায় । মৌমাছিরা কাদার স্তরের জন্যে তার গায়ে হুল ফুটাতে পারে না । বুলেট প্রফ জ্যাকেটের মতো মৌমাছি প্রফ কর্দম জামা । চাচাজি ঘটনাটা কি আপনার কাছে ইন্টারেন্সিং লাগছে ?

হ্যাঁ ইন্টারেন্সিংতো বটেই ।

সুন্দরবনের মধু নিয়ে আমি এর চেয়েও একশ গুণ ইন্টারেন্সিং একটা গল্প জানি । সেটা আজ বলব না । অন্য একদিন বলব ।



সন্ধ্যা থেকেই বৃষ্টি শুরু হয়েছে। বৃষ্টি যে মুষলধারে পড়ছে তা না, তবে বাতাস প্রবল বেগে বইছে। বাড়ির চারদিকে প্রচুর গাছপালা বলে ঝড়ের মতো শব্দ হচ্ছে। এমন ঝড় বৃষ্টির রাতে আকাশ দেখার প্রশ্নই আসে না। মিসির আলি দোতলায় তাঁর ঘরে আধশোয়া হয়ে আছেন। কিছুক্ষণ আগেই রাতের খাবারের পর্ব শেষ করে এসেছেন। বিছানা থেকে আর নামতে হবে না; এটা ভেবেই শান্তি শান্তি লাগছে। ঝড় বৃষ্টি শুরু হবার সঙ্গে সঙ্গেই আবহাওয়া শীতল হয়েছে। ঠাণ্ডা ঠাণ্ডা লাগছে। যতই সময় যাচ্ছে ততই ঠাণ্ডা বাড়ছে। মিসির আলি তাঁর গায়ে পাতলা চাদর দিয়েছেন। কোলবালিশ আড়াআড়ি রেখে তার উপর পা তুলে দিয়েছেন। মোটামুটি আরামদায়ক অবস্থান। তাঁর মাথার কাছে টেবিলের উপর একটা হারিকেন এবং কেরোসিনের টেবিল ল্যাম্প। তাতেও ঘরে তেমন আলো হচ্ছে না। মিসির আলির হাতে অশ্বিনী কুমার বাবুর হাতে লেখা ডায়েরি। লেখা খুব স্পষ্ট নয় এবং যথেষ্ট পরিমাণে পঁ্যাচানো। এই আলোয় পড়তে কষ্ট হচ্ছে তারপরেও স্বত্তির কারণ আছে— হঠাৎ ইলেক্ট্রিসিটি চলে গিয়ে ঘর অন্ধকার হবে না। ঢাকা শহরে ঝড় বৃষ্টি মানেই টেনশন এই বুঝি ইলেক্ট্রিসিটি চলে গেল!

বরকত এসে টেবিলে চায়ের ফ্লাক্স এবং কাপ রেখে গেছে। দরজার ছিটকিনি ঠিক করে দিয়ে গেছে। মিসির আলির বরকতের সঙ্গে টুকটাক আলাপ চালাবার চেষ্টা করেছিলেন। লাভ হয় নি। মিসির আলির ধারণা কোনো এক বিচিত্র কারণে বরকত তাকে পছন্দ করছে না।

ভালো দুর্যোগ শুরু হয়েছে। মিসির আলি গাছের ডাল ভাঙার শব্দ শুনলেন। ঝড় বৃষ্টির সময় গাছের পাখিরা কোনো ডাকাডাকি করে না। তারা একেবারেই চুপ হয়ে যায়। অথচ তাদেরই 'সবচে' বেশি ডাকাডাকি করার কথা। কুকুররা মনে হয় প্রাকৃতিক দুর্যোগ পছন্দ করে না। মাঝে মাঝেই তাদের ঝুঝ গর্জন শোনা যাচ্ছে। তারা কেউ আলাদা আলাদা ডাকছে না, যখন ডাকছে তিনজন এক সঙ্গেই ডাকছে।

মিসির আলি খুব মন দিয়েই ডায়েরি পড়ার চেষ্টা করছেন। শুধু কুকুররা যখন ডেকে উঠছে তখন মন সংযোগ কেটে যাচ্ছে। কেন জানি কুকুরের ডাকটা

শুনতে ভালো লাগছে না।

অশ্বিনী কুমারের ডায়েরিটি ঠিক ডায়েরির আকারে লেখা না। অনেক অপ্রয়োজনীয় জিনিস লেখা আছে। কিছু কিছু লেখাতে দিনক্ষণ স্থানকাল উল্লেখ করা। বেশির ভাগ লেখাতেই তারিখ নেই। বাজারের হিসাব আছে। চিঠির খসড়া আছে। আযুর্বেদ অশুধের বর্ণনা আছে। ডায়েরির শুরুই হয়েছে আযুর্বেদ অশুধের বর্ণনায়।

গাত্রবর্ণ উজ্জ্বল এবং গৌর করিবার অব্যর্থ উপায়

পুনাগের কচি ফল দিয়া কাথ প্রস্তুত করিতে হইবে। উক্ত কাথ জ্বাল দিয়া ভাসমান তৈল পাওয়া যাইবে। উক্ত তৈল সর্বাঙ্গে মাখিতে হয়। পুনাগের আরেক নাম রাজচম্পক।

রামায়ণ মহাকাব্যে পুনাগের সুন্দর বর্ণনা আছে। রাবণ সীতাকে হরণ করিবার পরের অংশে আছে রাম, ভাতা লক্ষণকে নিয়া বিষণ্ণ মনে ইঁটিতেছিলেন। হঠাতে চোখে পড়িল পুনাগ পুষ্পের মেলা—

তিল্লকাশোক পুনাগ বকুলোদ্বাল কামিনীম্
রম্যোপবন সম্বাধীং পদ্মসম্পীড়িতো কাম॥

নোট : আমি পুনাগ তৈল প্রস্তুত করিবার চেষ্টা করিয়াছি। কাথ জ্বাল দিলে তৈল প্রস্তুত হয় না। নিচ্যই অন্য কোনো প্রক্রিয়া আছে।

বৈদ্যদের নথিতে গাত্র বর্ণ উজ্জ্বল্যের নিমিত্ত রস্তচন্দন, অনঙ্গমূল এবং মঞ্জিলার উল্লেখ আছে। তবে পুনাগের সমকক্ষ কেহ নাই ইহা বারংবার বলা হইয়াছে।

পুনাগ প্রসঙ্গে আরো কোনো কৌতুহলদীপক তথ্য পাইলে লিপিবদ্ধ করা হইবে।

এই পর্যন্ত লেখার পর দু'টি পাতা খালি। কিছুই লেখা নেই। তৃতীয় পাতায় দিনক্ষণ দিয়ে তারা দর্শনের বর্ণনা।

অদ্য ৫ই জ্যৈষ্ঠ, ইংরেজি ২০শে মে মধ্যরাজনী।

বিভূতিবাবু হিসাব অনুযায়ী অদ্য রজনী দশ ঘটিকায় সারমেয় যুগল মধ্যগগনে অবস্থান করিবে। সারমেয় যুগল দর্শনের সমস্ত ব্যবস্থা সুসম্পন্ন করিয়াছি। কন্যাদের মাতাকে এই অপূর্ব দৃশ্য দেখিবার জন্যে বলিয়াছিলাম। তিনি শিরঃপীড়ায় আক্রান্ত বলিয়া অপারগতা প্রদর্শন করিলেন। কিঞ্চিৎ ব্যথিত হইয়াছি। জগতের

কোনো মনোমুগ্ধকর দৃশ্য একা উপভোগ করা যায় না।

আকাশ পরিষ্কার আছে। সন্ধ্যাকালে মেঘ ছিল— এখন মেঘ দূরীভূত হইয়াছে। ঈশ্বরের অসীম কৃপা।

বিভূতিবাবুর পত্রানুযায়ী সারমেয় যুগলের একটির গলায় এই মণ্ডলের সর্বাপেক্ষা উজ্জ্বল তারকাটি অবস্থিত। এই তারকাটির প্রভা তৃতীয় মাত্রার। তারকাটির নাম চার্লসের হন্দয়। সন্মাট প্রথম চার্লসের সৃতির উদ্দেশ্যে এই নামকরণ।

সারমেয় যুগলের উল্লেখ বেদে আছে। ইহাদের বলা হইয়াছে যমের দুয়ারের প্রহরী। এই মণ্ডলের দুইটি উজ্জ্বল তারকার একটির ভারতীয় নাম জ্যেষ্ঠ কালকজ্ঞ আরেকটির নাম কনিষ্ঠ কালকজ্ঞ। জ্যেষ্ঠ কালকজ্ঞ একটি বিষম তারা এবং অত্যন্ত সৌন্দর্যমণ্ডিত। যে চারটি তারা দিয়া কল্যাণ হীরক নামক বিখ্যাত চিত্রটি গঠিত জ্যেষ্ঠ কালকজ্ঞ তার একটি।

আজ সারমেয় যুগল দেখিবার সৌভাগ্য যেন হয় তার জন্যে ভগবানের কাছে প্রার্থনা করিয়াছি।

মিসির আলি দ্রুত পাতা উল্টালেন। ডায়েরিতে বিচির সব বিষয়ে লেখা আছে। জ্যামিতিক চিহ্ন আছে। তার ব্যাখ্যা আছে। জায়গায় জায়গায় টীকা-টিষ্ঠুনি আছে। যেমন জ্ঞান সম্পর্কে বলা হয়েছে—

জ্ঞান

জ্ঞান দুই প্রকার। পবিত্র জ্ঞান এবং অপবিত্র জ্ঞান। অপবিত্র জ্ঞান ঈশ্বর কর্তৃক অনুমোদিত। আদি মানব আদমের পতন হইয়াছিল ঈশ্বর কর্তৃক অনুমোদিত জ্ঞান আহরণের জন্যে। অনুমোদিত জ্ঞান অতীব রহস্যময় জ্ঞান। যদিও পরিত্যাগ লাভের জন্যে এই জ্ঞানের প্রয়োজন নাই।

পুন্নাগ ফুলের কথা কয়েক পাতা পরেই আবার পাওয়া গেল।

পুন্নাগ

সৌরভ্যং ভুবন এয়েহপি বিদিতং পুষ্পেষু লোকোত্তরং
কীর্তিঃ কিঞ্চ দিগঙ্গনাঙ্গণগতা কিন্তেতদেকংশনু।
সর্বান্যেব গুণানি যন্নিগিরতি পুন্নাগে তে সুন্দরান্
উজবেশি খলু কোটরেষু গরল জুলান্দ্বিজিহ্বালী।

অর্থ : হে পুন্নাগ, তোমার সুগন্ধ ত্রিভুবন খ্যাত। তোমার যশ ও খ্যাতি দিগাঙ্গনারা নিজ অঙ্গনে ছড়াইয়া রাখে। তবু তোমার

একটি অখ্যাতি। তোমার শরীরের কোটরে বাস করে বিষধর সর্প।

নোট : পুনাগ বৃক্ষের কোটরে বিষধর সর্প বাস করে এই তথ্য
জানা ছিল না। হায় এই বিপুল বসুধার কত অল্পই না আমি জানি!

দরজায় খট খট শব্দ হচ্ছে। বই নামিয়ে মিসির আলি বললেন, কে?

চাচাজি আমি লিলি। আপনার কিছু লাগবে?

না আমার কিছু লাগবে না।

আপনার ঘরের ছিটকিনি বরকতকে ঠিক করতে বলেছিলাম। বরকত কি
ঠিক করেছে?

হ্যাঁ ঠিক করেছে।

ছিটকিনি লাগিয়েছেন?

না।

ছিটকিনি লাগিয়ে ঘুমুবেন। ভুলবেন না যেন। কুকুরগুলি মাঝে মাঝে সিঁড়ি
বেয়ে দোতলায় ওঠে এই জন্যে বলছি। হঠাতে ঘূম ভেঙে যদি দেখেন আপনার
মাথার কাছে এলশেশিয়ান তাহলে ভয়েই হাটফেল করবেন।

অবশ্যই ছিটকিনি লাগিয়ে ঘুমাব। তুমি বাহরে দাঁড়িয়ে কথা বলছ কেন?
ভেতরে এসো।

আপনি আসতে বলছেন না, এই জন্যে আসতে পারছি না। আমি আপনার
জন্যে পান নিয়ে এসেছি।

এসো ভেতরে এসো।

লিলি পানের বাটা হাতে ঘরে ঢুকল। হাসিমুখে বলল, আমাকে আপনার
কাছে পাঠিয়েছে দূরবীনওয়ালা। আমার দায়িত্ব হলো আপনাকে জাগিয়ে রাখা।

কেন বলতো?

দূরবীনওয়ালার ধারণা হয়েছে কিছুক্ষণ বৃষ্টি হবার পর আকাশ পরিষ্কার হয়ে
যাবে তখন তারা দেখা যাবে। বৃষ্টির পর আকাশ না-কি ঝাকঝাকে হয়ে যায়।
তখনই তারা দেখার আসল মজা।

ও আচ্ছা।

আপনি একবার ঘুমিয়ে পড়লেতো আর আপনাকে জাগানো ঠিক হবে না।
তাই আপনাকে জাগিয়ে রাখার চেষ্টা। এখন বলুন কি করলে আপনি জেগে
থাকবেন?

জেগে থাকা আমার জন্যে কোনো সমস্যা না। আমি অনেক রাত জাগি।
তুমি আমাকে জেগে থাকতে বলেছ আমি জেগে থাকব।

অশ্বিনী বাবুর ডায়েরি পড়ছেন ?

হ্যাঁ ।

মরা মানুষের ডায়েরি পড়ে লাভ কি বলুনতো ? মানুষটাতো মরেই গেছে । এরচে' জীবিত মানুষের ডায়েরি পড়া ভালো । আপনি এত আগ্রহ করে পুরনো ডায়েরি পড়েন জানলে আমি ডায়েরি লেখার অভ্যাস করতাম । চাচাজি নিন পান খান ।

মিসির আলি পান হাতে নিলেন । লিলি চেয়ার টেনে খাটের পাশে বসেছে । তাকে ক্লান্ত লাগছে । পর পর দু'বার হাই তুলল । মিসির আলি বললেন, তোমার ঘূম পাছে তুমি ঘুমিয়ে পড় । সুলতানকে বলে রেখো বৃষ্টি কমলে যেন আমাকে খবর দেয় আমি জেগে থাকব ।

আমার সঙ্গে গল্প করতে আপনার ভালো লাগছে না তাই না ? আপনার মন পড়ে আছে অশ্বিনী বাবুর লেখাতে । ঠিক বলছি না চাচাজি ?

মিসির আলি বললেন, ডায়েরিটা পড়ে শেষ করতে ইচ্ছা হচ্ছে এটা ঠিক । তার মানে এই না যে তোমার সঙ্গে কথা বলতে ভালো লাগছে না । তুমি খুব গুছিয়ে কথা বল ।

লিলি বলল, অশ্বিনী বাবুর ডায়েরি পড়ে কি তথ্য বের করলেন বলুন শুনি । মাত্রতো পড়া শুরু করেছি ।

যা পড়েছেন সেখান থেকে এখনো ইন্টারেন্টিং কিছু বের করতে পারেন নি ।

পুনাগ ফুলের কথা লেখা আছে । খুব আগ্রহ করে লেখা । এই ফুল বেটে গায়ে মাখলে গায়ের রঙ উজ্জ্বল হয় বলে তিনি লিখেছেন । এর থেকে ধারণা করা যায় যে গায়ের রঙ নিয়ে তিনি খুব চিন্তিত ছিলেন । আমার ধারণা তাঁর মেয়েগুলির গায়ের রঙ ছিল কাল । তিনি মন্দিরে কালী মূর্তি প্রতিষ্ঠা করেন যে কালী হলো গৌর কালী অর্থাৎ সেই কালীর গায়ের রঙও শাদা । তার মানে গায়ের রঙের প্রতি অশ্বিনী বাবুর মনে অবসেসন তৈরি হয়েছিল ।

লিলি মুঞ্চ গলায় বলল, বাহু আপনিতো চট করে একটা ব্যাপার ধরে ফেলেছেন !

মিসির আলি বললেন, আমি একটা হাইপোথিসিস দাঁড় করিয়েছি । হাইপোথিসিসটা সত্যি কি না তার এখনো প্রমাণ হয় নি ।

লিলি একটু ঝুঁকে এসে গলা নামিয়ে বলল, আচ্ছা চাচাজি মাঝে মাঝে কিছু বাড়ি যে অভিশঙ্গ হয়ে যায় এটা কি আপনি জানেন ?

মিসির আলি সোজা হয়ে বসতে বসতে বললেন, অভিশঙ্গ বাড়ি বলে কিছু নেই । বাড়ি হলো বাড়ি, ইট পাথরের একটা স্ট্রাকচার । এর বেশি কিছু না ।

লিলি বলল, চাচাজি আমার কথা শুনুন, এমন আনেক বাড়ি আছে যেখানে বিশেষ কিছু ঘটনা বার বার ঘটতে থাকে। একটা চক্রের মতো ব্যাপার। চক্র ঘূরতে থাকে। এই বাড়িটাও সে রকম একটা বাড়ি।

তার মানে?

এই বাড়িটাও একটা চক্রের মধ্যে পড়ে গেছে। আপনি এমন বুদ্ধিমান একজন মানুষ—আপনার চোখে চক্রটা পড়ছে না কেন?

মিসির আলি বললেন, চক্র বলে কিছু নেই লিলি।

লিলি চাপা গলায় বলল, চক্র অবশ্যই আছে। অশ্বিনী বাবু তাঁর বাড়িতে গৌর কালী মূর্তি প্রতিষ্ঠা করেছিলেন। সুলতানও কী তাই করে নি? মন্দিরে সে কী একটি মূর্তি রাখে নি? চাচাজি আমার ভালো লাগছে না। আমি যাচ্ছি। আপনি ঘুমিয়ে পড়ুন। আজ রাতে বৃষ্টি থামবে না। সারারাত বৃষ্টি হবে। কালও বৃষ্টি হবে। বিছানা থেকে নেমে ছিটকিনি লাগান। শেষে দেখা যাবে ছিটকিনি না লাগিয়েই আপনি ঘুমিয়ে পড়েছেন। এ বাড়িতে কখনো ছিটকিনি না লাগিয়ে ঘুমবেন না। কখনো না।

মিসির আলি বিছানা থেকে নামলেন, দরজার ছিটকিনি লাগালেন। বিছানায় এসে বসলেন। অশ্বিনী বাবুর ডায়েরি এখন আর তাঁর পড়তে ইচ্ছা করছে না। বৃষ্টির বেগ আরো বাঢ়ছে। গাছের পাতায় শোঁ শোঁ শব্দ হচ্ছে। মিসির আলি চোখ বন্ধ করে শুয়ে আছেন। তাঁর খুবই অস্ত্রির লাগছে। চক্রের ব্যাপারটা মাথা থেকে দূর করতে পারছেন না। বিশ্বব্রহ্মাণ্ডে চক্রতো আছেই। পৃথিবী ঘূরছে সূর্যের চারদিকে। প্রতিবারই একই জায়গায় ঘূরে ঘূরে আসছে। ঘূরছে গ্যালাক্সি। অতি ক্ষুদ্র যে ইলেকট্রন সেও ঘূরপাক খাচ্ছে নিউক্লিয়াসের চারদিকে। পদার্থের সর্বশেষ অবস্থা ল্যাপটনস—এর ভর নেই, চার্জ নেই—অস্তিত্বই নেই, শুধু আছে ঘূর্ণন। স্পিন। জন্মের পর মৃত্যু—জীবন চক্র। বিগ বেং-এ মহাবিশ্ব তৈরি হল। মহাবিশ্ব ছড়িয়ে পড়ছে। কোনো এক সময় আবার তা সংকুচিত হতে শুরু করবে। আবার এক বিন্দুতে মিলিত হবে। আবার বিগ বেং—আবারো মহাবিশ্ব ছড়াবে—The expanding Universe...

মিসির আলি কখন ঘুমিয়ে পড়লেন নিজেই জানেন না।

তাঁর ঘুম ভাঙ্গল নিঃশ্বাসের শব্দে। কে যেন তাঁর গায়ে গরম নিঃশ্বাস ফেলছে! খুবই অস্বাভাবিক ব্যাপার। ঘরের দরজা বন্ধ। বাইরের কারো ঢোকার কোনো পথ নেই। মিসির আলি চোখ মেললেন—হারিকেনের আলোয় স্পষ্ট দেখলেন বিশাল একটা কুকুর। কুকুরটার মুখ তাঁর মাথার কাছে, তার গরম নিঃশ্বাস চোখে মুখে এসে লাগছে। পশ্চদের চোখ অঙ্ককারে সবুজ দেখায়। এর চোখও সবুজ।

এ তাকিয়ে আছে এক দৃষ্টিতে। মিসির আলি চোখ বন্ধ করে ফেললেন। ব্যাপারটা স্বপ্নতো বটেই। অত্যন্ত জটিল স্বপ্ন যা মন্তিক্ষের অতল গহ্বর থেকে উঠে এসেছে।

কুকুরটা চাপা শব্দ করছে। এই শব্দও স্বপ্নের অংশ। কুকুরটা এখন খাট থেকে দূরে সরে যাচ্ছে। এইত এখন ফিরে আসছে। আবার যাচ্ছে। এখন সে খাটের চারদিকে পাক খেতে শুরু করেছে। কুকুরটা ঘুরছে চক্রাকারে। আবারো সেই চক্র চলে এল। চক্রের হাত থেকে মানুষের মুক্তি নেই। মিসির আলি চোখ মেললেন। অতি সাবধানে মাথা ঘুরিয়ে তাকালেন দরজার দিকে। দরজা খোলা। খোলা দরজা দিয়ে ঠাণ্ডা বাতাস আসছে। বৃষ্টি থেমে গেছে। বাতাসও হচ্ছে না।

দরজা খুলল কীভাবে? বাইরে থেকে দরজা খোলার কোনো ব্যবস্থা কী আছে? এটা নিয়ে চিন্তা করার কোনো অর্থ আছে? কোনোই অর্থ নেই। স্বপ্নে বন্ধ দরজা, খোলা দরজা বলে কিছু নেই। স্বপ্নের লজিক খুঁজতে যাওয়া অর্থহীন। রাত কত হয়েছে? টেবিলের উপর হাত ঘড়িটা রাখা আছে। ঘড়ি দেখতে হলে তাঁকে উঠে বসতে হবে। তাতে শব্দ হবে। কুকুরের দৃষ্টি আকর্ষণ করা হবে। এই কাজটা এখন কিছুতেই করা যাবে না। ভয়ঙ্কর এলশেশিয়ান কুকুর। তার মনে কোনো রকম সন্দেহ উপস্থিত হলেই সে ঝাঁপ দিয়ে পড়বে। মিসির আলির হাত পা ঠাণ্ডা হয়ে এল। খুব পানির ত্বক্ষণা হচ্ছে। ত্বক্ষণায় বুকের ছাতি ফেটে যাচ্ছে।

এই ত্বক্ষণাবোধ মিথ্যা। কারণ পুরো ব্যাপারটাই মিথ্যা। তিনি স্বপ্ন দেখছেন। এর বেশি কিছু না। কুকুরটা যদি তার উপর ঝাঁপ দিয়েও পড়ে তাতে তাঁর কিছু হবে না। বরং লাভ হবে— দুঃস্বপ্ন ভেঙে যাবে। তিনি মিথ্যামিথ্য জাগবেন না। সত্যিকার অর্থেই জাগবেন। তখনো যদি ত্বক্ষণা থাকে তাহলে পানি খাবেন। ত্বক্ষণা না থাকলে চা খাবেন। চা খাবার পর একটা সিগারেট।

মিসির আলি খুব সাবধানে বিছানায় উঠে বসলেন। কুকুরটা হাঁটা বন্ধ করে স্থির হয়ে গেল। সে এক দৃষ্টিতে তাকিয়ে আছে। তার লেজ লড়ছে। এর মানে কি এই যে সে ঝাঁপ দেয়ার প্রস্তুতি নিচ্ছে? মিসির আলি এখন মনেপ্রাণে চাচ্ছেন কুকুরটা তার উপর ঝাঁপ দিয়ে পড়ুক। স্বপ্ন ভেঙে যাক। কুকুর ঝাপ দিচ্ছে না। সে এক দৃষ্টিতে তাকিয়ে আছে। আচ্ছা অশ্বিনী বাবুর কী কুকুর ছিল? জিজ্ঞেস করে জানতে হবে।

দরজায় শব্দ হলো। টক টক করে মোর্সকোডের মতো শব্দ করছে। যেন কেউ কোনো সংকেত দিচ্ছে। মিসির আলি দরজার দিকে তাকালেন। খোলা দরজার ওপাশে কাউকে দেখা যাচ্ছে না। তবে কেউ যে আছে তা বোঝা যাচ্ছে। যে আছে তাকে মিসির আলি চেনেন না। কিন্তু কুকুরটা চেনে। সে দরজার দিকে এগিয়ে যাচ্ছে। কুকুরটা সিঁড়ি বেয়ে নামছে। তার নেমে যাবার শব্দ পাওয়া যাচ্ছে।

মিসির আলি দ্রুত বিছানা থেকে নামলেন। দরজা বন্ধ করে ছিটকিনি টেনে দিলেন। টেবিলের কাছে এসে ঘড়ি দেখলেন। রাত তিনটা পঁচিশ। তিনি পরপর দু'গ্লাস পানি খেলেন। তারপরেও ত্বক্ষা করছে না। তিনি খুব যে নিশ্চিন্ত বোধ করছেন তাও না। স্বপ্নে যে কোনো সময় যে কোনো কিছু ঘটতে পারে। স্বপ্ন ফিজিক্সের সূত্র যেনে চলে না। হয়ত এক্ষুণি দেখা যাবে কুকুরটা বন্ধ দরজা ভেদ করে চলে এসেছে। সে একা আসে নি, সঙ্গি দু'জনকেও নিয়ে এসেছে। মানুষের মতো কথা বলাও শুরু করতে পারে। না তা করবে না, স্বপ্ন ফিজিক্সের সূত্র না মানলেও সাধারণ কিছু নিয়ম মানে। আট ন'বছরের বাচ্চা যদি কুকুর স্বপ্নে দেখে তাহলে সেই কুকুর তার সঙ্গে কথা বললেও বলতে পারে। মিসির আলি যে কুকুর দেখবেন সে কুকুর কথা বলবে না।

তিনি কি করবেন বুঝতে পারছেন না। বিছানায় উঠে আবার ঘুমিয়ে পড়ার ব্যবস্থা করবেন? নাকি হাঁটাহাঁটি করবেন? মিসির আলি জানালার কাছে চলে গেলেন। যদি কুকুরটাকে দেখা যায়। চেরী গাছের নিচে কেউ কি আছে? হ্যাঁ আছে তো বটেই। এতো হইল চেয়ারটা দেখা যাচ্ছে। হইল চেয়ারের পেছনে আছে বরকত। রাত তিনটা পঁচিশ মিনিটে ওরা দু'জন কি করছে? তারা দেখার প্রস্তুতি?

হঠাৎ মিসির আলির বুকে একটা ধাক্কার মতো লাগল। তিনি অবাক হয়ে দেখলেন হইল চেয়ারে বসা মানুষটা উঠে দাঁড়িয়েছে। এইত হাঁটতে শুরু করেছে। মন্দিরের দিকে কি যাচ্ছে? হ্যাঁ ঐ দিকেই যাচ্ছে। এখন সিগারেট ধরিয়েছে। আবার ফিরে আসছে। হাতের জুলন্ত সিগারেট এখন ফেলে দিল। এই মানুষটা যে সুলতান তাতে কি কোনো সন্দেহ আছে? না কোনো সন্দেহ নেই। মানুষটা আবার হাঁটতে শুরু করেছে। মিসির আলি তীক্ষ্ণ চোখে তাকিয়ে আছেন। না মানুষটা মন্দিরের দিকে যাচ্ছে না। সে মন্দিরের পেছনে যাচ্ছে। মন্দিরের পেছনে আছে কুয়া। এখান থেকে কুয়া দেখা সম্ভব না। কিন্তু স্বপ্নে সম্ভব। মিসির আলি কুয়া দেখার জন্যে অপেক্ষা করছেন। কুয়া দেখা গেল না। মানুষটা চোখের আড়াল না হওয়া পর্যন্ত মিসির আলি তাকিয়ে রইলেন।

মিসির আলির মাথায় সমুদ্র গর্জনের মতো শব্দ হচ্ছে। সমুদ্রের ঢেউ আছড়ে পড়ার শব্দ। মনে হচ্ছে কাছেই কোথাও সমুদ্র আছে। বড় বড় ঢেউ উঠছে। ঢেউয়ের মাথায় সমুদ্র ফেলা। মাথা এলোমেলো লাগছে। কেউ কি ভরাট গলায় কবিতা আবৃত্তি করছে?

I let myself in at the kitchen door.

'It is you', she said, 'I can't get up. Forgive me.

Not answering your knock. I can no more

Let people in than I can keep them out.'

এটা কার কবিতা ? মিসির আলি কিছুতেই মনে করতে পারলেন না । যুমে
তাঁর চোখ বন্ধ হয়ে আসছে । তিনি বিছানায় শুয়ে পড়লেন । মাথার ভেতর
কবিতাটা ভাঙা রেকর্ডের গানের মতো বেজে যাচ্ছে—

I let myself in at the kitchen door.

'It is you', she said, 'I can't get up. Forgive me.

আমাকে ক্ষমা কর, আমি উঠতে পারছি না । আমাকে ক্ষমা কর, আমি উঠতে
পারছি না । I can't get up. Forgive me.



সূর্য ওঠার আগেই মিসির আলির ঘুম ভাঙল। অন্ধকার মাত্র কাটতে শুরু করেছে। টেবিলে রাখা হারিকেন নিভে গেছে। টেবিল ল্যাম্প দপ দপ করছে। যে-কোনো মুহূর্তেই নিভবে। মনে হচ্ছে হিসেব করে তেল দেয়া। সূর্যের আলো ফুটবে আর এরা নিভে যাবে। মিসির আলি প্রথমেই তাকালেন দরজার দিকে— ছিটকিনি লাগানো আছে, দরজা বন্ধ। তিনি বিছানায় উঠে বসে মেঝের দিকে তাকালেন— মেঝে ঝাক ঝাক করছে। ঝড় বৃষ্টির রাতে কোনো কুকুর উঠে এলে মেঝেতে তার পায়ের দাগ থাকত। মেঝেতে কোনো দাগ নেই। গত রাতে তিনি মোটামুটি ভয়াবহ একটা স্বপ্ন দেখেছিলেন এই বিষয়ে কোনো সন্দেহ থাকার কারণ নেই, তবু সন্দেহটা যাচ্ছে না।

তিনি বিছানা থেকে নামলেন। দরজা খুলে বারান্দায় এসে দাঁড়ালেন। সকালের প্রথম আলোয় নদী দেখা যাচ্ছে। আশ্চর্যের ব্যাপার হলো নদীটা পাঁচিল যেরা বাড়ির সঙ্গে যাচ্ছে না। মনে হচ্ছে ওই বাড়িটার সঙ্গে নদীর কোনো যোগ নেই। নদী দেখতে ভালো লাগছে না।

ভেতরের উঠোনে একটা জলচৌকির উপর বরকত দাঁড়িয়ে আছে। তার হাতে পেতলের বদনা, সে মিসির আলিকে দেখতে পায় নি। মিসির আলি ডাকলেন, ‘এই বরকত।’ বরকত ভয়াবহভাবে চমকে উঠল। হাত থেকে বদনা জলচৌকিতে পড়ে ঝনঝন শব্দ হলো। এতটা চমকানোর কোনো কারণ নেই। মিসির আলি বললেন, কী করছ?

নামাজের অজু করি। ফজরের নামাজ।

মিসির আলি বিশ্বিত হলেন। এত দীর্ঘ বাক্য বরকত তাঁর সঙ্গে এর আগে ব্যবহার করে নি।

তোমার কুকুর কি বাঁধা আছে?

জু বান্দা। আসেন নিচে আসেন।

মিসির আলি নিচে নেমে এলেন। বরকত বলল, চা খাইবেন?

মিসির আলি বললেন, গরম চা খেতে পারলে ভালো হতো।

নামাজ শেষ কইরা চা দিতাছি।

তোমার কুকুরগুলি কোথায় একটু দেখি ।

বরকত আংগুল উঁচিয়ে পেয়ারা গাছের সঙ্গে বাঁধা কুকুরগুলি দেখাল । গলা নামিয়ে বলল, কাছে যান । শহিল্যে হাত দেন । আপনেরে কিছু বলব না ।

কিছু বলবে না কেন ?

বরকত চাপা গলায় বলল, একটা ঘটনা ঘটাইছি । আপনের জুতা আর কাপড় শুকাইয়া দিছি । অখন এরা আপনের শহিল্যের গন্ধ চিনে ।

মিসির আলি বললেন, কাজটা তুমি নিজ থেকে করতে বলো নি । কেউ তোমাকে করতে বলেছে । কে বলেছে ?

বরকত জবাব দিল না । এক দৃষ্টিতে তাকিয়ে রইল । মিসির আলির মনে হলো বরকত তার আগের অবস্থায় ফিরে গেছে । এখন আর কথা বলবে না । কিছু জিজ্ঞেস করলে অদ্ভুত ভঙ্গিতে তাকিয়ে থাকবে ।

মিসির আলি বললেন, গেট খুলে দাও নদীর পাড়ে বেড়াতে যাব । এত কাছে নদী, অথচ নদীই দেখা হয় নি ।

বরকত বলল, গেইট খুলন যাইব না । বড় সাবের নিষেধ আছে ।

নিষেধ ?

জি নিষেধ । আমি খুলতে চাইলেও খুলতে পারব না । চাবি থাকে বড় সাবের কাছে ।

চাবি সব সময় বড় সাহেবের কাছে থাকে ?

বরকত শীতল গলায় বলল, সব সময় চাবি উনার কাছে থাকে না । যখন আপনের মতো কেউ বেড়াইতে আসে তখন চাবি উনার কাছে থাকে ।

মিসির আলি বললেন, যাতে অতিথিরা পালিয়ে যেতে না পারে সেই জন্যে ?

কি জন্যে সেইটা আমি জানি না বড় সাহেবের জানে ।

আচ্ছা ঠিক আছে তুমি নামাজ পড়তে যাও । তোমার নামাজের দেরি হয়ে যাচ্ছে । শেষে নামাজ কাজা হবে ।

বরকত গঠীর মুখে বলল, ফজরের নামাজ দুপুর পর্যন্ত কাজা হয় না । এর একটা ইতিহাস আছে । ইতিহাসটা শুনবেন ?

বল শুনি ।

নবীয়ে করিম একবার দেরি কইরা ঘুম থাইকা উঠছিলেন । নবীয়ে করিমের জন্যে আমরা মাফ পাইছি ।

এটা জানতাম না ।

ভদ্রলোকরা সব বিষয়ে জানে, ধর্মকর্ম বিষয়ে জানে না । এইটা একটা আফসোস ।

আফসোস তো বটেই । বরকত তোমার সঙ্গে কথা বলে ভালো লাগল । আমি বাগানের দিকে যাচ্ছি তুমি নামাজ শেষ করে চা নিয়ে এসো । দু'কাপ চা আনবে । আমার জন্যে এক কাপ তোমার জন্যে এক কাপ । আমরা চা খেতে খেতে গল্প করব । ভালো কথা আমি যখন তোমাকে ডাকলাম তুমি এত ভয় পেলে কেন ? ভয়ে হাত থেকে একেবারে বদনা পড়ে গেল ।

বরকত জবাব দিল না, তার ঠোঁটের কোণায় অস্পষ্ট হাসির রেখা দেখা গেল । মিসির আলি হাঁটতে শুরু করলেন, চেরী গাছের নিচে এসে দাঁড়ালেন । তাঁর দৃষ্টি মাটির দিকে । হইল চেয়ারের কোনো দাগ কি মাটিতে আছে ? থাকার কোনোই কারণ নেই । কাল রাতে যা দেখেছেন তার পুরোটাই স্বপ্ন । এই সত্য সন্দেহাতীতভাবে সত্য । তারপরেও দেখা । মানুষের মন এমন যে একবার কোনো বিষয়ে সন্দেহ উপস্থিত হলে সেই সন্দেহ আর যেতেই চায় না । কাপড়ে ময়লা লেগে যাবার মতো । যত ভালো করেই ধোয়া হোক অস্পষ্ট দাগ থেকেই যায় । সেই দাগ বারবার ধূতে ইচ্ছা করে ।

হইল চেয়ারের পায়ের রেখা ভেজা মাটিতে আছে । মিসির আলির ভুক্ত কুক্ষিত হলো । স্বপ্নের একটি অংশ কী সত্য ? মানুষ যেমন মিথ্যা কথা বলার সময় মিথ্যার সঙ্গে কিছু সত্য মিশিয়ে দেয়, স্বপ্নেও কি সে রকম কিছু ঘটে ? মন্তিক স্বপ্নের সঙ্গে সামান্য বাস্তব মিশায় । মিসির আলি হইল চেয়ারের দাগ ধরে এগুতে লাগলেন । তাঁকে বেশিদূর যেতে হলো না, তার আগেই থমকে দাঁড়াতে হলো । লাইব্রেরি ঘরের বারান্দা থেকে সুলতান বলল, স্যার কী করছেন ? সুলতানের গলায় চাপা কৌতুহল ।

মিসির আলি বললেন, কিছু করছি না । হাঁটছি, প্রাতঃভ্রমণ বলতে পার ।

আমার কাছে মনে হচ্ছিল মাটিতে কী যেন খুঁজতে খুঁজতে এগুচ্ছেন । কী খুঁজছেন ? হইল চেয়ারের পায়ের দাগ ?

মিসির আলি বললেন, হ্যাঁ । তুমি কাল রাতে হইল চেয়ার নিয়ে বাগানে ঘুরেছ । কোথায় কোথায় গিয়েছিলে তাই দেখছিলাম ।

এই অনুসন্ধানের আপনার বিশেষ কোনো কারণ আছে কি ?

না তেমন কোনো কারণ নেই ?

শেষ রাতের দিকে বৃষ্টি থামল । আকাশ পরিষ্কার হলো । আমি বাগানে ঘুরছিলাম, এবং আকাশ দেখছিলাম ।

সুলতান হইল চেয়ার নিয়ে লাইব্রেরি ঘরের বারান্দা থেকে নিচে নামতে শুরু করল । হইল চেয়ারে বারান্দা থেকে বাগানে নামার জন্যে ব্যবস্থা করা আছে । তার পরেও তাকে নামতে হচ্ছে সাবধানে । সুলতান সহজ গলায় বলল, পঙ্গু মানুষেরও মাঝে মাঝে ঘুরে বেড়াতে ইচ্ছা করে । বাগানে যেতে ইচ্ছা করে ।

শীতের সময় বাগানে ঘুরে বেড়ানো সহজ। বর্ষার সময় বেশ কঠিন। কাদায় চাকা
ডেবে যায়। তখন পেছন থেকে কাউকে ঠেলতে হয়। স্যার আপনার রাতের ঘুম
ভালো হয়েছিল ?

হ্যাঁ ভালো হয়েছে।

বেশ ভালো, নাকি মোটামুটি ভালো ?

বেশ ভালো।

আপনি কি আর্লি রাইজার ?

না আজ কীভাবে কীভাবে যেন ঘুম ভেঙে গেছে। আমার কপালে সূর্যোদয়
দৃশ্য নেই। শুধুই সূর্যাস্তের দৃশ্য।

সুলতান হালকা গলায় বলল, আমার কপালে সূর্যোদয় দৃশ্য প্রচুর পরিমাণে
আছে। আমি রাতে ঘুমাই না। সকালে সূর্য দেখে ঘুমাতে যাই। আমার কপালে
সূর্যাস্ত নেই।

মিসির আলি বললেন, আমি তোমাকে ঘুম থেকে বঞ্চিত করছি, যাও শয়ে
পড়।

সুলতান বলল, না, আজ আমি আপনার সঙ্গে গল্প করব। চলুন নীল মরিচ
ফুল গাছটার কাছে যাই। আপনি বেদীতে বসবেন। আমি বসব হইল চেয়ারে।
আমাদের আই লেভেল ঠিক থাকবে।

মিসির আলি বললেন, বরকতকে চা নিয়ে আসতে বলেছিলাম। তুমি চা
খাবে ?

খেতে পারি।

চায়ে চিনি কতটুকু খাও ?

কেন জানতে চান বলুন তো ?

বিশেষ কোনো কারণ নেই। এমনি জিজেস করলাম।

দু'চামচ।

আমার ধারণা ছিল তুমি চায়ে চিনি খাও না।

এ রকম ধারণা হবার কারণ কী ?

মধু খাও না তো তাই ভাবলাম মিষ্টি জাতীয় কিছুই খাও না।

সুলতান শীতল গলায় বলল, মধু খাই না আপনাকে কে বলল ?

মিসির আলি হাসিমুখে বললেন, কেউ বলে নি। আমার ধারণা তুমি খাও না।
অন্যদের আগ্রহ করে খাওয়াও। আমার ধারণাটা কি ঠিক ?

হ্যাঁ আপনার ধারণা ঠিক। আমি মধু খাই না এই ধারণা আপনার কেন হলো
এটা বুঝতে পারছি না। ব্যাখ্যা করবেন ?

আমার সিঙ্গুলারি সেস এ রকম বলছিল।

সুলতান কঠিন গলায় বলল, সিঙ্গুলারি সেস বলে কিছু নেই। এটা আপনি যেমন জানেন, আমিও জানি। আমি মধু খাই না এটা কেন বললেন?

সুলতান তীক্ষ্ণ দৃষ্টিতে তাকিয়ে আছে। সে বড় বড় করে নিঃশ্বাস নিচ্ছে। তার হাতের মুঠি বৰ্ক। প্রতিটি লক্ষণ বলে দিচ্ছে সে রেগে গেছে। রাগ সামলাতে পারছে না। মিসির আলি সুলতানের রাগটাকে তেমন শুরুত্ব দিলেন বলে মনে হলো না। যেন তিনি ধরেই নিয়েছেন সুলতান রাগবে। মিসির আলি গাছের বেদীতে পা তুলে বসলেন। স্বাভাবিক গলায় বললেন, সুলতান তোমার কাছে কি সিগারেট আছে? দিনের প্রথম চা-টা সিগারেট দিয়ে থেতে হয়। আমি আমার প্যাকেট ভুলে উপরে রেখে এসেছি। সিগারেট হাতে নিয়ে বসে থাকি। এর মধ্যে চা চলে আসবে। সিগারেট হাতে বসে থাকার মধ্যেও আনন্দ আছে। যারা ধূমপান করে না তারা সুস্বাস্থের আনন্দ পায়, সিগারেট হাতে বসে থাকার আনন্দটা পায় না।

বরকত চা নিয়ে এসেছে। দু'জনের জন্যেই চা এনেছে। সুন্দর কাপে করে মিসির আলির জন্যে চা আর তার নিজের জন্যে গ্লাস ভর্তি চা। মিসির আলি বললেন, বরকত তুমি কাপটা তোমার বড় সাহেবকে দাও। আর আমি তোমার গ্লাসে করে চা খাব। গ্লাস ভর্তি করে চা খাওয়ায় আলাদা আনন্দ আছে। কাপের চা বাইরে থেকে দেখা যায় না। গ্লাসের চা দেখা যায়।

সুলতান সিগারেটের প্যাকেট বের করতে করতে বলল, ‘আমি মধু খাই না’ এই ধারণার পেছনে আপনার ব্যাখ্যাটা এখন শুনি। আমি ব্যাখ্যাটা শোনার জন্যে অপেক্ষা করছি।

আমার ব্যাখ্যা খুবই সহজ। তুমি আমাকে মধু দেবার সময় নাক মুখ কুঁচকে ফেলেছিলে। রিফ্রেঞ্চ একশান। সেখান থেকেই বুঝলাম তুমি মধু খাও না। খেলেও যে মধুটা আমাকে থেতে দিয়েছ সেটা খাও না।

তাহলে শুধু শুধু সিঙ্গুলারি সেসের কথা কেন বললেন?

আমি একটা ছোট পরীক্ষা করলাম। আমি দেখলাম সিঙ্গুলারি সেসের কথা শুনে তুমি চমকে গেলে খানিকটা রেগেও গেলে। চমকাও কি না এটাই ছিল আমার পরীক্ষা। বরকত দেখি চা ভালো বানায়।

সুলতান তাকিয়ে আছে। মনে হচ্ছে সে অপেক্ষা করছে মিসির আলি কি বলেন তা শোনার জন্যে। মিসির আলি সিগারেটে লঘা টান দিয়ে বললেন, তুমি যখন বললে সুন্দরবনে নানান ধরনের ফুলের মধু পাওয়া যায়— খলিসা ফুলের মধু, কেওড়া ফুলের মধু, গড়ান ফুলের মধু, তখন হঠাতে করে আমার মনে হলো— অনেক বিষাক্ত ফুলও তো প্রকৃতিতে আছে। যেমন ধর ধুতরা ফুল। এমনকি হতে

পারে না যে কিছু মৌমাছি ধূতরা ফুল থেকে মধু নেয়। সেই সব ফুলে ধূতরার ভয়ঙ্কর বিষ মিশবে। সেই বিষ হল a very powerful halucinating drug যা মানুষের চিন্তায় কাজ করে। চেতনাকে পাল্টে দেয়। রিয়েলিটির ভুল ব্যাখ্যা করে। সুন্দরবন হলো একটা ট্রিপিক্যাল ফরেন্স। পৃথিবীর সবচে' বড় ম্যানগ্রোভ বন। সেখানে ধূতরা ফুল থাকারই কথা। তুমি বল থাকবে না?

হাঁ থাকবে। এবং আছে। সুন্দরবনের ভেতর মাঝে মাঝে হঠাৎ কিছু ফাঁকা জায়গা পাওয়া যায়। সেখানে প্রচুর ধূতরা ফুল ফোটে।

সেই ফুল থেকে মৌমাছিরা মধু সংগ্রহ করে?

সব মৌমাছি করে না। বিশেষ এক ধরনের মৌমাছি করে। এদের মৌমাছিও বলে না। বলে মৌ পোকা।

মিসির আলি বললেন, যে-কোনোভাবেই হোক বিশেষ ধরনের এই মধু তোমার সংগ্রহে আছে। তার খানিকটা তুমি আমাকে দু'দফায় খাইয়েছ যে কারণে আমি ভয়ঙ্কর দুঃস্বপ্ন দেখেছি। দুঃস্বপ্নের সঙ্গে বাস্তব মিশে ছিল। প্রথম রাতে সাপ নিয়ে কথা হলো— আমি স্বপ্নে দেখলাম সাপ। দ্বিতীয় রাতে কুকুর নিয়ে কথা হলো। লিলি আমাকে বলল, দরজার ছিটকিনি বন্ধ করে ঘুমুতে— মাঝে মাঝে কুকুর দোতলায় উঠে আসে। সেই রাতে আমি স্বপ্নে দেখলাম কুকুর। কুকুরটা ঘরে ঢুকে আমার বিছানার চারদিকে ঘুরপাক খাচ্ছিল।

সুলতান বলল, আপনার ডিডাকটিভ লজিক যে ভালো, আমি জানতাম। এতটা ভালো বুবতে পারি নি। I am impressed.

মিসির আলি চায়ের গ্লাস নামিয়ে রাখতে রাখতে বললেন, এখন তুমি কি আমাকে বলবে, কেন আমাকে এখানে এনেছ? তারা দেখানোর জন্যে নিশ্চয়ই আন নি। চিঠিতে তুমি টোপ ফেলার কথা বলেছ। সেটা কথার কথা ছিল না। আসলেই টোপ ফেলে এনেছ। কেন এনেছ? খোলাখুলি বলতে অসুবিধা আছে?

না অসুবিধা নেই। আপনার সঙ্গে অনেক লুকোচুরি খেলা হয়েছে। আর খেলার প্রয়োজন দেখছি না।

তাহলে তোমার উদ্দেশ্যটা বলে ফেল। তুমি কিছু মনে করো না— আমার এখানে থাকতে ভালো লাগছে না। আমি আজ চলে যাব। দুপুরের পর রওনা হতে চাই।

সুলতান বলল, আজ অমাবস্য। আকাশে মেঘ নেই। আমি নিশ্চিত যে আজ রাতে আকাশ পরিষ্কার থাকবে। আপনাকে আজ রাতে একটা স্পাইরাল গ্যালাক্সি দেখাব। দেখার পর মনে হবে আপনার মানব জীবন ধন্য।

আমার গ্যালাক্সি দেখার শখ এখন নেই। আমি চলে যেতে চাই। আকাশ দেখতে ইচ্ছা করছে না।

সুলতান শীতল গলায় বলল, স্যার শুনুন। আপনার ব্যক্তিগত ইচ্ছা অনিচ্ছার
কথা ভুলে যান। আমি আপনাকে এখান থেকে বের হতে দেব না।

মিসির আলি অবাক হয়ে বললেন, বের হতে দেবে না ?

সুলতান বলল, না। এবং তার জন্যে কোনো সমস্যাও হবে না। কেউ
জানবেও না আপনি কোথায় আছেন। আপনার পরিচিতজনরা জানে আপনার
স্বভাব হচ্ছে মধ্যে বাইরে কোথাও চলে যাওয়া। সবাই ভাববে এবারো তাই
হয়েছে। আপনার এক ছাত্র আপনার জন্য টেকনাফে অপেক্ষা করছে। সে যখন
দেখবে আপনি এসে পৌছান নি তখন সে খানিকটা খোঁজ খবর করবে। সবাই
জানবে টেকনাফ যাবার পথে আপনি হারিয়ে গেছেন। কিছুদিন পর মানুষ
আপনাকে ভুলে যাবে। মানুষ বিশ্বতিপরায়ণ জীব।

আমাকে এখানে আটকে রেখে তোমার লাভ কি ?

লাভ আছে। সাইকোলজি বিশেষ করে প্যারাসাইকলজির উপর আপনার
দখল অসাধারণ। আপনি আমার উপর গবেষণা করবেন। আমার মাথার ভেতর
উকি দিয়ে দেখবেন সেখানে কী আছে। কেন আমি এ রকম ?

তুমি কী রকম ?

আপনার অনুমান শক্তি তো ভালো আপনি অনুমান করুন। আপনাকে
সামান্য সাহায্য করছি। আমার তুলনায় অশ্বিনী কুমার রায় একজন মহাপুরুষ।
হা হা হা।

মিসির আলি তাকিয়ে আছেন। সুলতানও তাঁর দিকে তাকিয়ে আছে। সে
এখন আর হাসছে না। কিন্তু হাসিটা শরীরের ভেতর আছে। কারণ তার শরীর
কাঁপছে। মনের ছায়া চোখে না-কি পড়ে। চোখ হচ্ছে মনের জানালা। মিসির
আলির মনে হলো না— সুলতানের চোখে মনের কোনো ছায়া পড়েছে। শান্ত স্থির
চোখ। যে চোখ বুদ্ধিতে ঝকমক করছে।

সুলতান বলল, স্যার আপনার কি ভয় লাগছে ?

মিসির আলি বললেন, না।

সুলতান বলল, ভয় লাগছে না কেন ?

বুঝতে পারছি না কেন ?

সুলতান বলল, আপনি যে ভয় পাচ্ছেন না সেটা আপনাকে দেখে বোঝা
যাচ্ছে। ভয় পাবেন না জানলে আগেই আপনাকে বলতাম। যাই হোক আপনার
উচিত আমাকে ধন্যবাদ দেয়া।

কেন বল তো ?

সুলতান সিগারেট ধরাতে ধরাতে বলল, আপনাকে জীবনের শ্রেষ্ঠতম গবেষণার সুযোগটা আমি করে দিচ্ছি। একজন অতি ভয়ঙ্কর মানুষকে আপনি খুব কাছ থেকে দেখার সুযোগ পাচ্ছেন। যে আপনার গবেষণায় আপনাকে সাহায্য করবে। আপনিও আমাকে কিছুটা সাহায্য করবেন।

আমি কী সাহায্য করব?

আমাকে সঙ্গ দেবেন। আপনার সঙ্গে বিজ্ঞান, সাহিত্য, শিল্পকলা নিয়ে আলাপ করব। আকাশের তারা দেখব। তা ছাড়া আমি নিজেও ছোটখাট কিছু পরীক্ষা করছি। মানসিক পরীক্ষা। এই পরীক্ষাতেও আপনি সাহায্য করবেন। মনোজগতের যে পড়াশোনা আপনার আছে আমার তা নেই। পরীক্ষাটা ঠিকমতো হচ্ছে কি না আপনি দেখে দেবেন।

কী পরীক্ষা?

সালমা নামের একটা মেয়ের কথা আপনাকে চিঠিতে লিখেছিলাম। তাকে নিয়েই পরীক্ষা। আমি মোটামুটি নিশ্চিত যে, সব মানুষের ভেতরই অতীন্দ্রিয় ক্ষমতা আছে। মানুষের মনে ভয়ঙ্কর চাপ দিয়ে সেই ক্ষমতা বের করে আনা যায়। আমি সালমার উপর এই চাপটাই দিচ্ছি।

মেয়েটা কোথায়?

মেয়েটা এ বাড়িতেই আছে। রাতে আপনার সঙ্গে পরিচয় করিয়ে দেব।

লিলি বলছিল সালমা বলে আলাদা কেউ নেই। লিলিই সালমা।

লিলির সব কথা গুরুত্বের সঙ্গে গ্রহণ করার কিছু নেই। আমি এখন ঘুমুতে যাব। আপনার কিছু জিজ্ঞেস করার থাকলে জিজ্ঞেস করবুন।

হইল চেয়ারের কি তোমার প্রয়োজন আছে?

না, হইল চেয়ারের আমার কোনোই প্রয়োজন নেই। আমি শারীরিকভাবে সুস্থ একজন মানুষ। ইচ্ছা করেই হইল চেয়ারে সময় কাটাই যাতে বাইরের লোকজন জানে এ বাড়িতে পঙ্কু একজন মানুষ থাকে। পঙ্কু বলেই সে শহর ছেড়ে নির্জন বাস করে। এই কাজটা না করলে কথা উঠত সম্পূর্ণ সুস্থ একজন মানুষ দিনের পর দিন এই নির্জনে স্বেচ্ছাবন্দি হয়ে আছে কেন? অবশ্যি হইল চেয়ারের একটা ভালো ব্যবহারও আছে। টেলিফোন ফিট করে তারা দেখার সময় এটা খুব কাজে লাগে।

তুমি যে আমাকে এখানে আটকে রাখার জন্যে এনেছে তা-কি এ বাড়ির লোকজন জানে?

জানবে না কেন? জানে। লিলি জানে, বরকত জানে। আপনার মতো অনেকেই এ বাড়িতে আসে। কেউ ফিরে যায় না। বুঝতেই পারছেন এ বাড়ি থেকে

কাউকে জীবিত ফেরত পাঠানো আমার জন্যে সম্ভব না। কোনো ভয়ঙ্কর মানুষ যদি তার কর্মকাণ্ড চালিয়ে যেতে চায় তাহলে অবশ্যই তাকে সাবধানী হতে হবে। সিরিয়াল কিলারদের কথাই ধরুন— সব সিরিয়াল কিলারই চিতাবাঘের চেয়েও সাবধানী। তাকে একের পর এক মানুষ মারতে হবে। সাবধানী না হলে এই কাজটা সে করতে পারবে না। স্যার আমি কি ঠিক বলছি?

হ্যাঁ ঠিক বলছ।

থ্যাক্ষ যু। আমি সালমা মেয়েটিকে নিয়ে গবেষণাধর্মী যে কাজটা করেছি তা লেখার চেষ্টা করেছি। আমি পাঠিয়ে দেব। পড়ে দেখুন। লেখাটা গবেষণাধর্মী হয় নি। সাইন্টিফিক পেপার কী করে লিখতে হয় জানি না। এই দায়িত্বটা আপনার। আমরা এই জঙ্গলে বসে একের পর এক রিসার্চ পেপার বিদেশী জার্নালে পাঠাব। মূল অথার আপনি আমি কো-অথার।

সুলতান হাসল। সেই হাসি যা চট করে মুখ থেকে মুছে যায় কিন্তু শরীরে থেকে যায়। বেশ কিছুক্ষণ শরীর দুলতে থাকে। এই প্রথম মিসির আলির শরীর শুলিয়ে উঠল। তাঁর কাছে মনে হলো ঘেন্নাকর কিছু তার সামনে বসে আছে।

সুলতান বলল, স্যার এখন আপনি আমাকে সামান্য ভয় পাচ্ছেন। আপনার চোখ মুখ শুকিয়ে গেছে। কোম্পেনি হিসেবে আমি খারাপ হব না। আমি শিক্ষিত একজন মানুষ। অক্ষেশান্নের মতো একটা জটিল বিষয়ে আমার পিএইচ.ডি. ডিগ্রি আছে। আপনি যদি অংকের ছাত্র হতেন তাহলে আমাকে চেনার সামান্য সম্ভাবনা ছিল— আমার পিএইচ.ডি.'র কাজ খুব ভালো হয়েছিল। এই খিওরির সব বইতেই সুলতান ফাংশান বলে একটা ফাংশানের উল্লেখ আছে। আমার নামে তার নাম। মৌবনে এই দিকে কিছু মেধা ব্যয় করেছিলাম। পরে এইসব অর্থহীন মনে হয়েছে। স্যার আমি কী বলছি আপনি কি শুনছেন?

হ্যাঁ শুনছি।

এখন আমার কাছে মনে হচ্ছে আসল রহস্য পদার্থবিদ্যা বা অঙ্কে না—আসল রহস্য মানুষের মনে। আকাশ যেমন অন্তর্হীন মানুষের মনও তাই। পৃথিবীর বেশির ভাগ অঙ্কবিদ আকাশের দিকে তাকিয়ে থাকতে ভালোবাসতেন। আমিও ভালোবাসি। আকাশের দিকে তাকালে জাগতিক সব কিছুই তুচ্ছ মনে হয়। We are so insignificant. আমাদের জন্ম-মৃত্যু সবই অর্থহীন।

মিসির আলি বললেন, তুমি কি মানুষ খুন করেছ?

সুলতান জবাব দিল না।

মিসির আলি বসে স্তুতি হয়ে আছেন। সুলতান ছাইল চেয়ার ঘুরিয়ে চলে যাচ্ছে। পেয়ারা গাছের নিচে বরকতকে দেখা যাচ্ছে সে কুকুরকে গোসল দিচ্ছে।

ରୋଦ ଉଠେଛେ । ଆବହାସ୍ୟା ଅତ୍ୟନ୍ତ ମନୋରମ । ଚେରୀ ଗାଛ ଥେକେ ଏକଟା ଦୁଟା
କରେ ଫୁଲ ପଡ଼େଛେ । ଫୁଲଶୁଳି ଗାଛେ ସତ ସୁନ୍ଦର ଦେଖାଚେ— ହାତେ ନେଯାର ପର ତତ
ସୁନ୍ଦର ଲାଗିଛେ ନା । କିଛୁ ସୌନ୍ଦର୍ୟ ଦୂର ଥେକେ ଦେଖିତେ ହୁଯ, କାହିଁ ଥେକେ ଦେଖିତେ ହୁଯ
ନା ।



আমার নাম সুলতান ।

সাধারণত গরিব ঘরের ছেলেমেয়েদের এ জাতীয় নাম থাকে । সুলতান, সম্মাট, বাদশাহ । বাবা মা ভাবেন বড় হয়ে ছেলে রাজা বাদশাহ হবে । আমি কোনো গরিব ঘরের সন্তান ছিলাম না । বিস্তারিত পরিবারের সন্তান ছিলাম । আমার বাবা মা'র সন্তানদের নামকরণের মতো তুচ্ছ বিষয়ে কোনো আগ্রহ ছিল না । আমরা অনেকগুলি ভাই-বোন ছিলাম । মা প্রতিবছর একটি করে সন্তান প্রসব করতে করতে ক্লান্ত হয়ে পড়েছিলেন । জ্ঞান হ্বার পর থেকেই আমি মা'কে বিছানায় শোয়া পেয়েছি । নিজের সন্তানদের দিকে তাকানোর মতো অবস্থা তাঁর ছিল না । তাঁর মন এবং শরীর দুইই নষ্ট হয়ে গিয়েছিল । শেষের দিকে তিনি মৃত্যুর জন্যে অপেক্ষা শুরু করলেন ।

আমরা থাকতাম পুরনো ঢাকার একটা বাড়িতে । সেই বাড়িটিও বিশাল । সেই বাড়িও উচ্চ পাঁচিলে ঘেরা । আমাদের পড়াশোনার জন্যে ঢাকায় এনে রাখা হয়েছিল । কিন্তু সেই দিকে কারো কোনো নজর ছিল বলে মনে হয় না । বাবা ব্যস্ত তাঁর ব্যবসা নিয়ে । আজ ঢাকা, কাল নারায়ণগঞ্জ, পরশু খুলনা এই অবস্থা । মা বিছানায় । বাড়ি ভর্তি কাজের লোক । এরা পান থেয়ে ব্যস্ত ভঙ্গিতে ঘোরাফেরা ছাড়া কিছু করে না । সন্ধ্যার পর দু'জন প্রাইভেট টিউটর আসেন । তাঁরা চা পানি খান । বেত নিয়ে হাস্তিষ্ঠি করেন । সন্ধাহে তিনি দিন আসেন একজন মওলানা । তাঁর বিরাট দাঢ়ি, চোখে সুরমা । তিনি আমাদের কোরান শরীফ পাঠ করা শেখান । বিরাট বিশৃঙ্খলার ভেতরে আমরা বড় হচ্ছি । তবে বিশৃঙ্খলারও নিজস্ব ছন্দ আছে । কোথাও ছন্দ পতন হচ্ছে না । একদিন হলো—আমার বড় বোন মারা গেল, ভালো মানুষ— সারাদিন কাজকর্ম করেছে । মওলানা সাহেবের কাছে সিপারা পড়েছে । রাতে এশার নামাজ পড়ে ঘুমুতে গিয়েছে, সেই ঘুম আর ভাঙল না ।

বাবা তখন চিটাগাং-এ । তিনি খবর পেয়ে কাজকর্ম ফেলে চলে এলেন । তাঁকে কল্যাণ শোকে অধীর বলে মনে হলো না, তিনি শুধু বারান্দার এ মাথা

থেকে ও মাথা পর্যন্ত হাঁটতে লাগলেন আর বারবার বলতে লাগলেন— সমস্যাটা কী ? ঘটনাটা কী ?

বড় বোনের মৃত্যুর পেছনে কোনো সমস্যা বা ঘটনা হয়তো ছিল আমি নিতান্তই শিশু বলে বুঝতে পারি নি। আমার বড় বোনের নাম মীরু তার তখন আঠারো উনিশ বছর। সমস্যারই সময়। আমার ধারণা ভালো কোনো সমস্যাই ছিল।

বড় বোনের মৃত্যুর ঠিক ছ'মাসের মাথায় মারা গেল আমার মেজো ভাই। তার নাম ইজাজত। কুল থেকে ফেরার পথে রিকশার ধাক্কা থেয়ে নর্দমায় পড়ে গিয়ে মাথায় ব্যথা পেল। বাসায় এসে কয়েকবার বমি করে চোখ উল্টে দিল। বাবা শোকে যে অভিভূত হলেন তা-না চোখ মুখ কুঁচকে বললেন, সমস্যাটা কী ? ট্রাকের নিচে পড়ে মারা যায় এটা ঠিক আছে। কিন্তু রিকশার নিচে পড়ে মৃত্যু এটা কেমন কথা ? আর কিছু না অভিশাপ লেগে গেছে। মহাঅভিশাপ লেগে গেছে। এই বাড়িতে থাকা আর ঠিক হবে না।

সেই বছরের শেষ দিকে আমার 'সবচে' ছোট বোনটা মারা গেল। তার মৃত্যু স্বাভাবিকভাবেই হয়েছিল বলা চলে। ডিপথেরিয়ায় মৃত্যু। ছোটবোনের মৃত্যুর পর বাবা সবাইকে নিয়ে গ্রামের বাড়িতে চলে আসেন। ঠিক হলো ঢাকায় নতুন কোনো বড় বাড়ি ঠিক না হওয়া পর্যন্ত আমরা গ্রামে থাকব। অভিশাপ লাগা বাড়িতে ফিরে যাব না। গ্রামের বাড়িতে আমাদের লেখাপড়া দেখিয়ে দেবার জন্যে সার্বক্ষণিক একজন শিক্ষক রাখা হলো তার নাম ইদরিশ। মুহম্মদ ইদরিশ মাস্টার। বাবা তাঁকে ডেকে বিশেষ নির্দেশ দিয়ে দিলেন— শিশুদের শাসনে রাখতে হবে। কঠিন শাসন। পড়াশোনা না করলে, বেয়াদবি করলে মেরে তক্তা বানিয়ে দেবে। কোনো অসুবিধা নেই। শিশুদের দুইটাই অমুখ। একটা কৃমির অমুখ, আরেকটা মার।

মুহম্মদ ইদরিশ অত্যন্ত উৎসাহে তাঁর কর্মকাণ্ড শুরু করলেন। প্রতিদিনই তিনি নির্যাতনের নানান কৌশল বের করতে লাগলেন। দুই হাতে ইট নিয়ে সূর্যের দিকে তাকিয়ে থাকা দিয়ে শুরুটা করলেন। হাতের ইট তাঁর পায়ে ফেলে দিয়ে তাঁকে প্রায় খোড়া করে ফেলার চেষ্টা করেছিলাম বলেই হয়ত আমার শাস্তির ব্যাপারে তিনি বিশেষ যত্নবান হলেন। এমন সব শাস্তি যা অনেক চিন্তা-ভাবনা, গবেষণা করে বের করতে হয়। চট করে মাথায় আসে না।

আমাকে তিনি এক বিকালে বিশেষ এক ধরনের শাস্তি দেবার জন্যে মন্দিরে নিয়ে চুকলেন। গা থেকে শার্ট খুলে খালি গা করলেন। দড়ি দিয়ে দুই হাত পেছন মোড়া করে বাঁধলেন। তারপর দুটা প্রকাণ্ড বড় বড় মাকড়সা সুতা দিয়ে

বেঁধে আমার গলায় মালার মতো পরিয়ে দিয়ে মন্দিরের দরজা বন্ধ করে চলে গেলেন।

আমার মাকড়সা ভীতি আছে। এই নিরীহ প্রাণী মানুষের কোনোই ক্ষতি করে না কিন্তু যারা একে ভয় পায় তাদের কাছে এরা রাজ্যের বিভীষিকা নিয়ে উপস্থিত হয়। যে কারণে মাকড়সা ভীতির আলাদা নাম পর্যন্ত আছে।

প্রথম কিছুক্ষণ আমার মনে হলো আমি বোধহয় এক্ষুণি মারা যাব। সুতা দিয়ে বাঁধা মাকড়সা দুটা সারা গায়ে কিলবিল করছে। গলা বেয়ে মুখের দিকে উঠতে চেষ্টা করছে। আমি চিংকার করার চেষ্টা করছি গলা দিয়ে সামান্যতম শব্দও বের হচ্ছে না। আমার ইচ্ছা করছিল ছুটে গিয়ে দরজার আছড়ে পড়ি। সেটা সম্ভব হচ্ছিল না, কারণ আমার হাত-পা জমে গিয়েছিল। ঘর অঙ্ককার। আমি চোখে কিছুই দেখছি না, কিন্তু অন্তুত কারণে মাকড়সা দুটাকে দেখতে পাচ্ছি। মনে হচ্ছে তাদের গা থেকে হালকা সবুজ আলো বের হচ্ছে। এই সময় অন্তুত একটা ঘটনা ঘটল— চোখের সামনে দেখলাম একটা মেয়ে দাঁড়িয়ে আছে। তার মুখ হাসি হাসি— যুবতী মেয়ে। তার গায়ে কোনো কাপড় নেই তার জন্যে কোনো লজ্জাও নেই। তার মাথা ভর্তি লম্বা লম্বা চুল। সেই চুল মুখের উপর পড়ে আছে বলে মুখ পরিষ্কার দেখা যাচ্ছে না। মেয়েটা বলল, মাকড়সা তো সামান্য পোকা। তুই ভয়ে দেখি মরে যাচ্ছিস?

আমি বললাম, আপনি মাকড়সা দুটা ফেলে দিন। আপনার পায়ে পড়ি।

নারী মূর্তি বলল, পায়ে পড়ে লাভ হবে না। আমি মাকড়সা হাত দিয়ে ছেঁব না। স্বান করে এসেছি। হাত নোংরা হবে। তুই মাকড়সার দিকে না তাকিয়ে আমার দিকে তাকিয়ে কথা বল। তাহলে ভয় কমবে।

আমি বললাম, আপনি কে?

নারী মূর্তি চাপা গলায় বলল, আমি গৌর কালী। কী আশ্চর্য তুই তো দেখি মাকড়সার ভয়ে মরেই যাচ্ছিস! পেছাব করে মন্দিরও অপবিত্র করে ফেলেছিস। তুই কেমন ছেলে বল দেখি। মাকড়সার ভয়ে কেউ পেছাব করে? ছিঃ!

আমি বললাম, আপনি একটা কাঠি দিয়ে মাকড়সা দুটা ফেলে দিন।

নারী মূর্তি চাপা হাসি হাসতে হাসতে বলল— পাগলের মতো কথা বলবি না। আমি এখন কাঠি পাব কোথায়? কাঠি খুঁজতে হলে মন্দিরের বাইরে যেতে হবে। কুয়ার পাড়ে তোর মাস্টার বসে আছে। আমি নেংটো হয়ে তার সামনে যাব না-কি? তোকে একটা বুদ্ধি দেই শোন— এই মাস্টার তোকে আরো অনেক যন্ত্রণা দেবে। যন্ত্রণা দেবার আগেই ব্যবস্থা করে ফেল।

কী ব্যবস্থা ?

মাস্টারকে প্রায়ই দেখি কুয়ার ওপর বসে থাকে। আচমকা ধাক্কা দিয়ে
ব্যাটাকে কুয়ার ভেতর ফেলে দিবি। পারবি না ?

না।

না পারার কী আছে ? এক ধাক্কায় সব সমস্যার সমাধান। খুবই গহিন
কুয়া। নিচে বিষাক্ত গ্যাস। একবার পড়লে আর দেখতে হবে না। কাজটা যে
তুই করেছিস সেটাও কেউ বুঝবে না। ভাববে নিজে নিজে পড়ে গেছে। আমার
অবশ্যি ধারণা কেউ— কোনোদিন জানবেও না যে এইখানে একজন মানুষ
পড়ে আছে।

মন্দিরের ভেতরের সূত্রি এরপর আর আমার কিছু মনে নেই। হয়তো আমি
অজ্ঞান হয়ে পড়েছিলাম। এই ঘটনার তৃতীয় দিনের দিন আমি মুহুর্মুহুর ইদরিশ
মাস্টারকে ধাক্কা দিয়ে কুয়ায় ফেলে দেই। কুয়াটা খুব গভীর তো বটেই ধাক্কা
দেয়ার অনেক পরে ঝাপাং শব্দটা কানে আসে। ও আল্লাগো ও আল্লাগো শব্দটি
দু'বার শোনা যায়। তারপর সব নিষ্ঠক। আমি খুব স্বাভাবিকভাবে কুয়ার পাড়ে
কিছুক্ষণ হাঁটাহাটি করি। তারপর ঘরে চলে আসি।

মাস্টার সাহেব বাড়িতে নেই এটা নিয়ে বাড়ির কাউকেই উদ্বিগ্ন হতে দেখা
গেল না— কারণ তখন আমার মায়ের শরীর খুবই খারাপ। শ্বাস কষ্ট হচ্ছে।
এখন মারা যান তখন মারা যান অবস্থা। মওলানা ঢাকা হয়েছে। মওলানা
তওবা করিয়েছেন। খবর পেয়ে বাবা চলে এসেছেন ঢাকা থেকে। মা সেই
যাত্রা রক্ষা পেয়ে যান। বাবা উৎফুল্ল মনে ঢাকায় ফিরে যান। যাবার আগে
আরেকজন নতুন মাস্টার ঠিক করে যান। মুহুর্মুহুর ইদরিশের বিষয়ে তিনি
সিদ্ধান্ত নেন যে সে ভালো কোনো সুযোগ পেয়ে ঢাকার ছেড়ে ঢাকায় চলে
গেছে। নিমকহারাম টিমকহারাম বলে তাকে অনেক গালাগালিও করেন।

মা'র শরীর আরেকটু ভালো হলে আমরা আবার ঢাকা শহরে চলে আসি।
মুহুর্মুহুর ইদরিশ কুয়ার ভেতর থেকে যায়। তার বিষয়ে কেউ কিছুই জানে না।
আমি নিজেও ব্যাপারটা ভুলে যাই। একবার শুধু রাতে মন্দিরে দেখা নারী
মূর্তিকে স্বপ্নে দেখি। স্বপ্নটা এ রকম— আমি মন্দিরের বারান্দায় বসে পেয়ারা
খাচ্ছি। নারী মূর্তি এসে আমার সামনে দাঁড়াল। পরিচিত ভঙ্গিতে হাসতে
হাসতে বলল, এই বাদর! আমাকে চিনতে পারছিস না ? আমি বললাম চিনতে
পারছি।

অন্যদিকে তাকিয়ে কথা বলছিস কেন ? না-কি আমার গায়ে কাপড় নেই
বলে তাকাতে লজ্জা লাগছে।

আমি বললাম, লজ্জা লাগছে ।

চোখের দিকে তাকিয়ে কথা বল তাহলে লজ্জা লাগবে না । এখন বল দেখি
ইদরিশ মাস্টারের উচিত শিক্ষা হয়েছে না ?

আমি বললাম, হয়েছে ।

দেখলি কেউ কিছু বুঝতে পারে নি ।

হ্যাঁ ।

মানুষের শরীর পচে গেলে খুবই দুর্গন্ধি হয় । কুয়াটাতো অনেক গভীর
এই জন্যে পচা গন্ধ নিচে জমে আছে উপরে আসতে পারছে না । বুঝতে
পারছিস ?

হ্যাঁ ।

আমি তোকে একটা বিষয়ে সাবধান করতে এসেছি ।

কোন বিষয়ে ?

তুই কুয়ার ধারে একা একা যাবি না ।

গেলে কি হবে ?

ইদরিশ মাস্টার তোকে ডাকবে । তুই বাচ্চা মানুষতো । ডাক শুনে ভয় টয়
পেতে পারিস ।

আচ্ছা কুয়ার পারে যাব না ।

কখনো কোনোদিনও কুয়ার ভেতরে কি আছে উকি দিয়ে দেখতে যাবি না ।
দেখতে গেলেই মহাবিপদ ।

আচ্ছা দেখতে যাব না ।

ইদরিশ মাস্টারের প্রসঙ্গ এইখানেই শেষ । অনেক বছর পর ইদরিশ
মাস্টারের প্রসঙ্গটা আমার আবার মনে আসে । তখন আমি বিলেতে পড়াশোনা
করছি । কোন এক উইক এন্ড হাঁত্য একটা বই হাতে এল— বইটার নাম The
crystal door. বইটার লেখক কিংস কলেজের একজন বিখ্যাত সাহিকিয়াট্রিস—
James Hauer. তিনি এই বইটিতে বললেন—মানুষের মনের কিছু দরজা আছে
যা সহজে খোলে না । মানুষ যদি কোন কারণে ভয়ংকর কোন চাপের মুখোমুখি
হয় তখনি দরজা খুলে যায় । তিনি এই দরজার নাম দিয়েছেন crystal door.

জেমস হাউলার বলছেন— এই স্ফটিক দরজার সন্ধান বেশির ভাগ মানুষ
সমগ্র জীবনে কখনো পায় না । কারণ বেশির ভাগ মানুষকে তীব্র ভয়াবহ
মানসিক চাপের মুখোমুখি হতে হয় না । জেমস হাউলার মনে করেন মানুষের
কাছে দু'ধরনের বাস্তব আছে । একটি দৃশ্যমান জগতের বাস্তবতা, আরেকটি

অদৃশ্য জগতের বাস্তবতা । স্বপ্ন হচ্ছে সে রকম একটি অদৃশ্য জগত এবং সেই জগতও দৃশ্যমান জগতের মতই বাস্তব । স্ফটিক দরজা বা crystal door হলো অদৃশ্য বাস্তবতার জগতে যাবার একমাত্র দরজা । এই সাইকিয়াট্রিস্ট মনে করেন যে কৃত্রিম উপায় মানুষের মনে চাপ সৃষ্টি করে অদৃশ্য দরজা খোলা যেতে পারে । তিনি একটি কৃত্রিম উপায় বেরও করেছেন । তার উপর গবেষণা করছেন ।

মনের উপর কৃত্রিম চাপ সৃষ্টির জন্যে তিনি উৎসাহী ভলেন্টিয়ারকে একটি সাত ফুট বাই সাত ফুট এয়ার টাইট ধাতব বাস্ত্রে ঢুকিয়ে তালাবদ্ধ করে দেন । বাস্ত্রের ভেতরটা ভয়ংকর অঙ্ককার । বাইরের কোন শব্দও সেখানে যাবার কোন উপায় নেই । পরীক্ষাটা কী, কেমন ভাবে হবে তার কিছুই ভলেন্টিয়ারকে জানানো হয় না । সে কোন রকম মানসিক প্রস্তুতি ছাড়াই বাস্ত্রের ভেতর ঢোকে । তারপর হঠাতে লক্ষ করে বাস্ত্রের ভেতর পানি জমতে শুরু করছে । আস্তে আস্তে পানি বাড়তে থাকে । ভলেন্টিয়ার বাস্ত্রের ভেতর দাঁড়ায় । ডাকাডাকি করতে শুরু করে । বাস্ত্রের ডালায় ধাক্কা দিতে থাকে । কোন উত্তর পায় না । এদিকে পানি বাড়তে বাড়তে তার গলা পর্যন্ত চলে আসে । সে প্রাণে বাঁচার জন্যে পায়ের আঙুলে ভর করে উঠে দাঁড়ায় । পানি বাড়তেই থাকে । পানি নাক পর্যন্ত যাবার পর পরীক্ষাটা বন্ধ হয় । তীব্র ভয়ে ভলেন্টিয়ার দিশাহারা হয়ে যায় । পরীক্ষায় দেখা গেছে শতকরা ত্রিশভাগ ভলেন্টিয়ার পরীক্ষার শেষ পর্যায়ে হঠাতে নিজেকে বাস্ত্রের বাইরে আলো ঝলমল একটা জগতে দেখতে পায় । যে জগতের আলো পৃথিবীর আলোর মতো না । সেই আলোর বর্ণ সোনালি । সেই জগতের বৃক্ষরাজি পৃথিবীর বৃক্ষরাজির মতো না । সেই জগত অন্তুত অবাস্তব এক জগত । যেখানে অস্পষ্ট কিন্তু মধুর সঙ্গীত শোনা যায় । শতকরা দশভাগ ভলেন্টিয়ার নিজেদের আবিক্ষার করেন অঙ্ককার ধূম্রময় এক জগতে । সেই জগৎ আতঙ্ক এবং কোলাহলের জগত । বাকি ষাট ভাগ কিছুই দেখে না । তারা আতঙ্কময় এক অভিজ্ঞতা নিয়ে বাস্ত্র থেকে বের হয়ে আসে ।

আমি জেমস সাহেবের বইটি পড়ে মোটামুটি নিশ্চিত হয়ে যাই যে শৈশবে মুহুর্মুহুর ইদরিশ মাস্টার না জেনেই এ ধরনের একটি পরীক্ষা আমার উপর করেছিল । তয়াবহ মানসিক চাপ সৃষ্টি করে স্ফটিক দরজা খোলার ব্যবস্থা করেছিল । আমি আমার পাঠ্য বিষয় গণিতশাস্ত্রের চেয়ে প্যারাসাইকলজির বিষয়ে বেশি আগ্রহ বোধ করতে থাকি । এ ধরনের বইপত্র যেখানে যা পাই পড়ে ফেলার চেষ্টা করি । এটা করতে গিয়ে অনেক ভালো বই যেমন পড়েছি— অনেক মন্দ বইও পড়েছি । উদাহরণ ভালো বই পড়ার উদাহরণ হিসেবে

বলি— মৃত্যুদণ্ডপ্রাপ্ত আসামীদের মানসিক জগত নিয়ে লেখা পেরিনের অসাধারণ বই Death call. পেরিন দেখিয়েছেন মৃত্যুর দিন এগিয়ে আসার সঙ্গে সঙ্গে মৃত্যুদণ্ডপ্রাপ্ত মানুষদের মানসিক রূপান্তর একই ধারায় হয়। মৃত্যুর খুব কাছাকাছি চলে আসার পর হঠাৎ মনে হয় মানুষগুলি আর এ জগতে বাস করছে না। তারা অন্য কোন জগতের বাসিন্দা হয়ে গেছে। যে জগতটির সঙ্গে পৃথিবীর জগতের কোনই মিল নেই। তাদের কাছে সেই জগতটি সত্য বলে মনে হয়।

পেরিনের লেখা আরেকটি বইও আমাকে আলোড়িত করেছিল। এই বইটি ক্যানসারে আক্রান্ত রুগ্নীদের নিয়ে লেখা। রুগ্নীরা জানেন তাদের মরণ ব্যাধিতে ধরেছে। বাঁচার কোনো আশা নেই। তারপরেও মনের গভীর গোপনে বেঁচে থাকার আশা পোষণ করেন। তাঁরা ভাবেন একটা কিছু অলৌকিক ব্যাপার তাঁদের জীবনে ঘটবে। ঈশ্বর প্রার্থনা শুনবেন তাদের আরোগ্য করবেন। ক্যানসারের কোনো অশুধ বের হয়ে যাবে। সেই অশুধে রোগমুক্তি ঘটবে। আশায় আশায় বাঁচতে থাকেন। এক সময় হঠাৎ করেই বুঝতে পারেন— কোনো আশা নেই। নিশ্চিত মৃত্যু সামনেই অপেক্ষা করছে। তখন তাঁরা অন্য রকম হয়ে যান। আস্তা তাঁদের ত্যাগ করে। আশা ত্যাগ করার পরও দু'এক দিন তাঁরা বাঁচেন। সেই বাঁচা ভয়াবহ বাঁচা। মানুষটা বেঁচে আছে, কথা বলছে, খাচ্ছে ঘুমুচ্ছে কিন্তু মানুষটার আস্তা নেই।

আমার মায়ের বেলায় ঠিক একই ব্যাপার ঘটেছিল। আস্তা তাঁকে ছেড়ে চলে গিয়েছিল। সে এক ভয়াবহ ব্যাপার!

বিলেতে পড়াশোনার সময়ই আমি মনে মনে ঠিক করে ফেলি সুযোগ এবং সুবিধামত আমি প্যারাসাইকলজির উপর কিছু কাজ করব। সেই সুযোগের জন্যে আমাকে দীর্ঘদিন অপেক্ষা করতে হয়।

মিসির আলি খাতার উপর থেকে চোখ তুললেন। সুলতান এসে পাশে দাঁড়িয়েছে। সে এসেছে নিঃশব্দে। মিসির আলি সুলতানের ঘরে ঢোকার শব্দ পান নি। সে যখন পাশে এসে দাঁড়িয়েছে তখনই বুঝতে পেরেছেন।

সুলতান খাটে বসতে বসতে বলল, সন্ধ্যাবেলা পড়াশোনার জন্যে ভাল না। মিসির আলি কিছু বললেন না। সুলতান বলল, আপনি গভীর মনোযোগ দিয়ে আমার লেখা পড়ছেন দেখে ভাল লাগল। ঘটনাগুলি আমি মোটামুটি ভালোই গুছিয়ে লিখেছি।

মিসির আলি বললেন, আমি যখন কিছু পড়ি মন দিয়েই পড়ি। তুমি

গুছিয়ে না লিখলেও আমি মন দিয়েই পড়তাম।

সুলতান বলল, এইখানে আপনার সঙ্গে আমার কিছু মিল আছে। আমি যখন যা করি মন দিয়েই করি। যখন আকাশের তারা দেখি, খুব মন দিয়ে দেখি। যখন মনে করি কারো উপর মানসিক চাপ সৃষ্টি করব তখন সেই কাজটাও খুব মন দিয়ে করি।

ভাল।

সুলতান বলল, ভালমন্দ বিবেচনা করে আমি কিছু করি না। আমাকে যা করতে হবে সেটা আমি করি। যাই হোক এটা নিয়ে পরে আপনার সঙ্গে কথা হবে। আপনি একটা কাজ করুন পুরো খাতাটা এখন পড়ার দরকার নেই। ধীরে সুস্থে পড়বেন। আমার ধারণা আপনি পড়ার অনেক সময় পাবেন। এখন শুধু সালমা'র অংশটা পড়ুন। এই মেয়েটি হচ্ছে আমার বর্তমান গবেষণার সাবজেক্ট। মেয়েটার সঙ্গে আপনার পরিচয় করিয়ে দেব। তার বিষয়ে আগে জানা থাকা ভাল।

মিসির আলি খাতা বন্ধ করতে করতে বললেন, তোমাদের ঐ কুয়াতে কি শুধু মুহুর্মদ ইদরিশ মাস্টারই আছে? না-কি আরো অনেকে আছে?

সুলতান হাসি মুখে তাকিয়ে রইল জবাব দিল না। তার মুখ দেখে মনে হচ্ছে সে খুব মজার কোনো কথা শুনল।

মিসির আলি বললেন, তোমার স্ত্রী কোথায় ? লিলি ?

সুলতান হাই তুলতে তুলতে বলল, ও অসুস্থ।

মিসির আলি বললেন, তোমার পরীক্ষা নিরীক্ষায় লিলি সাহায্য করে না ?

সুলতান বলল, ওর সাহায্যের তেমন প্রয়োজন পড়ে না। ও ভলেন্টিয়ার জোগাড় করে আলে। আপনাকে যেমন আনল। অবশ্যি আপনাকে ভলেন্টিয়ার বলা ঠিক হচ্ছে না। বিপজ্জনক কাজে ভলেন্টিয়ার পাওয়া যায় না—জোর করে বানাতে হয়। আপনি অকারণে কথা বলে সময় নষ্ট করছেন। সালমার বিষয়ে কি লিখেছি তাড়াতাড়ি পড়ে ফেলুন। একশ ছয় পৃষ্ঠায় পাবেন। আমি বরকতকে দিয়ে হারিকেন পাঠিয়ে দিছি। ভাল কথা চা খাবেন ? আপনাকে আজ মনে হয় বৈকালিক চা দেয়া হয় নি। লিলি অসুস্থ হওয়ায় একটু সমস্যা হয়েছে। খাবার দাবারের ব্যবস্থাটা খানিকটা এলোমেলো হয়েছে।

সুলতান উঠে দাঁড়াল। মিসির আলি হারিকেনের জন্যে অপেক্ষা করতে লাগলেন। সালমার বিষয়ে কি লেখা আছে মন দিয়ে পড়তে হবে। মিসির আলি খাতা খুললেন। একশ ছয় পৃষ্ঠা বের করলেন। এখনো ঘরে কিছু আলো

আছে। পড়া শুরু করা যেতে পারে। এর মধ্যে নিচয়ই হারিকেন চলে আসবে।

স্যাম্পল নাম্বার ৭

নাম : সালমা

বয়স : পনেরো থেকে ষোল

পড়াশোনা : নবম শ্রেণীর ছাত্রী

বুদ্ধি : ভালো। বেশ ভালো

জীব হিসেবে মানুষকে যতটা ভঙ্গ মনে করা হয় সে তত ভঙ্গ না। মানুষের মানসিক ভারসাম্য নষ্ট করা কঠিন কাজ। মন্ত্রিকের ডিফেন্স ম্যাকানিজিম প্রক্রিয়া অত্যন্ত প্রবল। মানসিক চাপ প্রতিরোধে সে তার সমগ্র শক্তি নিয়োগ করে। আমি অত্যন্ত বিশ্বয়ের সঙ্গে মানুষের এই ক্ষমতা অনেকবার প্রত্যক্ষ করেছি। সালমার বিষয়েও একই ব্যাপার ঘটেছে। তার উপর সৃষ্টি করা মানসিক চাপ সে নিজস্ব ডিফেন্স ম্যাকানিজিমের মাধ্যমে প্রতিহত করছে। আমি প্রতিদিনের পর্যবেক্ষণ লিখে যাচ্ছি।

১৮.৪.৮০

সালমাকে প্রথম সংগ্রহ করা হল। সংগ্রহ পদ্ধতি অবাস্তর বলে উল্লেখ করছি না। বাবা-মা-ভাই-বোন ছেড়ে হঠাতে এই নতুন জায়গায় উপস্থিত হয়ে সে প্রথমে খুবই ঘাবড়ে গেল। আমি অতি দ্রুত তার ভয় দূর করলাম। তাকে বলা হলো আমি যত তাড়াতাড়ি সম্ভব তার বাবা মা'কে খুঁজে বের করে তাকে তাদের কাছে পাঠাব। মেয়েটি মিশুক প্রকৃতির। প্রাথমিক শংকা ও ভয় সে দ্রুত কাটিয়ে উঠল। রাতে অনেকক্ষণ তার সঙ্গে গল্ল করলাম। পড়াশোনার খৌজ নিলাম। সে জানাল যে তার ভীতির বিষয় একটাই তা হলো অঙ্ক। তার ধারণা সে এস.এস.সি.তে সব বিষয়ে পাশ করলেও অংকে ফেল করবে। আমি তার অংক ভীতি কাটানোর জন্যে অংক নিয়ে কিছুক্ষণ গল্ল করলাম। নয় সংখ্যাটির অন্তর্ভুক্ত গুণ ব্যাখ্যা করলাম। যেমন ৯ এমন একটা সংখ্যা যাকে যে কোনো সংখ্যা দিয়ে গুণ করলে এবং গুণফলের সংখ্যাগুলিকে যোগ করলে আবার ৯ হয়।

$$9 \times 6 = 54; \quad 5 + 4 = 9$$

$$9 \times 16 = 144; \quad 1 + 4 + 4 = 9$$

সালমা এতে খুবই মজা পেল। নিজেই ব্যাপারটা পরীক্ষা করল। এবং জানতে চাইল— ৯-এর বেলায় এরকম কেন হচ্ছে? বোৰা যাচ্ছে মেয়েটির বুদ্ধি ভালো। অল্প বুদ্ধির মেয়ে অঙ্কের এই ব্যাপারটা ধরতে পারত না।

১৯-৪-৮০

আজ সালমার উপর প্রথম মানসিক চাপ সৃষ্টি করা হলো। আমি তার কাছে জানতে চাইলাম সে কুমারী কি না। প্রথম কিছুক্ষণ প্রশ্নটা সে ধরতেই পারল না। তাকে কুমারী বলতে কি বোঝাচ্ছে তা ব্যাখ্যা করার পর সে হতভম্ব হয়ে গেল। সে কল্পনাও করে নি এ ধরনের কোনো প্রশ্ন আমি তাকে করতে পারি। সে কান্নাকাটি শুরু করে দিল। আমি কঠিন ধরক দিয়ে তার কান্না থামিয়ে খুবই শান্ত গলায় বললাম যে তাকে এখানে আনা হয়েছে গৌর কালীর মন্দিরে দেবীর উদ্দেশে বলি দেয়ার জন্যে। বলিদানের জন্যে কুমারী মেয়ে প্রয়োজন বলেই জিজ্ঞেস করা হচ্ছে।

তাকে দেবী মূর্তি দেখিয়েও আনলাম। সে জানতে চাইল কবে বলি দেয়া হবে। আমি বললাম অমাবস্যায়। মেয়েটি সারারাত অচেতনের মত পড়ে রইল। তার শরীরের উত্তাপ বাড়ল। রাতে ভুল বকতে থাকল।

২০-৪-৮০

সকালবেলা মেয়েটা আমার সঙ্গে খুবই স্বাভাবিক ব্যবহার করল এবং ভীত গলায় বলল— গত রাতে সে ভয়ঙ্কর একটা দুঃস্বপ্ন দেখেছে। দুঃস্বপ্নে একজন কেউ তাকে এসে বলেছে যে তাকে মা কালীর কাছে বলি দেয়া হবে। মেয়েটা কাঁদো কাঁদো গলায় বলল, চাচা এমন একটা ভয়ঙ্কর দুঃস্বপ্ন কেন দেখলাম?

মেয়েটির নিজস্ব ডিফেন্স মেকানিজম কাজ করতে শুরু করেছে। তার মন্তিক্ষ তাকে নিশ্চিতভাবে বুঝিয়েছে কাল রাতের ঘটনাটা দুঃস্বপ্ন ছাড়া কিছুই না।

দুঃস্বপ্ন দেখে তয় পাওয়া যেতে পারে, তবে দুঃস্বপ্ন কেটে গেলে তয় পাওয়ার কিছু নেই। তার সময়টা স্বপ্ন এবং জাগরণ— এই দুইয়ের ভেতর ভাগ করে নিল। যখনই সে তয় পাচ্ছে তখনি ভাবছে এটা স্বপ্ন, কিছুক্ষণের মধ্যে স্বপ্ন কেটে যাবে এবং সব স্বাভাবিক হয়ে যাবে।

২১-৪-৮০

আজ সালমাকে রাতে থাকতে দেয়া হলো মন্দিরে। মন্দিরে সামান্য আলোর ব্যবস্থা রাখা হলো। গাঢ় অঙ্ককারে মানুষ তয় পায় না। তয় পাবার জন্যে আলো-আঁধার প্রয়োজন। কুকুর তিনটা মন্দিরের চারপাশে যেন ঘুরপাক খায় সেই ব্যবস্থা করা হলো। মন্দিরের মূল দরজা খোলা। আমার দেখার ইচ্ছা মেয়েটি কি করে। সে তেমন কিছু করল না। সারারাত মূর্তির গা ঘেঁসে বসে রইল। মাঝে মাঝে দেখছি তার ঠোঁট নড়ছে। সে হয়ত কথা বলছে মূর্তির সঙ্গে। আমার ধারণা মূর্তিটাকে সে ভয়ঙ্কর হিসেবে না নিয়ে বস্তু হিসেবে

নিয়েছে। কারণ মূর্তিটা দেখতে লিলির মতো। সালমা লিলিকে চেনে। মূর্তির গা ঘেঁসে বসে থাকার এই একটিই যুক্তি। তাকে অবশ্য অমাবস্যা কবে তা জানানো হয়েছে। অমাবস্যার মধ্যরাতে ঘটনা ঘটানো হবে তাও বলা হয়েছে। জেমস হাউলারের বিখ্যাত পরীক্ষার মতো পরীক্ষা। তাঁর পরীক্ষার বাস্তু পানি জমতে শুরু করেছে। আমার পরীক্ষায় অমাবস্যা এগিয়ে আসছে। হা হা হা।

মিসির আলি খাতা বন্ধ করলেন। তাঁর মাথায় সূক্ষ্ম যন্ত্রণা হচ্ছে। তিনি স্পষ্ট বুঝতে পারছেন সালমা নামের মেয়েটি আজ রাতেই মহাবিপদে পড়তে যাচ্ছে। সুলতান তার বিখ্যাত পরীক্ষা সালমাকে নিয়ে করছে না। সে পরীক্ষাটি করছে মিসির আলি নামের একজনকে নিয়ে যাকে সে মানসিকভাবে নিজের কাছাকাছি ভাবছে। মিসির আলি মোটামুটি নিশ্চিত যে সুলতান মধ্যরাতে এই হত্যাকাণ্ডটি ঘটাবে তাঁকে ভয় দেখানোর জন্যে। বাচ্চা একটি মেয়ের মানসিক পরিবর্তন নিয়ে তার কোন মাথা ব্যথা নেই। সালমা মেয়েটি তার সাবজেক্ট না। তার সাবজেক্ট মিসির আলি। মেয়েটির মৃত্যুতে তার কিছু যায় আসে না। তার আগ্রহ কৌতুহল মিসির আলিকে নিয়ে। যে কারণে সালমা মেয়েটিকে জোগাড় করার পরই মিসির আলি নামের মানুষটাকে এখানে আনার জন্যে ব্যবহৃত করেছে। সুলতানের মতো মানুষেরা একটা পর্যায়ে বুদ্ধির খেলা খেলতে চায়। আমিই শ্রেষ্ঠ এটা প্রমাণ করার জন্যে ব্যস্ত হয়ে ওঠে। এটা তাদের একটা খেলা। শিশুদের সঙ্গে সিরিয়াল কিলারদের কোথায় যেন সামান্য মিল আছে। শিশুদের কাছে যেমন সবই খেলা এদের কাছেও তাই।

সালমা মেয়েটিকে রক্ষা করার কোনো উপায় কি আছে? খুব ঠাণ্ডা মাথায় ভাবতে হবে এবং অতি দ্রুত ভাবতে হবে। হাতে সময় খুব বেশি নেই। সুলতানের সঙ্গে প্রত্যক্ষ যুদ্ধে তিনি নামতে পারছেন না। মানসিক যুদ্ধ অবশ্যই করা যাবে কিন্তু তার জন্যে প্রয়োজনীয় অস্ত্র কি তাঁর কাছে আছে?

সুলতানের বিষয় অক্ষ। কাজেই যুক্তি ব্যাপারটা তার কাছে গুরুত্বপূর্ণ হবার কথা। যুক্তির ক্ষমতার প্রতি তার আস্থা অবশ্যই থাকবে। সুলতানের মানসিক দুর্গে তাঁকে পৌছতে হবে যুক্তির সিঁড়িতে পা রেখে। এমন যুক্তি যা সুলতানকে গ্রহণ করতে হবে। তিনি কি পারবেন? মিসির আলি চোখ বন্ধ করে আছেন। নিজেকে শান্ত রাখার চেষ্টা করছেন। পারছেন না। তিনি অনুভব করলেন তাঁর শরীর কাঁপছে। এটা ভালো লক্ষণ না। এটা বয়সের লক্ষণ। জরার লক্ষণ।

‘দিঘৰং নো অত জরসে নিনেষজ্
জরা মৃত্যুবে পরি নো দদাত্যথ
পক্ষেন সহ সংভবেম’

আমার ভগ্য আমাকে নিয়ে যাবে জরায়, জরা নিয়ে যাবে সেই মৃত্যুতে
যা আমাকে অসীমের সঙ্গে যুক্ত করবে।

মিসির আলির ঘূর্ম পাছে। তিনি বিছানায় লস্থা হয়ে শয়ে পড়লেন। তাঁর
শীত লাগছে। শীতে গায়ে কাঁটা দিচ্ছে। তিনি গায়ের উপর চাদর টেনে
দিলেন। তিনি কিছুক্ষণ ঘুমুবেন। মধ্যরাতের আগেই সুলতান নিশ্চয়ই তাঁকে
ডেকে নিয়ে যাবে। হয়ত তখনি সালমার সঙ্গে দেখা হবে। হত্যাকাণ্ডা যে খুব
সহজ হবে তাও মনে হয় না। সুলতানের মতো মানুষেরা ড্রামা পছন্দ করে।
হয়তো মেয়েটাকে স্বান করানো হবে। নতুন কাপড় পরানো হবে। গলায় দেয়া
হবে জবা ফুলের মালা। এই ফুল প্রাচীন ভারতের অনেক নর রক্তের সাক্ষী।
ঘুমের মধ্যে মিসির আলি বিড়বিড় করে বললেন, সালমা মাগো, ভয় পেও না।
আমি আছি তোমার পাশে। আমি সাধারণ কেউ না মা, আমি মিসির আলি।

সুলতান মরিচ ফুল গাছের বেদীতে বসে আছে। তার সামনে হারিকেন।
হারিকেনের আলোয় সুলতানের মুখ দেখা যাচ্ছে। আনন্দময় মানুষের মুখ। সে
হাত দিয়ে মাথার চুল টানছে। কিন্তু তাতে কোনো অস্থিরতা প্রকাশ পাচ্ছে না।
সুলতানের সামনে দু'টা পিরিচে ঢাকা কফির মগ। মিসির আলি এসে বেদীতে
বসলেন। সুলতান কফির মগ মিসির আলির হাতে এগিয়ে দিতে দিতে বলল,
আমি এর মধ্যে দু'বার খৌজ নিয়েছিলাম। দেখলাম আপনি ঘুমুচ্ছেন। স্যার
আপনার ঘূর্ম কি ভাল হয়েছে?

হ্যাঁ ভালো হয়েছে।

সুলতান হাসিমুখে বলল, এমন পরিস্থিতিতে কেউ ঘুমুতে পারে আমার
ধারণা ছিলো না।

মিসির আলি বললেন, পরিস্থিতি কি খুব খারাপ?

খারাপ তো বটেই, আজ অমাবস্যা না? আমি সালমা মেয়েটার বিষয়ে
সিদ্ধান্ত নিয়েছি। ও আসলে আমার পরীক্ষায় কোনো কাজে আসছে না। তাকে
তো আর ফেরতও পাঠাতে পারি না। এই রিক্ষ আমার পক্ষে নেয়া সম্ভব না।
কাজেই অন্য ব্যবস্থা নিতে হচ্ছে। কফি খেতে কেমন হয়েছে?

ভাল হয়েছে।

সালমা মেয়েটির সঙ্গে কি কথা বলবেন?

না।

না কেন?

মিসির আলি জবাব দিলেন না। কফির মগে চুমুক দিতে লাগলেন। একবার তাকালেন মরিচ ফুল গাছটার দিকে। গাছ ভর্তি জোনাকি। জুলছে, নিভছে। এত সুন্দর লাগছে দেখতে যে তিনি চোখ ফেরাতে পারছেন না।

স্যার কি দেখছেন ?

জোনাকি। অনেকদিন পর জোনাকি দেখলাম। অপূর্ব দৃশ্য! মনে হচ্ছে আকাশের সব তারা গাছে নেমে এসেছে।

সুলতান সিগারেট ধরাতে ধরাতে বলল, আপনি জোনাকি দেখে অভিভূত হচ্ছেন, মেঝেটিকে রক্ষা কীভাবে করা যায় এই বিষয়ে ভাবছেন না ?

ভাবছি। কোনো কিছুর দিকে তাকিয়ে থেকে অন্য কিছু ভাবা খুব সহজ।

ভেবে কিছু পেয়েছেন ?

হ্যাঁ।

কী পেয়েছেন ? আচ্ছা আমিই বলি আপনি কি পেয়েছেন—আপনি ঠিক করেছেন যুক্তি দিয়ে আমার সিদ্ধান্ত বদলাবেন। আপনার ঝুলিতে যে সব ধারালো যুক্তি আছে তার সব একের পর এক বের করবেন। সক্রেটিসের বিখ্যাত যুক্তিটা দিতে পারেন। সক্রেটিস বলেছেন, ‘কোনো মানুষই জেনে শুনে মন্দ কাজ করে না।’

মিসির আলি সহজ গলায় বললেন, এইসব যুক্তি তোমার বেলায় খাটবে না। আমাকে যা করতে হবে তা হলো— তোমার মনের ভেতরে, চেতনার গভীরে যে ভয় বাস করছে তাকে বের করে আনা।

সুলতান শীতল গলায় বলল, আমার ভেতরে ভয় বাস করছে ? কীসের ভয় ?

মিসির আলি বললেন, কুয়ার ভয়। গৌর কালি মূর্তি এসে স্বপ্নে তোমাকে বলে গেল কখনো যেন কুয়ার পাশে না যাও। কুয়াতে ভয়ঙ্কর কিছু তোমার জন্যে অপেক্ষা করছে। গৌর কালী বলেতো কিছু নেই। তোমার অবচেতন মন গৌর কালীকে সৃষ্টি করেছিল। সেই অবচেতন মনই ভয়টাকেও সৃষ্টি করেছে। সেই ভয় বাস করছে কুয়ার ভেতরে। আমি যুক্তি দিয়ে কথা বলছি তুমি কি যুক্তিশুলি বুঝতে পারছ ?

পারছি।

কুয়ার পাশে যেই মুহূর্তে তুমি দাঁড়াবে প্রবল ভয় তোমাকে সম্পূর্ণ গ্রাস করবে। অবচেতন মন তোমাকে ভয়ঙ্কর কিছু দেখাবে। কী দেখবে আমি জানি না— হয়ত দেখবে কুয়ার গা বেয়ে ইদরিশ মাস্টার উঠে আসছে। তাকে

দেখাচ্ছে একটা কুৎসিত মাকড়সার মতো। কিংবা এর চেয়েও ভয়ঙ্কর কিছু দেখবে।

সুলতান হাতের সিগারেট ফেলে দিয়ে শান্ত গলায় বলল, আপনি যা বলছেন ঠিক আছে। আমি সেটা জানি। জানি বলেই কখনো কুয়ার পাশে যাই না। কারো পক্ষেই আমাকে কুয়ার পাশে নিয়ে যাওয়া সম্ভব না।

মিসির আলি সহজ গলায় বললেন, তোমাকে কুয়ার কাছে যেতে হবে কেন? কুয়া তোমার কাছে চলে আসবে। তুমি বসে আছ বেদীতে তুমি দেখবে কুয়া ধীরে ধীরে এগিয়ে আসছে তোমার দিকে।

সুলতান তীক্ষ্ণ গলায় বলল, তার মানে?

মিসির আলি বললেন, তুমি আকাশের তারা দেখ— এই ব্যাপারটা তুমি সবচে' ভালো বুঝবে। আকাশের দিকে কিছুক্ষণ তাকিয়ে থাকলে মনে হয় না আকাশের তারা নিচে নেমে আসছে? অনেকটা সে রকম। দৃষ্টি বিশ্রম। কুয়া থাকবে কুয়ার জায়গায় অথচ তোমার মনে হবে কুয়া জীবন্ত প্রাণীর মতো এগিয়ে আসছে।

সুলতান চাপা গলায় বলল, আপনি আমার সঙ্গে একটা ট্রিকস করার চেষ্টা করছেন।

মিসির আলি বললেন, হ্যাঁ করছি। তোমার মনের গভীরে ঘাপটি মেরে বসে থাকা ভয়টাকে বের করে এনেছি। ভয়ে তোমার চেতনা বখন অসাড় হয়ে এসেছে তখন বলেছি কুয়া এগিয়ে আসছে। তোমার অবচেতন মন তা গ্রহণ করেছে। একে সাইকলজির ভাষায় বলে induced hallucination. তোমার চোখ মুখ দেখে বুঝতে পারছি তুমি স্পষ্ট দেখতে পাচ্ছ কুয়া তোমার দিকে এগিয়ে আসছে। তোমার মনও আমাকে খানিকটা সাহায্য করেছে। এই কুয়াটার প্রতি তোমার তীব্র আকর্ষণ। তুমি সব সময় তার কাছে যেতে চেয়েছ। কিছুক্ষণের ভেতর কুয়াটাকে তুমি তোমার সামনে এসে দাঁড়াতে দেখবে। তোমার ইচ্ছা করবে না, তারপরেও তুমি উঁকি দেবে— এবং যে ভয় তুমি পাবে সেই ভয়ের জন্ম এই পৃথিবীতে নয়। অন্য কোনো জগতে।

সুলতান চিৎকার করে উঠল, স্টপ, প্লীজ স্টপ। স্টপ ইট প্লীজ।

সুলতান বিকৃত গলায় চেঁচাচ্ছে। তার মুখ দিয়ে ফেনা বের হতে শুরু করেছে। ছুটে এসেছে লিলি। কিছুদূর এসেই সে থমকে দাঁড়িয়ে গেল। সুলতান চিৎকার করেই যাচ্ছে। সে থর থর করে কাঁপছে। সে এক দৃষ্টিতে তাকিয়ে আছে মরিচ ফুল গাছের বেদীর দিকে। ভয়ঙ্কর কিছু সে অবশ্যই দেখতে পাচ্ছে।

মিসির আলি শান্ত ভঙ্গিতে সিগারেট ধরালেন। এগিয়ে গোলেন মন্দিরের দিকে। সালমা মেয়েটি নিশ্চয়ই মন্দিরে আছে। বেচারী হয়ত ভয়েই মরে যাচ্ছে! তার ভয়টা কাটানো দরকার।

সালমা মূর্তির আড়ালে গুটিসুটি মেরে বসেছিল। মিসির আলিকে দেখে সে চোখ বড় বড় করে তাকাল। মিসির আলি কোমল গলায় বললেন, কেমন আছ গো মা? মেয়েটা জবাব দিল না। তার চোখ ভর্তি হয়ে গেল পানিতে।

মিসির আলি বললেন, আমার ছোট্ট মায়ের চোখে পানি কেন? কাছে এসো চোখ মুছিয়ে দেই। এসো জোনাকি পোকা দেখি। আমি আমার জীবনে এক সঙ্গে এত জোনাকি দেখি নি।